CBETA電子佛典集成

CBETA Chinese Electronic Tripitaka Collection ebook

T16n0665

金光明最勝王經

唐 義淨譯

目次

- 編輯說明
- 章節目次
 - ∘ 1_序品(一)
 - 。 2_如來壽量品(一).
 - · 3 分別三身品(二)
 - 4 夢見全鼓懺悔品(二)
 - 。 5_ 滅業障品(三)
 - 。 6 最淨地陀羅尼品(四)
 - · 7 蓮華喻讚品(五)
 - · 8 全勝陀羅尼品(五)
 - 。9 重顯空性品(五)
 - 10 依空滿願品(五)
 - 。11 四天王觀察人天品(五)
 - · 12 四天王護國品(六)
 - 13 無染著陀羅尼品(上)
 - · 14 如意寶珠品(上)
 - · 15_大辯才天女品(七-八)
 - · 1<u>6 大吉祥天女品(八</u>)
 - 。17 大吉祥天女增長財物品(八)
 - 18 堅牢地神品(八)
 - ∘ 19 僧慎爾耶藥叉大將品(八)
 - · 20 王法正論品(八)
 - 。21 <u>善生王品(力</u>)
 - · 22 <u>諸天藥叉護持品(力)</u>
 - 23 授記品(力)
 - 。 24 除病品(力)
 - · 25 <u>長者子流水品(力</u>)
 - 26_ 捨身品(一○)
 - 。 27_十方菩薩讚歎品(一○)
 - 28 妙幢菩薩讚歎品(一○)
 - 29 菩提樹神讚歎品(一○)
 - 30 大辯才天女讚歎品(一○)
 - 31 付囑品(一〇)
- 券目次

- 001002
- 003
- · 004
- 005006
- · 007
- 008009

- 010贊助資訊

編輯說明

- 本電子書以「CBETA 電子佛典集成 Version 2022. Q3」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta, org 回報。
- <u>版權所有</u>,歡迎自由流通,但禁止營利使用。

No. 665 [Nos. 663, 664]

金光明最勝王經卷第一

大唐三藏沙門義淨奉 制譯

序品第一

如是我聞:

一時薄伽梵,在王舍城鷲峯山頂,於最清淨甚深法界,諸佛之境如來所居,與大苾芻眾九萬八千人,皆是阿羅漢——能善調伏如大象王,諸漏已除,無復煩惱,心善解脫,慧善解脫,所作已畢,捨諸重擔,逮得己利,盡諸有結,得大自在,住清淨戒,善巧方便,智慧莊嚴,證八解脫,已到彼岸——其名曰:具壽阿若憍陳如,具壽阿說侍多,具壽婆濕波,具壽摩訶那摩,具壽婆帝利迦,大迦攝波,優樓頻螺迦攝,伽耶迦攝,那提迦攝,舍利子,大目乾連;惟阿難陀住於學地。如是等諸大聲聞,各於晡時從定而起,往詣佛所,頂禮佛足,右遶三匝,退坐一面。

復有菩薩摩訶薩,百千萬億人俱——有大威德,如大龍王,名稱普聞,眾所知識,施戒清淨,常樂奉持,忍行精勤,經無量劫,超諸靜慮,繫念現前,開闡慧門,善修方便,自在遊戲,微妙神通,逮得總持,辯才無盡,斷諸煩惱,累染皆亡,不久當成一切種智,降魔軍眾而擊法鼓,制諸外道,令起淨心,轉妙法輪,度人天眾,十方佛土悉已莊嚴,六趣有情無不蒙益,成就大智,具足大忍,住大慈悲心,有大堅固力,歷事諸佛,不般涅槃,發弘誓心,盡未來際,廣於佛所深種淨因,於三世法悟無生忍,逾於二乘所行境界,以大善巧化導世間,於大師教悉能敷演,祕密之法,甚深空性,皆已了知,無復疑惑——其名曰:無障礙轉法輪菩薩,常發心轉法輪菩薩,常精進菩薩,不休息菩薩,慈氏菩薩,妙吉祥菩薩,觀自在

菩薩,總持自在王菩薩,大辯莊嚴王菩薩,妙高山王菩薩,大海深王菩薩,寶幢菩薩,大寶幢菩薩,地藏菩薩,虛空藏菩薩,寶手自在菩薩,金剛手菩薩,歡喜力菩薩,大法力菩薩,大莊嚴光菩薩,大金光莊嚴菩薩,淨戒菩薩,常定菩薩,極清淨慧菩薩,堅固精進菩薩,心如虛空菩薩,不斷大願菩薩,施藥菩薩,療諸煩惱病菩薩,醫王菩薩,歡喜高王菩薩,得上授記菩薩,大雲淨光菩薩,大雲持法菩薩,大雲名稱喜樂菩薩,大雲現無邊稱菩薩,大雲師子吼菩薩,大雲牛王吼菩薩,大雲吉祥菩薩,大雲寶德菩薩,大雲日藏菩薩,大雲月藏菩薩,大雲書菩薩,大雲書菩薩,大雲書蔣充遍菩薩,大雲清淨雨王菩薩,大雲花樹王菩薩,大雲青蓮花香菩薩,大雲寶栴檀香清涼身菩薩,大雲除闇菩薩,大雲破聲菩薩。如是等無量大菩薩眾,各於晡時,從定而起,往詣佛所,頂禮佛足,右遶三匝,退坐一面。

復有梨車毘童子五億八千,其名曰:師子光童子,師子慧童子,法 授童子,因陀羅授童子,大光童子,大猛童子,佛護童子,法護童子,僧護童子,金剛護童子,虛空護童子,虛空吼童子,寶藏童子,吉祥妙藏童子,如是等人而為上首,悉皆安住無上菩提,於大乘中,深信歡喜。各於晡時,往詣佛所,頂禮佛足,右遶三匝,退坐一面。

復有四萬二千天子,其名曰:喜見天子,喜悅天子,日光天子,月 髻天子,明慧天子,虚空淨慧天子,除煩惱天子,吉祥天子,如是 等天子而為上首,皆發弘願,護持大乘,紹隆正法,能使不絕。各 於晡時,往詣佛所,頂禮佛足,右遶三匝,退坐一面。

復有二萬八千龍王:蓮華龍王,[醫-酉+言]羅葉龍王,大力龍王, 大吼龍王,小波龍王,<mark>持駛水</mark>龍王,金面龍王,如意龍王,如是等 龍王而為上首,於大乘法,常樂受持,發深信心,稱揚擁護。各於 晡時,往詣佛所,頂禮佛足,右遶三匝,退坐一面。

復有三萬六千諸藥叉眾,毘沙門天王而為上首。其名曰:蕃婆藥 叉,持畚婆藥叉,蓮花光藏藥叉,蓮花而藥叉,顰眉藥叉,現大怖 藥叉,動地藥叉,吞食藥叉,是等藥叉悉皆愛樂如來正法,深心護 持,不生疲懈。各於晡時,往詣佛所,頂禮佛足,右遶三匝,退坐 一面。

復有四萬九千揭路茶王,香象勢力王而為上首,及餘健闥婆,阿蘇 羅,緊那羅,莫呼洛伽等,山林河海一切神仙,并諸大國所有王 眾,中宮后妃,淨信男女,人天大眾悉皆雲集,咸願擁護無上大 乘,讀誦受持,書寫流布。各於晡時,往詣佛所,頂禮佛足,右遶 三师,混坐一面。

如是等聲聞、菩薩、人天大眾、龍神八部,既雲集已,各各至心合 堂恭敬,瞻仰尊容,目未曾捨,願樂欲聞殊勝妙法。

爾時,薄伽梵於日晡時,從定而起,觀察大眾,而說頌曰:

最勝諸經王; 「金光明妙法,

甚深難得聞, 諸佛之境界。

我當為大眾, 宣說如是經;

威神共加護: 并四方四佛,

南方寶相佛, 東方阿閦尊,

西方無量壽, 北方天鼓音。

我復演妙法, 吉祥懺中勝,

能滅一切罪, 淨除諸惡業。

及消眾苦患, 常與無量樂,

一切智根本, 諸功德莊嚴。

眾生身不具, 壽命將損減,

諸惡相現前, 天神皆捨離。

親友懷瞋恨, 眷屬悉分離,

彼此共乖違, 珍財皆散失。

或被邪蠱侵, 惡星為變怪,

眾苦之所逼, 若復多憂愁,

睡眠見惡夢, 因此生煩惱。

是人當澡浴, 應著鮮潔衣,

於此妙經王, 甚深佛所讚, 讀誦聽受持。 專注心無亂, 由此經威力, 能離諸災橫, 及餘眾苦難, 無不皆除滅。 護世四王眾, 及大臣眷屬, 無量諸藥叉, 一心皆擁衛。 大辯才天女, 尼連河水神, 訶利底母神, 堅牢地神眾, 梵王帝釋主, 龍王緊那羅, 阿蘇羅天眾, 及金翅鳥王, 如是天神等, 并將其眷屬, 皆來護是人, 書夜常不離。 我當說是經, 甚深佛行處; 諸佛祕密教, 千萬劫難逢。 若有聞是經, 能為他演說, 若心生隨喜, 或設於供養; 如是諸人等, 當於無量劫, 常為諸天人, 龍神所恭敬。 此福聚無量, 數渦於恒沙, 讀誦是經者, 當獲斯功德。 亦為十方尊, 深行諸菩薩, 擁護持經者, **令離諸苦難**。 供養是經者, 如前澡浴身, 飲食及香花, 恒起慈悲意。 若欲聽是經, 今心淨無垢; 常牛歡喜念, 能長諸功德。 若以尊重心, 聽聞是經者; 善生於人趣, 遠離諸苦難。 諸佛之所讚; 彼人善根熟, 方得閏是經, 及以懺悔法。」

金光明最勝王經如來壽量品第二

爾時,王舍大城有一菩薩摩訶薩,名曰妙幢,已於過去無量俱胝那 庾多百千佛所,承事供養,殖諸善根。是時妙幢菩薩獨於靜處,作 是思惟:「以何因緣,釋迦牟尼如來壽命短促,唯八十年?」復作 是念:「如佛所說,有二因緣,得壽命長。云何為二?一者、不害

生命,二者、施他飲食。然釋迦牟尼如來曾於無量百千萬億無數大劫,不害生命,行十善道,常以飲食惠施一切飢餓眾生,乃至己身血肉骨髓,亦持施與,令得飽滿,況餘飲食。」

時彼菩薩於世尊所,作是念時,以佛威力,其室忽然廣博嚴淨,帝青琉璃種種眾寶,雜彩間飾,如佛淨土,有妙香氣過諸天香,芬馥充滿。於其四面各有上妙師子之座,四寶所成,以天寶衣而敷其上。復於此座有妙蓮花,種種珍寶以為嚴飾,量等如來自然顯現。於蓮花上有四如來,東方不動,南方寶相,西方無量壽,北方天鼓音。是四如來各於其座加趺而坐,放大光明,周遍照耀王舍大城,及此三千大千世界,乃至十方恒河沙等諸佛國土,雨諸天花,奏諸天樂。爾時,於此贍部洲中及三千大千世界,所有眾生,以佛威力,受勝妙樂,無有乏少。若身不具,皆蒙具足,盲者能視,聾者得聞,瘂者能言,愚者得智,若心亂者得本心,若無衣者得衣服,被惡賤者人所敬,有垢穢者身清潔,於此世間所有利益,未曾有事,悉皆顯現。

爾時,妙幢菩薩見四如來及希有事,歡喜踊躍,合掌一心,瞻仰諸佛殊勝之相,亦復思惟釋迦牟尼如來無量功德,惟於壽命生疑惑心:「云何如來功德無量,壽命短促唯八十年?」

爾時,四佛告妙幢菩薩言:「善男子!汝今不應思忖如來壽命長短。何以故?善男子!我等不見諸天世間梵、魔、沙門、婆羅門等,人及非人,有能算知佛之壽量,知其齊限;惟除無上正遍知者。」時四如來欲說釋迦牟尼佛所有壽量,以佛威力,欲色界天諸龍、鬼神、健闥婆、阿蘇羅、揭路茶、緊那羅、莫呼洛伽,及無量百千億那庾多菩薩摩訶薩,悉來集會,入妙幢菩薩淨妙室中。

爾時,四佛於大眾中,欲顯釋迦牟尼如來所有壽量,而說頌曰:

「一切諸海水, 可知其渧數;

無有能數知, 釋迦之壽量。 析諸妙高山, 如芥可知數; 無有能數知, 釋迦之壽量。 一切大地土, 可知其塵數; 無有能數知, 釋迦之壽量。 假使量虚空, 可得盡邊際; 無有能度知, 釋迦之壽量。 若人住億劫, 盡力常算數; 亦復不能知, 世尊之壽量。 不害眾生命, 及施於飲食; 得壽命長遠。 由斯二種因, 是故大覺尊, 壽命難知數; 如劫無邊際, 壽量亦如是。 不應起疑惑; 妙幢汝當知, 莫能知數者。」 最勝壽無量,

爾時,妙幢菩薩聞四如來說釋迦牟尼佛壽量無限,白言:「世尊!云何如來示現如是短促壽量?」

時四世尊告妙幢菩薩言:「善男子!彼釋迦牟尼佛於五濁世出現之時,人壽百年,稟性下劣,善根微薄,復無信解。此諸眾生多有我見、人見、眾生、壽者、養育邪見、我我所見、斷常見等,為欲利益此諸異生及眾外道如是等類,令生正解,速得成就無上菩提,是故釋迦牟尼如來示現如是短促壽命。善男子!然彼如來欲令眾生見涅槃已,生難遭想、憂苦等想,於佛世尊所說經教,速當受持,讀誦通利,為人解說,不生謗毀,是故如來現斯短壽。何以故?彼諸眾生若見如來不般涅槃,不生恭敬難遭之想,如來所說甚深經典,亦不受持讀誦通利、為人宣說。所以者何?以常見佛,不尊重故。善男子!譬如有人見其父母多有財產,珍寶豐盈,便於財物不生希有難遭之想。所以者何?於父財物生常想故。善男子!彼諸眾生亦復如是,若見如來不入涅槃,不生希有難遭之想。所以者何?由常見故。善男子!譬如有人父母貧窮,資財乏少,然彼貧人或詣王家、或大臣舍,見其倉庫種種珍寶悉皆盈滿,生希有心,難遭之

想。時彼貧人為欲求財,廣設方便,策勤無怠。所以者何?為捨貧窮,受安樂故。善男子!彼諸眾生亦復如是,若見如來入於涅槃,生難遭想乃至憂苦等想,復作是念:『於無量劫諸佛如來出現於世,如烏曇跋花,時乃一現。』彼諸眾生發希有心,起難遭想。若遇如來,心生敬信,聞說正法,生實語想,所有經典悉皆受持,不生毀謗。善男子!以是因緣,彼佛世尊,不久住世,速入涅槃。善男子!是諸如來,以如是等善巧方便成就眾生。」爾時,四佛說是語已,忽然不現。

爾時,妙幢菩薩摩訶薩與無量百千菩薩,及無量億那庾多百千眾生,俱共往詣鷲峯山中釋迦牟尼如來正遍知所,頂禮佛足,在一面立。時妙幢菩薩以如上事具白世尊。

時四如來亦詣鷲峯,至釋迦牟尼佛所,各隨本方就座而坐,告侍者 菩薩言:「善男子!汝今可詣釋迦牟尼佛所,為我致問:『少病少 惱,起居輕利,安樂行不?』復作是言:『善哉!善哉!釋迦牟尼 如來!今可演說《金光明經》甚深法要,為欲饒益一切眾生,除去 飢饉,令得安樂,我當隨喜。』」

時彼侍者各詣釋迦牟尼佛所,頂禮雙足,却住一面,俱白佛言:「彼天人師致問無量:『少病少惱,起居輕利,安樂行不?』復作是言:『善哉!善哉!釋迦牟尼如來!今可演說《金光明經》甚深法要,為欲利益一切眾生,除去飢饉,令得安樂。』」

爾時,釋迦牟尼如來、應、正等覺告彼侍者諸菩薩言:「善哉!善哉!彼四如來乃能為諸眾生饒益安樂,勸請於我宣揚正法。」

爾時世尊,而說頌曰:

「我常在鷲山, 宣說此經寶; 成就眾生故, 示現般涅槃。 凡夫起邪見, 不信我所說;

為成就彼故, 示現般涅槃。」

時大會中有婆羅門,姓憍陳如,名曰法師授記,與無量百千婆羅門眾,供養佛已,聞世尊說入般涅槃,涕淚交流,前禮佛足,白言:「世尊!若實如來於諸眾生有大慈悲,憐愍利益,令得安樂,猶如父母,餘無等者,能與世間作歸依處,如淨滿月,以大智慧能為照明,如日初出,普觀眾生,愛無偏黨,如羅怙羅,惟願世尊施我一願!」

爾時世尊默然而止。佛威力故,於此眾中,有梨車毘童子,名一切眾生憙見,語婆羅門憍陳如言:「大婆羅門!汝今從佛欲乞何願?我能與汝。」

婆羅門言:「童子!我欲供養無上世尊,今從如來求請舍利如芥子許。何以故?我曾聞說:『若善男子、善女人得佛舍利如芥子許,恭敬供養,是人當生三十三天而為帝釋。』」

是時童子語婆羅門曰:「若欲願生三十三天受勝報者,應當至心聽 是《金光明最勝王經》。於諸經中最為殊勝,難解難入,聲聞、獨 覺所不能知;此經能生無量無邊福德果報,乃至成辦無上菩提。我 今為汝略說其事。」

婆羅門言:「善哉!童子!此《金光明》甚深最上,難解難入,聲聞、獨覺尚不能知,何況我等邊鄙之人,智慧微淺而能解了。是故我今求佛舍利如芥子許,持還本處,置寶函中,恭敬供養,命終之後得為帝釋,常受安樂。云何汝今不能為我從明行足求斯一願?」作是語已。

爾時童子即為婆羅門,而說頌曰:

「恒河<mark>駛</mark>流水, 可生白蓮花; 黄鳥作白形, 黑鳥變為赤。

假使贍部樹, 可生多羅果; 朅樹羅枝中, 能出蕃羅葉。 斯等希有物, 或容可轉變; 世尊之舍利, 畢竟不可得。 假使用龜毛, 織成上妙服, 寒時可被著, 方求佛舍利。 假使蚊蚋足, 可使成樓觀, 方求佛舍利。 堅固不搖動, 假使水蛭蟲, 口中生白齒, 長大利如鋒, 方求佛舍利。 假使持兔角, 用成於梯蹬, 可昇上天宫, 方求佛舍利。 鼠緣此梯上, 除去阿蘇羅, 能障空中月, 方求佛舍利。 若蠅飲酒醉, 周行村邑中, 廣造於舍宅, 方求佛舍利。 若使驢唇色, 赤如頻婆果, 方求佛舍利。 善作於歌舞, 鳥與鵂鶹鳥, 同共一處遊, 彼此相順從, 方求佛舍利。 假使波羅葉, 可成於傘蓋, 能遮於大雨, 方求佛舍利。 假令大船舶, 盛滿諸財寶, 能令陸地行, 方求佛舍利。 假使鷦鷯鳥, 以噹街香山, 方求佛舍利。」

爾時,法師授記婆羅門聞此頌已,亦以伽他答一切眾生憙見童子曰:

此眾中吉祥; 「善哉大童子, 善巧方便心, 得佛無上記。 如來大威德, 能救護世間; 仁可至心聽, 我今次第說。 諸佛境難思, 世間無與等; 法身性常住, 修行無差別。 諸佛體皆同, 所說法亦爾; 諸佛無作者, 亦復本無生。

世尊金剛體, 權現於化身; 是故佛舍利, 無如芥子許。 佛非血肉身, 云何有舍利? 方便留身骨, 為益諸眾生。 法身是正覺, 法界即如來; 此是佛真身, 亦說如是法。」

爾時,會中三萬二千天子,聞說如來壽命長遠,皆發阿耨多羅三藐三菩提心,歡喜踊躍,得未曾有。異口同音,而說頌曰:

「佛不般涅槃, 正法亦不滅; 為利眾生故, 示現有滅盡。 世尊不思議, 妙體無異相; 為利眾生故, 現種種莊嚴。」

爾時,妙幢菩薩親於佛前,及四如來并二大士諸天子所,聞說釋迦牟尼如來壽量事已,復從座起,合掌恭敬白佛言:「世尊!若實如是,諸佛如來不般涅槃,無舍利者,云何經中說有涅槃及佛舍利,令諸人天恭敬供養?過去諸佛現有身骨流布於世,人天供養得福無邊?今復言無,致生疑惑。惟願世尊哀愍我等,廣為分別!」

爾時,佛告妙幢菩薩及諸大眾:「汝等當知!云般涅槃有舍利者,是密意說,如是之義,當一心聽。善男子!菩薩摩訶薩如是應知,有其十法能解如來、應、正等覺真實理趣,說有究竟大般涅槃。云何為十?一者、諸佛如來究竟斷盡諸煩惱障、所知障故,名為涅槃。二者、諸佛如來善能解了有情無性及法無性故,名為涅槃。三者、龍轉身依及法依故,名為涅槃。四者、於諸有情任運休息化因緣故,名為涅槃。五者、證得真實無差別相平等法身故,名為涅槃。六者、了知生死及以涅槃無二性故,名為涅槃。七者、於一切法可其根本,證清淨故,名為涅槃。八者、於一切法無生無滅善修行故,名為涅槃。九者、真如法界實際平等,得正智故,名為涅

槃。十者、於諸法性及涅槃性,得無差別故,名為涅槃。是謂十法 說有涅槃。

「復次,善男子!菩薩摩訶薩如是應知,復有十法,能解如來、應、正等覺真實理趣,說有究竟大般涅槃。云何為十?一者、一切煩惱以樂欲為本,從樂欲生;諸佛世尊斷樂欲故,名為涅槃。二者、以諸如來斷諸樂欲,不取一法,以不取故,無去無來,無所取故,名為涅槃。三者、以無去來及無所取,是則法身不生不滅,無生滅故,名為涅槃。四者、此無生滅非言所宣,言語斷故,名為涅槃。五者、無有我人,惟法生滅,得轉依故,名為涅槃。六者、煩惱隨惑,皆是客塵,法性是主,無來無去,佛了知故,名為涅槃。七者、真如是實,餘皆虛妄,實性體者即是真如,真如性者即是如來,名為涅槃。八者、實際之性無有戲論,惟獨如來證實際法,戲論永斷,名為涅槃。九者、無生是實,生是虛妄,愚癡之人漂溺生死,如來體實,無有虛妄,名為涅槃。十者、不實之法是從緣生,真實之法不從緣起,如來法身,體是真實,名為涅槃。善男子!是謂十法說有涅槃。

「復次,善男子!菩薩摩訶薩如是應知,復有十法,能解如來、應、正等覺真實理趣,說有究竟大般涅槃。云何為十?一者、如來善知施及施果,無我我所,此施及果不正分別,永除滅故,名為涅槃。二者、如來善知戒及戒果,無我我所,此戒及果不正分別,永除滅故,名為涅槃。三者、如來善知忍及忍果,無我我所,此忍及果不正分別,永除滅故,名為涅槃。四者、如來善知勤及勤果,無我我所,此勤及果不正分別,永除滅故,名為涅槃。五者、如來善知定及定果,無我我所,此定及果不正分別,永除滅故,名為涅槃。六者、如來善知慧及慧果,無我我所,此慧及果不正分別,永除滅故,名為涅槃。六者、如來善知慧及慧果,無我我所,此慧及果不正分別,永除滅故,名為涅槃。七者、諸佛如來善能了知一切有情非有情,一切諸法皆無性,不正分別,永除滅故,名為涅槃。八者、若自愛者

便起追求,由追求故,受眾苦惱;諸佛如來除自愛故,永絕追求, 無追求故,名為涅槃。九者、有為之法皆有數量,無為法者數量皆 除,佛離有為,證無為法,無數量故,名為涅槃。十者、如來了知 有情及法,體性皆空,離空非有,空性即是真法身故,名為涅槃。 善男子!是謂十法說有涅槃。

「復次,善男子!豈惟如來不般涅槃是為希有?復有十種希有之 法,是如來行。云何為十?一者、生死過失,涅槃寂靜,由於生死 及以涅槃證平等故,不處流轉,不住涅槃,於諸有情不生厭背,是 如來行。二者、佛於眾生不作是念:『此諸愚夫行顛倒見,為諸煩 惱之所纏迫;我今開悟,令其解脫。』然由往昔慈善根力,於彼有 情隨其根性意樂勝解,不起分別,任運濟度,示教利喜,盡未來際 無有窮盡,是如來行。三者、佛無是念:『我今演說十二分教,利 益有情。』然由往昔慈善根力,為彼有情廣說,乃至盡未來際無有 窮盡,是如來行。四者、佛無是念:『我今往彼城邑聚落,王及大 臣、婆羅門、剎帝利、薜舍、戍達羅等舍,從其乞食。』 然由往昔 身語意行慣習力故,任運詣彼,為利益事而行乞食,是如來行。五 者、如來之身無有饑渴,亦無便利羸憊之相,雖行乞取而無所食, 亦無分別,然為任運利益有情,示有食相,是如來行。六者、佛無 是念:『此諸眾生,有上、中、下,隨彼機性而為說法。』然佛世 尊無有分別,隨其器量善應機緣,為彼說法,是如來行。七者、佛 無是念:『此類有情不恭敬我,常於我所出呵罵言,不能與彼共為 言論;彼類有情恭敬於我,常於我所共相讚歎,我當與彼共為言 說。』然而如來起慈悲心,平等無二,是如來行。八者、諸佛如來 無有愛憎、憍慢、貪惜及諸煩惱,然而如來常樂寂靜,讚歎少欲, 離諸諠閙,是如來行。九者、如來無有一法不知、不善通達,於一 切處鏡智現前無有分別。然而如來,見彼有情所作事業,隨彼意 轉,方便誘引,令得出離,是如來行。十者、如來若見一分有情得 富盛時,不生歡喜;見其衰損,不起憂慼。然而如來見彼有情修習

正行,無礙大慈自然救攝;若見有情修習邪行,無礙大悲自然救攝。是如來行。善男子!如是當知如來、應、正等覺,說有如是無邊正行。汝等當知,是謂涅槃真實之相。或時見有般涅槃者,是權方便,及留舍利令諸有情恭敬供養,皆是如來慈善根力。若供養者,於未來世,遠離八難,逢值諸佛,遇善知識,不失善心,福報無邊,速當出離,不為生死之所纏縛,如是妙行,汝等勤修,勿為放逸。」

爾時,妙幢菩薩聞佛親說不般涅槃及甚深行,合掌恭敬白言:「我今始知如來大師不般涅槃,及留舍利普益眾生,身心踊悅,歎未曾有。」說是如來壽量品時,無量無數無邊眾生,皆發無等等阿耨多羅三藐三菩提心。時四如來忽然不現,妙幢菩薩,禮佛足已,從座而起還其本處。

金光明最勝王經卷第一

大唐三藏沙門義淨奉 制譯

分別三身品第三

爾時,虛空藏菩薩摩訶薩,在大眾中從座而起,偏袒右肩,右膝著地,合掌恭敬,頂禮佛足,以上微妙金寶之花寶幢幡蓋而為供養,白佛言:「世尊!云何菩薩摩訶薩於諸如來甚深祕密,如法修行?」佛言:

「善男子!諦聽!諦聽!善思念之,吾當為汝分別解說。

「善男子!一切如來有三種身。云何為三?一者、化身,二者、應身,三者、法身。如是三身具足,攝受阿耨多羅三藐三菩提,若正了知,速出生死。云何菩薩了知化身?善男子!如來昔在修行地中,為一切眾生修種種法,如是修習至修行滿,修行力故,得大自在;自在力故,隨眾生意,隨眾生行,隨眾生界,悉皆了別,不待時,不過時,處相應,時相應,行相應,說法相應,現種種身,是名化身。善男子!云何菩薩了知應身?謂諸如來為諸菩薩得通達故,說於真諦,為令解了生死涅槃是一味故,為除身見眾生怖畏歡喜故,為無邊佛法而作本故,如實相應,如如、如如智本願力故,是身得現具三十二相、八十種好、項背圓光,是名應身。善男子!云何菩薩摩訶薩了知法身?為除諸煩惱等障,為具諸善法故,唯有如如、如如智,是名法身。前二種身,是假名有,此第三身,是真實有,為前二身而作根本。何以故?離法如如,離無分別智,一切諸佛無有別法,一切諸佛智慧具足,一切煩惱究竟滅盡,得清淨佛地,是故法如如、如如智攝一切佛法。

「復次,善男子!一切諸佛利益自他,至於究竟。自利益者,是法如如,利益他者,是如如智。能於自他利益之事,而得自在,成就種種無邊用故,是故分別一切佛法,有無量無邊種種差別。善男子!譬如依止妄想思惟,說種種煩惱,說種種業用,說種種果報。如是依法如如,依如如智,說種種佛法,說種種獨覺法,說種種聲聞法。依法如如,依如如智,一切佛法自在成就,是為第一不可思議。譬如畫空作莊嚴具,是難思議;如是依法如如,依如如智,成就佛法亦難思議。

「善男子!云何法如如、如如智二無分別,而得自在事業成就?善男子!譬如如來入於涅槃,願自在故,種種事業皆得成就;法如如、如如智自在事成,亦復如是。

「復次,菩薩摩訶薩入無心定,依前願力,從禪定起,作眾事業,如是二法無有分別,自在事成。善男子!譬如日月無有分別,亦如水鏡無有分別,光明亦無分別,三種和合得有影生。如是法如如、如如智亦無分別,以願自在故,眾生有感,現應化身,如日月影和合出現。

「復次,善男子!譬如無量無邊水鏡,依於光故,空影得現種種異相,空者即是無相。善男子!如是受化諸弟子等,是法身影,以願力故,於二種身現種種相,於法身地無有異相。善男子!依此二身,一切諸佛說有餘涅槃;依此法身,說無餘涅槃。何以故?一切餘法究竟盡故;依此三身,一切諸佛說無住處涅槃。為二身故,不住涅槃,離於法身,無有別佛。何故二身不住涅槃?二身假名不實,念念生滅,不定住故,數數出現,以不定故;法身不爾,是故二身不住涅槃,法身不二,是故不住涅槃,故依三身說無住涅槃。

「善男子!一切凡夫為三相故,有縛有障,遠離三身,不至三身。 何者為三?一者、遍計所執相,二者、依他起相,三者、成就相。 如是諸相,不能解故,不能滅故,不能淨故,是故不得至於三身。如是三相,能解、能滅、能淨故,是故諸佛具足三身。善男子!諸凡夫人未能除遣此三心故,遠離三身,不能得至。何者為三?一者、起事心,二者、依根本心,三者、根本心。依諸伏道,起事心盡;依法斷道,依根本心盡;依最勝道,根本心盡。起事心滅故,得現化身;依根本心滅故,得顯應身;根本心滅故,得至法身。是故一切如來具足三身。

「善男子!一切諸佛於第一身,與諸佛同事;於第二身,與諸佛同意;於第三身,與諸佛同體。善男子!是初佛身,隨眾生意有多種故,現種種相,是故說多。第二佛身,弟子一意,故現一相,是故說一。第三佛身,過一切種相,非執相境界,是故說名不一不二。善男子!是第一身,依於應身得顯現故;是第二身,依於法身得顯現故;是法身者,是真實有,無依處故。

「善男子!如是三身,以有義故而說於常,以有義故說於無常。化身者,恒轉法輪,處處隨緣,方便相續,不斷絕故,是故說常;非是本故,具足大用不顯現故,說為無常。應身者,從無始來,相續不斷,一切諸佛不共之法能攝持故,眾生無盡,用亦無盡,是故說常;非是本故,以具足用不顯現故,說為無常。法身者,非是行法,無有異相,是根本故,猶如虛空,是故說常。善男子!離無分別智,更無勝智,離法如如,無勝境界;是法如如,是慧如如,是三種如如,如如不一不異,是故法身慧清淨故,滅清淨故,是二清淨,是故法身具足清淨。

「復次,善男子!分別三身,有四種異:有化身非應身,有應身非化身,有化身亦應身,有非化身亦非應身。何者化身非應身?謂諸如來般涅槃後,以願自在故,隨緣利益,是名化身。何者應身非化身?是地前身。何者化身亦應身?謂住有餘涅槃之身。何者非化身非應身?謂是法身。

「善男子!是法身者,二無所有所顯現故。何者名為二無所有?於此法身相及相處,二皆是無,非有非無,非一非異,非數非非數,非明非闇。如是如如智,不見相及相處,不見非有非無,不見非一非異,不見非數非非數,不見非明非闇。是故當知境界清淨,智慧清淨,不可分別,無有中間,為滅道本故,於此法身能顯如來種種事業。

「善男子!是身因緣境界處所,果依於本,難思議故,若了此義,是身即是大乘,是如來性,是如來藏。依於此身得發初心,修行地心而得顯現,不退地心亦皆得現,一生補處心、金剛之心、如來之心而悉顯現,無量無邊如來妙法,皆悉顯現。依此法身,不可思議摩訶三昧而得顯現;依此法身,得現一切大智。是故二身依於三昧,依於智慧,而得顯現。如此法身,依於自體說常、說我,依大三昧故說於樂,依於大智故說清淨,是故如來常住自在安樂清淨。依大三昧,一切禪定首楞嚴等,一切念處、大法念等,大慈大悲一切陀羅尼、一切神通、一切自在、一切法平等攝受,如是佛法,悉皆出現。依此大智,十力、四無所畏、四無礙辯、一百八十不共之法,一切希有不可思議法,悉皆顯現。譬如依如意寶珠,無量無邊種種珍寶,悉皆得現。如是依大三昧寶,依大智慧寶,能出種種無量無邊諸佛妙法。

「善男子!如是法身三昧智慧,過一切相,不著於相,不可分別, 非常非斷,是名中道。雖有分別,體無分別。雖有三數而無三體, 不增不減,猶如夢幻,亦無所執,亦無能執,法體如如是解脫處, 過死王境,越生死闇,一切眾生不能修行、所不能至,一切諸佛菩 薩之所住處。善男子!譬如有人願欲得金,處處求覓,遂得金礦, 既得礦已,即便碎之,擇取精者,爐中銷鍊,得清淨金,隨意迴 轉,作諸鐶釧種種嚴具,雖有諸用,金性不改。

「復次,善男子!若善男子、善女人求勝解脫修行世善,得見如來 及弟子眾。得親近已,白佛言:『世尊!何者為善?何者不善?何 者正修,得清淨行?』諸佛如來及弟子眾,見彼問時,如是思惟: 『是善男子、善女人欲求清淨,欲聽正法。』即便為說,令其開 悟。彼既聞已,正念憶持,發心修行,得精進力,除嬾惰障,滅一 切罪,於諸學處,離不尊重,息掉悔心,入於初地;依初地心,除 利有情障,得入二地;於此地中,除不逼惱障,入於三地;於此地 中,除心軟淨障,入於四地;於此地中,除善方便障,入於五地; 於此地中,除見真俗障,入於六地;於此地中,除見行相障,入於 七地;於此地中,除不見滅相障,入於八地;於此地中,除不見生 相障,入於九地;於此地中,除六通障,入於十地;於此地中,除 所知障,除根本心,入如來地。如來地者,由三淨故,名極清淨。 云何為三?一者、煩惱淨,二者、苦淨,三者、相淨。譬如真金鎔 銷治鍊,既燒打已,無復塵垢,為顯金性本清淨故,金體清淨,非 謂無金。譬如濁水,澄渟清淨,無復滓穢,為顯水性本清淨故,非 謂無水。如是法身,與煩惱離,苦集除已,無復餘習,為顯佛性本 清淨故,非謂無體。譬如虛空,煙雲塵霧之所障蔽,若除屏已,是 空界淨,非謂無空。如是法身一切眾苦悉皆盡故,說為清淨,非謂 無體。譬如有人於睡夢中,見大河水漂泛其身,運手動足,截流而 渡,得至彼岸,由彼身心不懈退故,從夢覺已,不見有水彼此岸 別,非謂無心。生死妄想既滅盡已,是覺清淨,非謂無覺。如是法 界一切妄想不復生故,說為清淨,非是諸佛無其實體。

「復次,善男子!是法身者,惑障清淨能現應身,業障清淨能現化身,智障清淨能現法身。譬如依空出電,依電出光,如是依法身故,能現應身,依應身故,能現化身。由性淨故能現法身,智慧清淨能現應身,三昧清淨能現化身。此三清淨,是法如如,不異如如,一味如如,解脫如如,究竟如如,是故諸佛,體無有異。

「善男子!若有善男子、善女人說於如來是我大師。若作如是決定信者,此人即應深心解了如來之身無有別異。善男子!以是義故,於諸境界不正思惟悉皆除斷,即知彼法無有二相,亦無分別,聖所修行,如如於彼,無有二相。正修行故,如是如是一切諸障悉皆除滅,如如一切障滅。如是如是法如如、如如智得最清淨,如如法界正智清淨。如是如是一切自在,具足攝受皆得成就,一切諸障悉皆除滅。一切諸障得清淨故,是名真如正智真實之相,如是見者,是名聖見,是則名為真實見佛。何以故?如實得見法真如故,是故諸佛悉能普見一切如來。何以故?聲聞、獨覺已出三界,求真實境,不能知見,如是聖人所不知見,一切凡夫皆生疑惑,顛倒分別,不能得度,如兔浮海,必不能過。所以者何?力微劣故。凡夫之人亦復如是,不能通達法如如故。然諸如來無分別心,於一切法得大自在,具足清淨深智慧故,是自境界,不共他故。是故諸佛如來於無量無邊阿僧祇劫,不惜身命,難行苦行,方得此身,最上無比,不可思議,過言說境,是妙寂靜,離諸怖畏。

「善男子!如是知見法真如者,無生老死,壽命無限,無有睡眠,亦無飢渴,心常在定,無有散動。若於如來起諍論心,是則不能見於如來。諸佛所說,皆能利益,有聽聞者,無不解脫,諸惡禽獸、惡人、惡鬼不相逢值,由聞法故,果報無盡。然諸如來無無記事,一切境界無欲知心,生死涅槃無有異想,如來所記,無不決定。諸佛如來四威儀中,無非智攝,一切諸法無有不為慈悲所攝,無有不為利益安樂諸眾生者。

「善男子!若有善男子、善女人於此《金光明經》聽聞信解,不墮 地獄、餓鬼、傍生、阿蘇羅道,常處人天,不生下賤,恒得親近諸 佛如來,聽受正法,常生諸佛清淨國土。所以者何?由得聞此甚深 法故,是善男子、善女人則為如來已知已記,當得不退阿耨多羅三 藐三菩提。若善男子、善女人於此甚深微妙之法,一經耳者,當知 是人不謗如來,不毀正法,不輕聖眾,一切眾生未種善根,令得種故,已種善根,令增長成熟故,一切世界所有眾生皆勸修行六波羅蜜多。」

爾時虛空藏菩薩、梵釋四王諸天眾等,即從座起,偏袒右肩,合掌恭敬,頂禮佛足,白佛言:「世尊!若所在處,講說如是《金光明王》微妙經典,於其國土有四種利益。何者為四?一者、國王軍眾強盛,無諸怨敵,離於疾病,壽命延長,吉祥安樂,正法興顯。二者、中宮妃后、王子諸臣和悅無諍,離於諂佞,王所愛重。三者、沙門、婆羅門及諸國人修行正法,無病安樂,無抂死者,於諸福田悉皆修立。四者、於三時中,四大調適,常為諸天增加守護,慈悲平等,無傷害心,令諸眾生歸敬三寶,皆願修習菩提之行。是為四種利益之事。世尊!我等亦常為弘經故,隨逐如是持經之人,所在住處,為作利益。」

佛言:「善哉!善哉!善男子!如是!如是!汝等應當勤心流布此 妙經王,則令正法久住於世。」

金光明最勝王經夢見金鼓懺悔品第四

爾時,妙幢菩薩親於佛前聞妙法已,歡喜踊躍,一心思惟,還至本處。於夜夢中見大金鼓,光明晃耀猶如日輪,於此光中得見十方無量諸佛,於寶樹下坐琉璃座,無量百千大眾圍遶而為說法。見一婆羅門桴擊金鼓,出大音聲,聲中演說微妙伽他明懺悔法。妙幢聞已,皆悉憶持,繫念而住。至天曉已與無量百千大眾圍遶,將諸供具出王舍城,詣鷲峯山,至世尊所,禮佛足已布設香花,右遶三匝,退坐一面,合掌恭敬,瞻仰尊顏,白佛言:「世尊!我於夢中見婆羅門以手執桴,擊妙金鼓,出大音聲,聲中演說微妙伽他明懺悔法,我皆憶持。惟願世尊降大慈悲,聽我所說。」即於佛前,而說頌曰:

```
「我於昨夜中,
         夢見大金鼓;
其形極姝妙,
        周遍有金光。
        光明皆普耀,
猶如盛日輪,
充滿十方界,
        咸見於諸佛。
在於寶樹下,
        各處琉璃座;
無量百千眾,
        恭敬而圍繞。
有一婆羅門,
        以桴擊金鼓;
於其鼓聲內,
        說此妙伽他。
金光明鼓出妙聲,
          遍至三千大千界;
能滅三塗極重罪,
          及以人中諸苦厄。
由此金鼓聲威力,
          永滅一切煩惱障,
斷除怖畏令安隱,
          譬如自在牟尼尊。
          積行修成一切智;
佛於牛死大海中,
能令眾生覺品具,
          究竟咸歸功德海。
          普令閏者獲梵響,
由此金鼓出妙聲,
證得無上菩提果,
          常轉清淨妙法輪。
住壽不可思議劫,
          隨機說法利群生;
能斷煩惱眾苦流,
          貪瞋癡等皆除滅。
若有眾生處惡趣,
          大火猛焰周遍身;
若得聞是妙鼓音,
          即能離苦歸依佛。
皆得成就宿命智,
          能憶過去百千生;
悉皆正念牟尼尊,
          得聞如來甚深教。
          常得親折於諸佛;
中間会鼓勝妙音,
悉能捨離諸惡業,
          純修清淨諸善品。
一切天人有情類,
          殷重至誠祈願者;
          能令所求皆滿足。
得聞金鼓妙音聲,
眾牛墮在無間獄,
          猛火炎熾苦焚身;
          聞者能令苦除滅。
無有救護處輪迴,
          所有現受諸苦難;
人天餓鬼傍牛中,
得聞金鼓發妙響,
          皆蒙離苦得解脫。
現在十方界,
        常住兩足尊;
願以大悲心,
        哀愍憶念我。
眾生無歸依,
        亦無有救護;
        能作大歸依。
為如是等類,
        極重諸惡業;
我先所作罪,
        至心皆懺悔。
今對十力前,
我不信諸佛,
        亦不敬尊親,
        常造諸惡業。
不務修眾善,
```

或自恃尊高, 種姓及財位, 盛年行放逸, 常造諸惡業。 心恒起邪念, 口陳於惡言, 不見於過罪, 常造諸惡業。 無明闇覆心, 恒作愚夫行, 隨順不善友, 常浩諸惡業。 或因諸戲樂, 或復懷憂惱, 故我浩諸惡。 為貪瞋所纏, 親折不善人, 及由慳嫉意, 故我造諸惡。 貧窮行諂誑, 雖不樂眾過, 由有怖畏故, 及不得自在, 故我浩諸惡。 或為躁動心, 或因瞋恚恨, 及以飢渴惱, 故我造諸惡。 由飲食衣服, 及貪愛女人, 煩惱火所燒, 故我造諸惡。 不生恭敬心, 於佛法僧眾, 作如是眾罪, 我今悉懺悔。 於獨覺菩薩, 亦無恭敬心, 作如是眾罪, 我今悉懺悔。 不孝於父母, 無知謗正法, 作如是眾罪, 我今悉懺悔。 由愚癡憍慢, 及以貪瞋力, 作如是眾罪, 我今悉懺悔。 我於十方界, 供養無數佛; 當願拔眾生, 令離諸苦難。 願一切有情, 皆令住十地; 成佛導群迷。 福智圓滿已, 我為諸眾生, 苦行百千劫; 以大智慧力, 皆令出苦海。 我為諸含識, 演說甚深經, 最勝金光明, 能除諸惡業。 造諸極重罪; 若人百千劫, 暫時能發露, 眾惡盡消除。 依此金光明, 作如是懺悔; 由斯能速盡, 一切諸苦業。 勝定百千種, 不思議總持, 修習常無倦。 根力覺道支,

我當至十地, 具足珍寶處, 濟渡生死流。 圓滿佛功德, 我於諸佛海, 甚深功德藏, 妙智難思議, 皆令得具足。 唯願十方佛, 觀察護念我; 皆以大悲心, 哀受我懺悔。 我於多劫中, 所造諸惡業; 由斯生苦惱, 哀愍願消除。 常生憂怖心; 我浩諸惡業, 於四威儀中, 曾無歡樂想。 諸佛具大悲, 能除眾生怖; 今得離憂苦。 願受我懺悔, 我有煩惱障, 及以諸報業; 洗濯令清淨。 願以大悲水, 我先作諸罪, 及現浩惡業; 至心皆發露, 咸願得蠲除。 防護令不起; 未來諸惡業, 設令有違者, 終不敢覆藏。 身三語四種, 意業復有三; 繋縛諸有情, 無始恒相續。 由斯三種行, 造作十惡業, 我今皆懺悔。 如是眾多罪, 苦報當自受; 我造諸惡業, 今於諸佛前, 至誠皆懺悔。 於此贍部洲, 及他方世界; 今我皆隨喜。 所有諸善業, 願離十惡業, 修行十善道; 安住十地中, 常見十方佛。 所修福智業; 我以身語意, 速成無上慧。 願以此善根, 發露眾多苦難事; 我今親對十力前, 恒造極重惡業難, 我所積集欲邪難, 常起貪愛流轉難, 於此世間耽著難, 一切愚夫煩惱難, 狂心散動顛倒難, 及以親近惡友難, 於生死中貪染難, 瞋癡闇鈍造罪難, 未曾積集功德難, 生八無暇惡處難, 我今皆於最勝前, 懺悔無邊罪惡業。

我今歸依諸善逝, 如大金山照十方, 身色金光淨無垢, 吉祥威德名稱尊, 佛日光明常普遍, 牟尼月照極清涼, 三十二相遍莊嚴, 福德難思無與等, 色如琉璃淨無垢, 妙頗梨網映金驅, 於生死苦瀑流內, 如是苦海難堪忍, 我今稽首一切智, 光明晃耀紫金身, 如大海水量難知, 如妙高山巨稱量, 諸佛功德亦如是, 於無量劫諦思惟, 盡此大地諸山岳, 毛端渧海尚可量, 一切有情皆共讚, 清淨相好妙莊嚴, 我之所有眾善業, 廣說正法利群生, 降伏大力魔軍眾, 久住劫數難思議, 猶如過去諸最勝, 滅諸貪欲及瞋癡, 願我常得宿命智, 亦常憶念牟尼尊, 願我以斯諸善業, 遠離一切不善因, 一切世界諸眾生, 所有諸根不具足, 若有眾生遭病苦, 咸令病苦得消除, 若犯王法當刑戮, 彼受如斯極苦時,

我禮德海無上尊; 唯願慈悲哀攝受。 目如清淨紺琉璃; 大悲慧日除眾闇。 善淨無垢離諸塵; 能除眾牛煩惱熱。 八十隨好皆圓滿; 如日流光照世間。 猶如滿月處虛空; 種種光明以嚴飾。 老病憂愁水所漂; 佛日舒光今永竭。 三千世界希有尊, 種種妙好皆嚴飾。 大地微塵不可數, 亦如虚空無有際。 一切有情不能知, 無有能知德海岸。 析如微塵能算知, 佛之功德無能數。 世尊名稱諸功德, 不可稱量知分齊。 願得速成無上尊, 悉令解脫於眾苦。 當轉無上正法輪; 充足眾生甘露味。 六波羅蜜皆圓滿; 降伏煩惱除眾苦。 能憶過去百千生; 得聞諸佛甚深法。 奉事無邊最勝尊; 恒得修行真妙法。 悉皆離苦得安樂; 今彼身相皆圓滿。 身形羸瘦無所依; 諸根色力皆充滿。 眾苦逼迫牛憂惱; 無有歸依能救護。

若受鞭杖枷鎖繫, 種種苦具切其身; 無量百千憂惱時, 逼迫身心無暫樂。 皆令得免於繋縛, 及以鞭杖苦楚事; 將臨刑者得命全, 眾苦皆令永除盡。 今得種種殊勝味; 若有眾牛飢渴逼, 盲者得視聾者聞, 跛者能行症能語。 貧窮眾生獲寶藏, 倉庫盈溢無所乏; 皆令得受上妙樂, 無一眾生受苦惱。 一切人天皆樂見, 容儀溫雅甚端嚴; 受用豐饒福德具。 悉皆現受無量樂, 隨彼眾生念伎樂, 眾妙音聲皆現前; 念水即現清涼池, 金色蓮花汎其上。 隨彼眾生心所念, 飲食衣服及床敷; 金銀珍寶妙琉璃, 瓔珞莊嚴皆具足。 勿令眾生聞惡響, 亦復不見有相違; 所受容貌悉端嚴, 各各慈心相愛樂。 隨心念時皆滿足; 世間資生諸樂具, 分布施與諸眾生。 所得珍財無悋惜, 燒香末香及塗香, 眾妙雜花非一色; 每日三時從樹墮, 隨心受用牛歡喜。 普願眾生咸供養, 十方一切最勝尊; 三乘清淨妙法門, 菩薩獨覺聲聞眾。 不墮無暇八難中; 常願勿處於卑賤, 生在有暇人中尊, 恒得親承十方佛。 願得常生富貴家, 財寶倉庫皆盈滿; 顏貌名稱無與等, 壽命延長經劫數。 勇健聰明多智慧; 悉願女人變為男, 一切常行菩薩道, 勤修六度到彼岸。 寶王樹下而安處; 常見十方無量佛, 處妙琉璃師子座, 恒得親承轉法輪。 若於過去及現在, 輪迴三有造諸業; 能招可厭不善趣, 願得消滅永無餘。 一切眾生於有海, 牛死羂網堅牢縛; 願以智劍為斷除, 離苦凍證菩提處。 或於他方世界中; 眾生於此膽部內, 我今皆悉生隨喜。 所作種種勝福天, 以此隨喜福德事, 及身語意造眾善; 願此勝業常增長, 速證無上大菩提。

深心清淨無瑕穢; 所有禮讚佛功德, 迴向發願福無邊, 當超惡趣六十劫。 若有男子及女人, 婆羅門等諸勝族; 合掌一心讚歎佛, 生生常憶宿世事。 殊勝功德皆成就; 諸根清淨身圓滿, 願於未來所生處, 常得人天共瞻仰。 非於一佛十佛所, 修諸善根今得聞; 百千佛所種善根, 方得聞斯懺悔法。」

爾時世尊聞此說已,讚妙幢菩薩言:「善哉!善哉!善男子!如汝所夢,金鼓出聲讚歎如來真實功德,并懺悔法;若有聞者,獲福甚多,廣利有情,滅除罪障。汝今應知此之勝業,皆是過去讚歎發願,宿習因緣,及由諸佛威力加護,此之因緣,當為汝說。」時諸大眾聞是法已,咸皆歡喜,信受奉行。

金光明最勝王經卷第二

大唐三藏沙門義淨奉 制譯

滅業障品第五

爾時,世尊住正分別,入於甚深微妙靜慮,從身毛孔放大光明,無量百千種種諸色,諸佛剎土悉現光中,十方恒河沙校量譬喻所不能及。五濁惡世為光所照,是諸眾生,作十惡業、五無間罪、誹謗三寶、不孝尊親、輕慢師長婆羅門眾,應墮地獄、餓鬼、傍生,彼各蒙光至所住處,是諸有情見斯光已,因光力故,皆得安樂,端正姝妙,色相具足,福智莊嚴,得見諸佛。是時帝釋一切天眾,及恒河女神并諸大眾,蒙光希有,皆至佛所,右遶三匝,退坐一面。

爾時,天帝釋承佛威力,即從座起,偏袒右肩,右膝著地,合掌向佛。而白佛言:「世尊!云何善男子、善女人願求阿耨多羅三藐三菩提,修行大乘,攝受一切邪倒有情,曾所造作業障罪者,云何懺悔,當得除滅?」

佛告天帝釋:「善哉!善哉!善男子!汝今修行,欲為無量無邊眾生,令得清淨解脫安樂,哀愍世間,福利一切。若有眾生由業障故,造諸罪者,應當策勵,晝夜六時,偏袒右肩,右膝著地,合掌恭敬,一心專念,口自說言:『歸命頂禮現在十方一切諸佛,已得阿耨多羅三藐三菩提者,轉妙法輪,持照法輪,兩大法兩,擊大法鼓,吹大法螺,建大法幢,秉大法炬。為欲利益安樂諸眾生故,常行法施,誘進群迷,令得大果,證常樂故。如是等諸佛世尊,以身、語、意稽首歸誠,至心禮敬。彼諸世尊以真實慧,以真實眼,真實證明,真實平等,悉知悉見一切眾生善惡之業。我從無始生死以來,隨惡流轉,共諸眾生造業障罪,為貪、瞋、癡之所纏縛。未識佛時,未識法時,未識僧時,未識善惡,由身、語、意造無間

罪,惡心出佛身血,誹謗正法,破和合僧,殺阿羅漢,殺害父母。 身三、語四、意三種行,造十惡業,自作、教他、見作隨喜。於諸 善人,横生毁謗,斗秤欺誑,以偽為直,不淨飲食施與一切,於六 道中所有父母更相惱害。或盜窣堵波物、四方僧物、現前僧物自在 而用,世尊法律不樂奉行,師長教示不相隨順。見行聲聞、獨**覺、** 大乘行者,喜生罵辱,今諸行人心生悔惱。見有勝己,便懷嫉妬, 法施、財施常生慳惜,無明所覆,邪見惑心,不修善因,令惡增 長,於諸佛所而起誹謗,法說非法,非法說法。如是眾罪,佛以真 實慧,真實眼,真實證明,真實平等,悉知悉見。我今歸命,對諸 佛前,皆悉發露,不敢覆藏,未作之罪更不復作,已作之罪今皆懺 悔。所作業障,應墮惡道、地獄、傍生、餓鬼之中、阿蘇羅眾及八 難處,願我此生所有業障皆得消滅,所有惡報未來不受。亦如過去 諸大菩薩修菩提行,所有業障悉已懺悔,我之業障今亦懺悔,皆悉 發露,不敢覆藏,已作之罪願得除滅,未來之惡更不敢造。亦如未 來諸大菩薩修菩提行,所有業障悉皆懺悔,我之業障今亦懺悔,皆 悉發露,不敢覆藏,已作之罪願得除滅,未來之惡更不敢造。亦如 現在十方世界諸大菩薩修菩提行,所有業障悉已懺悔,我之業障今 亦懺悔,皆悉發露,不敢覆藏,已作之罪願得除滅,未來之惡更不 敢造。』

「善男子!以是因緣,若有造罪,一剎那中,不得覆藏,何況一日 一夜,乃至多時。若有犯罪欲求清淨,心懷愧恥,信於未來必有惡 報,生大恐怖,應如是懺。如人被火燒頭燒衣,救令速滅,火若未 滅,心不得安;若人犯罪亦復如是,即應懺悔,令速除滅。若有願 生富樂之家,多饒財寶,復欲發意修習大乘,亦應懺悔,滅除業 障。欲生豪貴婆羅門種、剎帝利家,及轉輪王七寶具足,亦應懺 悔,滅除業障。 「善男子!若有欲生四天王眾天、三十三天、夜摩天、覩史多天、 樂變化天、他化自在天,亦應懺悔,滅除業障。若欲生梵眾、梵 輔、大梵天、少光、無量光、極光淨天、少淨、無量淨、遍淨天、 無雲、福生、廣果天、無煩、無熱、善現、善見、色究竟天,亦應 懺悔,滅除業障。若欲求預流果、一來果、不還果、阿羅漢果,亦 應懺悔,滅除業障。若欲願求三明六通、聲聞、獨覺自在菩提,至 究竟地,求一切智智、淨智、不思議智、不動智、三藐三菩提正遍 智者,亦應懺悔,滅除業障。何以故?善男子!一切諸法從因緣 生,如來所說,異相生,異相滅,因緣異故。如是過去諸法皆已滅 盡,所有業障無復遺餘,是諸行法未得現生而今得生,未來業障更 不復起。何以故?善男子!一切法空,如來所說無有我、人、眾 生、壽者,亦無生滅,亦無行法。善男子!一切諸法皆依於本,亦 不可說。何以故?過一切相故。若有善男子、善女人,如是入於微 妙真理,生信敬心,是名無眾生而有於本,以是義故,說於懺悔, 滅除業障。

「善男子!若人成就四法,能除業障,永得清淨。云何為四?一者、不起邪心,正念成就,二者、於甚深理不生誹謗,三者、於初 行菩薩起一切智心,四者、於諸眾生起慈無量,是謂為四。」

爾時世尊而說頌言:

「專心護三業, 不誹謗深法; 作一切智想, 慈心淨業障。

「善男子!有四業障難可滅除。云何為四?一者、於菩薩律儀犯極重惡,二者、於大乘經心生誹謗,三者、於自善根不能增長,四者、貪著三有,無出離心。復有四種對治業障。云何為四?一者、於十方世界一切如來,至心親近,說一切罪;二者、為一切眾生勸

請諸佛說深妙法;三者、隨喜一切眾生所有功德;四者、所有一切功德善根,悉皆迴向阿耨多羅三藐三菩提。」

爾時,天帝釋白佛言:「世尊!世間所有男子女人,於大乘行有能行者,有不行者,云何能得隨喜一切眾生功德善根?」

佛言:「善男子!若有眾生雖於大乘未能修習,然於書夜六時,偏 袒右肩,右膝著地,合掌恭敬,一心專念,作隨喜時,得福無量。 應作是言: 『十方世界一切眾生,現在修行施、戒、心、慧,我今 皆悉深生隨喜。』由作如是隨喜福故,必當獲得尊重殊勝無上無等 最妙之果。如是過去、未來一切眾生,所有善根皆悉隨喜。又於現 在初行菩薩發菩提心所有功德,過百大劫行菩薩行,有大功德獲無 生忍,至不退轉、一生補處,如是一切功德之蘊,皆悉至心隨喜讚 歎。過去、未來一切菩薩,所有功德隨喜讚歎亦復如是。復於現在 十方世界一切諸佛、應、正遍知證妙菩提,為度無邊諸眾生故,轉 無上法輪,行無礙法施,擊法鼓,吹法螺,建法幢,雨法雨,哀愍 勸化一切眾生,咸令信受,皆蒙法施,悉得充足無盡安樂。又復所 有菩薩、聲聞、獨覺功德積集善根,若有眾生未具如是諸功德者, 悉令具足,我皆隨喜。如是過去、未來諸佛、菩薩、聲聞、獨覺所 有功德,亦皆至心隨喜讚歎。善男子!如是隨喜,當得無量功德之 聚,如恒河沙三千大千世界所有眾生,皆斷煩惱,成阿羅漢。若有 善男子、善女人盡其形壽,常以上妙衣服、飲食、臥具、醫藥而為 供養,如是功德,不及如前隨喜功德千分之一。何以故?供養功德 有數有量,不攝一切諸功德故,隨喜功德無量無數,能攝三世一切 功德。是故若人欲求增長勝善根者,應修如是隨喜功德。若有女 人,願轉女身為男子者,亦應修習隨喜功德,必得隨心現成男 子。」

爾時,天帝釋白佛言:「世尊!已知隨喜功德,勸請功德惟願為說,欲令未來一切菩薩當轉法輪,現在菩薩正修行故。」

佛告帝釋:「若有善男子、善女人願求阿耨多羅三藐三菩提者,應 當修行聲聞、獨覺、大乘之道。是人當於書夜六時,如前威儀,一 心專念,作如是言:『我今歸依十方一切諸佛世尊,已得阿耨多羅 三藐三菩提,未轉無上法輪,欲捨報身入涅槃者,我皆至誠頂禮勸 請轉大法輪,雨大法雨,然大法燈,照明理趣,施無礙法,莫般涅 槃,久住於世,度脫安樂一切眾生,如前所說乃至無盡安樂。我今 以此勸請功德,迴向阿耨多羅三藐三菩提,如過去、未來、現在諸 大菩薩勸請功德廻向菩提,我亦如是勸請功德廻向無上正等菩 提。』善男子!假使有人以三千大千世界滿中七寶供養如來,若復 有人勸請如來轉大法輪所得功德,其福勝彼。何以故?彼是財施, 此是法施。善男子!且置三千大千世界七寶布施,若人以滿恒河沙 數大千世界七寶,供養一切諸佛,勸請功德亦勝於彼,由其法施有 五勝利。云何為五?一者、法施兼利自他,財施不爾;二者、法施 能令眾生出於三界,財施之福不出欲界;三者、法施能淨法身,財 施但唯增長於色;四者、法施無窮,財施有盡;五者、法施能斷無 明,財施唯伏貪愛。是故,善男子!勸請功德無量無邊,難可譬 喻。如我昔行菩薩道時,勸請諸佛轉大法輪,由彼善根,是故今日 一切帝釋、諸梵王等,勸請於我轉大法輪。善男子!請轉法輪,為 欲度脫安樂諸眾生故。我於往昔為菩提行,勸請如來久住於世,莫 般涅槃;依此善根,我得十力、四無所畏、四無礙辯、大慈大悲, 證得無數不共之法,我當入於無餘涅槃,我之正法久住於世。我法 身者清淨無比,種種妙相,無量智慧,無量自在,無量功德,難可 思議,一切眾生皆蒙利益,百千萬劫說不能盡。法身攝藏一切諸 法,一切諸法不攝法身。法身常住,不墮常見,雖復斷滅,亦非斷 見。能破眾生種種異見,能生眾生種種真見,能解一切眾生之縛, 無縛可解,能植眾生諸善根本,未成熟者令成熟,已成熟者令解 脫。無作無動,遠離閨閣,寂靜無為,自在安樂,過於三世,能現 三世;出於聲聞、獨覺之境,諸大菩薩之所修行,一切如來體無有 異,此等皆由勸請功德善根力故,如是法身我今已得。是故若有欲

得阿耨多羅三藐三菩提者,於諸經中一句一頌為人解說,功德善根尚無限量,何況勸請如來轉大法輪,久住於世,莫般涅槃。」

時天帝釋,復白佛言:「世尊!若善男子、善女人為求阿耨多羅三 藐三菩提故,修三乘道所有善根,云何迴向一切智智?」

佛告天帝:「善男子!若有眾生欲求菩提,修三乘道,所有善根願 迴向者,當於晝夜六時,慇重至心作如是說:『我從無始生死以 來,於三寶所,修行成就所有善根,乃至施與傍生一摶之食,或以 善言和解諍訟,或受三歸及諸學處,或復懺悔、勸請、隨喜所有善 根,我今作意悉皆攝取,迴施一切眾生,無悔恪心。是解脫分善根 所攝,如佛世尊之所知見,不可稱量無礙清淨,如是所有功德善 根,悉以迴施一切眾生,不住相心,不捨相心。我亦如是功德善 根,悉以迴施一切眾生,願皆獲得如意之手,捣空出寶,滿眾生 願,富樂無盡,智慧無窮,妙法辯才,悉皆無滯,共諸眾生同證阿 耨多羅三藐三菩提,得一切智。因此善根更復出生無量善法,亦皆 迴向無上菩提。又如過去諸大菩薩,修行之時功德善根,悉皆迴向 一切種智,現在、未來亦復如是。然我所有功德善根,亦皆迴向阿 耨多羅三藐三菩提,是諸善根,願共一切眾生俱成正覺。如餘諸 佛, 坐於道場菩提樹下, 不可思議無礙清淨, 住於無盡法藏陀羅尼 首楞嚴定,破魔波旬無量兵眾,應見覺知,應可通達,如是一切, 一剎那中悉皆照了,於後夜中獲甘露法,證甘露義,我及眾生願皆 同證如是妙覺。猶如無量壽佛、勝光佛、妙光佛、阿閦佛、功德善 光佛、師子光明佛、百光明佛、網光明佛、寶相佛、寶焰佛、焰明 佛、焰盛光明佛、吉祥上王佛、微妙聲佛、妙莊嚴佛、法幢佛、上 勝身佛、可愛色身佛、光明遍照佛、梵淨王佛、上性佛,如是等如 來、應、正遍知,過去、未來及以現在示現應化、得阿耨多羅三藐 三菩提,轉無上法輪為度眾生,我亦如是。』廣說如上。

「善男子!若有淨信男子、女人,於此《金光明最勝王經·滅業障品》,受持讀誦,憶念不忘,為他廣說,得無量無邊大功德聚。譬如三千大千世界所有眾生,一時皆得成就人身,得人身已,成獨覺道。若有善男子、善女人,盡其形壽恭敬尊重,四事供養一一獨覺,各施七寶如須彌山,此諸獨覺入涅槃後,皆以珍寶起塔供養,其塔高廣十二瑜繕那,以諸花香寶幢幡蓋常為供養。善男子!於意云何?是人所獲功德寧為多不?」

天帝釋言:「甚多。世尊!」

「善男子!若復有人於此《金光明》微妙經典,眾經之王〈滅業障 品〉,受持讀誦,憶念不忘,為他廣說,所獲功德於前所說供養功 德,百分不及一,百千萬億分,乃至校量譬喻所不能及。何以故? 是善男子、善女人住正行中,勸請十方一切諸佛轉無上法輪,皆為 諸佛歡喜讚歎。善男子!如我所說,一切施中,法施為勝。是故, 善男子!於三寶所,設諸供養,不可為比。勸受三歸,持一切戒, 無有毀犯,三業不空,不可為比。一切世界一切眾生,隨力隨能, 隨所願樂,於三乘中勸發菩提心,不可為比。於三世中一切世界, 所有眾生皆得無礙,速令成就無量功德,不可為比。三世剎土一切 眾生,令無障礙,得三菩提,不可為比。三世剎土一切眾生,勸令 速出四惡道苦,不可為比。三世剎土一切眾生,勸令除滅極重惡 業,不可為比。一切苦惱勸令解脫,不可為比。一切怖畏苦惱逼 切,皆令得脫,不可為比。三世佛前,一切眾生所有功德,勸令隨 喜,發菩提願,不可為比。勸除惡行罵辱之業,一切功德皆願成 就,所在生中,勸請供養尊重讚歎一切三寶,勸請眾生淨修福行, 成滿菩提,不可為比。是故當知,勸請一切世界三世三寶,勸請滿 足六波羅蜜,勸請轉於無上法輪,勸請住世經無量劫,演說無量甚 深妙法,功德甚深,無能比者。」

爾時,天帝釋及恒河女神、無量梵王、四大天眾從座而起,偏袒右肩,右膝著地,合掌頂禮。白佛言:「世尊!我等皆得聞是《金光明最勝王經》,今悉受持讀誦通利,為他廣說,依此法住。何以故?世尊!我等欲求阿耨多羅三藐三菩提,隨順此義種種勝相,如法行故。」爾時梵王及天帝釋等,於說法處皆以種種曼陀羅花而散佛上,三千大千世界地皆大動,一切天鼓及諸音樂不鼓自鳴,放金色光,遍滿世界,出妙音聲。時天帝釋白佛言:「世尊!此等皆是《金光明經》威神之力,慈悲普救種種利益,種種增長菩薩善根,滅諸業障。」

佛言:「如是!如是!如汝所說。何以故?善男子!我念往昔過無量百千阿僧祇劫,有佛名寶王大光照如來、應、正遍知,出現於世,住世六百八十億劫。爾時寶王大光照如來,為欲度脫人天、釋梵、沙門、婆羅門一切眾生,令安樂故,當出現時,初會說法度百千億億萬眾,皆得阿羅漢果,諸漏已盡,三明六通自在無礙。於第二會,復度九十千億億萬眾,皆得阿羅漢果,諸漏已盡,三明六通自在無礙。於第三會,復度九十八千億億萬眾,皆得阿羅漢果,圓滿如上。

「善男子!我於爾時作女人身,名福寶光明,於第三會親近世尊, 受持讀誦是《金光明經》,為他廣說,求阿耨多羅三藐三菩提故。 時彼世尊為我授記:『此福寶光明女,於未來世當得作佛,號釋迦 牟尼如來、應供、正遍知、明行足、善逝、世間解、無上士、調御 丈夫、天人師、佛、世尊。』捨女身後,從是以來,越四惡道,生 人天中,受上妙樂,八十四百千生作轉輪王,至于今日得成正覺, 名稱普聞,遍滿世界。」時會大眾忽然皆見寶王大光照如來,轉無 上法輪,說微妙法。

「善男子!去此索訶世界,東方過百千恒河沙數佛土,有世界名寶莊嚴,其寶王大光照如來,今現在彼,未般涅槃,說微妙法,廣化

群生,汝等見者,即是彼佛。

「善男子!若有善男子、善女人,聞是寶王大光照如來名號者,於菩薩地得不退轉,至大涅槃。若有女人聞是佛名者,臨命終時,得見彼佛來至其所,既見佛已,究竟不復更受女身。

「善男子!是《金光明》微妙經典種種利益,種種增長菩薩善根,滅諸業障。善男子!若有苾芻、苾芻尼、鄔波索迦、鄔波斯迦,隨在何處,為人講說是《金光明》微妙經典,於其國土皆獲四種福利善根。云何為四?一者、國王無病,離諸災厄;二者、壽命長遠,無有障礙;三者、無諸怨敵,兵眾勇健;四者、安隱豐樂,正法流通。何以故?如是人王,常為釋梵四王、藥叉之眾共守護故。」

爾時,世尊告天眾曰:「善男子!是事實不?」

是時無量釋梵四王及藥叉眾,俱時同聲答世尊言:「如是!如是!若有國土講宣讀誦此妙經王,是諸國主,我等四王常來擁護,行住共俱,其王若有一切災障及諸怨敵,我等四王皆使消殄,憂愁疾疫亦令除差,增益壽命,感應禎祥,所願遂心,恒生歡喜,我等亦能令其國中所有軍兵悉皆勇健。」

佛言:「善哉!善哉!善男子!如汝所說,汝當修行。何以故?是 諸國主,如法行時,一切人民隨王修習如法行者,汝等皆蒙色力勝 利,宮殿光明,眷屬強盛。」

時釋梵等白佛言:「如是,世尊!」

佛言:「若有講讀此妙經典流通之處,於其國中大臣輔相,有四種益。云何為四?一者、更相親穆,尊重愛念;二者、常為人王心所愛重,亦為沙門、婆羅門、大國小國之所遵敬;三者、輕財重法,不求世利,嘉名普暨,眾所欽仰;四者、壽命延長,安隱快樂;是

名四種利益。若有國土宣說是經,沙門、婆羅門得四種勝利。云何 為四?一者、衣服、飲食、臥具、醫藥無所乏少;二者、皆得安 心,思惟讀誦;三者、依於山林,得安樂住;四者、隨心所願,皆 得滿足;是名四種勝利。若有國土,宣說是經,一切人民皆得豐 樂,無諸疾疫,商估往還,多獲寶貨,具足勝福,是名種種功德利 益。」

爾時,梵釋四天王及諸大眾白佛言:「世尊!如是經典甚深之義,若現在者,當知如來三十七種助菩提法住世未滅,若是經典滅盡之時,正法亦滅。」

佛言:「如是!如是!善男子!是故汝等於此《金光明經》,一句、一頌、一品、一部,皆當一心正讀誦、正聞持、正思惟、正修習,為諸眾生廣宣流布,長夜安樂,福利無邊。」

時諸大眾,聞佛說已,咸蒙勝益,歡喜受持。

金光明最勝王經卷第三

大唐三藏沙門義淨奉 制譯

最淨地陀羅尼品第六

爾時,師子相無礙光焰菩薩,與無量億眾,從座而起,偏袒右肩,右膝著地,合掌恭敬,頂禮佛足,以種種花香寶幢幡蓋而供養已,白佛言:「世尊!以幾因緣得菩提心?何者是菩提心?世尊!即於菩提,現在心不可得,未來心不可得,過去心不可得。離於菩提,菩提心亦不可得。菩提者,不可言說,心亦無色無相,無有事業,非可造作,眾生亦不可得,亦不可知。世尊!云何諸法甚深之義而可得知?」

佛言:「善男子!如是!如是!菩提微妙,事業、造作皆不可得。若離菩提,菩提心亦不可得。菩提者,不可說,心亦不可說,無色相,無事業,一切眾生亦不可得。何以故?菩提及心,同真如故,能證所證,皆平等故,非無諸法而可了知。善男子!菩薩摩訶薩如是知者,乃得名為通達諸法,善說菩提及菩提心。菩提心者,非過去,非未來,非現在。心亦如是,眾生亦如是,於中二相,實不可得。何以故?以一切法皆無生故,菩提不可得,菩提名亦不可得,眾生、眾生名不可得,聲聞、聲聞名不可得,獨覺、獨覺名不可得,菩薩、菩薩名不可得,佛、佛名不可得,行、非行不可得,行、非行名不可得。以不可得故,於一切寂靜法中而得安住,此依一切功德善根而得生起。

「善男子!譬如寶須彌山王饒益一切,此菩提心利眾生故,是名第一布施波羅蜜因。善男子!譬如大地持眾物故,是名第二持戒波羅蜜因。譬如師子有大威力,獨步無畏,離驚恐故,是名第三忍辱波羅蜜因。譬如風輪那羅延力,勇壯速疾,心不退故,是名第四勤策

波羅蜜因。譬如七寶樓觀有四階道,清涼之風來吹四門,受安隱樂,靜慮法藏求滿足故,是名第五靜慮波羅蜜因。譬如日輪光耀熾盛,此心速能破滅生死無明闇故,是名第六智慧波羅蜜因。譬如商主能令一切心願滿足,此心能度生死險道,獲功德寶故,是名第七方便勝智波羅蜜因。譬如淨月圓滿無翳,此心能於一切境界清淨具足故,是名第八願波羅蜜因。譬如轉輪聖王主兵寶臣隨意自在,此心善能莊嚴淨佛國土,無量功德廣利群生故,是名第九力波羅蜜因。譬如虛空及轉輪聖王,此心能於一切境界無有障礙,於一切處皆得自在至灌頂位故,是名第十智波羅蜜因。善男子!是名菩薩摩訶薩十種菩提心因,如是十因,汝當修學。

「善男子!依五種法,菩薩摩訶薩成就布施波羅蜜。云何為五?一者、信根;二者、慈悲;三者、無求欲心;四者、攝受一切眾生; 五者、願求一切智智。善男子!是名菩薩摩訶薩成就布施波羅蜜。

「善男子!復依五法,菩薩摩訶薩成就持戒波羅蜜。云何為五?一者、三業清淨;二者、不為一切眾生作煩惱因緣;三者、閉諸惡道,開善趣門;四者、過於聲聞、獨覺之地;五者、一切功德皆悉滿足。善男子!是名菩薩摩訶薩成就持戒波羅蜜。

「善男子!復依五法,菩薩摩訶薩成就忍辱波羅蜜。云何為五?一者、能伏貪、瞋煩惱;二者、不惜身命,不求安樂止息之想;三者、思惟往業,遭苦能忍;四者、發慈悲心成就眾生諸善根故;五者、為得甚深無生法忍。善男子。是名菩薩摩訶薩成就忍辱波羅蜜。

「善男子!復依五法,菩薩摩訶薩成就勤策波羅蜜。云何為五?一者、與諸煩惱不樂共住;二者、福德未具不受安樂;三者、於諸難 行苦行之事不生厭心;四者、以大慈悲攝受利益,方便成熟一切眾 生;五者、願求不退轉地。善男子!是名菩薩摩訶薩成就勤策波羅 蜜。

「善男子!復依五法,菩薩摩訶薩成就靜慮波羅蜜。云何為五?一者、於諸善法攝令不散故;二者、常願解脫,不著二邊故;三者、願得神通成就眾生諸善根故;四者、為淨法界,蠲除心垢故;五者、為斷眾生煩惱根本故。善男子!是名菩薩摩訶薩成就靜慮波羅蜜。

「善男子!復依五法,菩薩摩訶薩成就智慧波羅蜜。云何為五?一者、常於一切諸佛菩薩及明智者,供養親近,不生厭背;二者、諸佛如來說甚深法,心常樂聞,無有厭足;三者、真俗勝智,樂善分別;四者、見修煩惱,咸速斷除;五者、世間伎術五明之法,皆悉通達。善男子!是名菩薩摩訶薩成就智慧波羅蜜。

「善男子!復依五法,菩薩摩訶薩成就方便波羅蜜。云何為五?一者、於一切眾生意樂煩惱心行差別悉皆通達;二者、無量諸法對治之門,心皆曉了;三者、大慈悲定,出入自在;四者、於諸波羅蜜多,皆願修行,成就滿足;五者、一切佛法,皆願了達,攝受無遺。善男子!是名菩薩摩訶薩成就方便勝智波羅蜜。

「善男子!復依五法,菩薩摩訶薩成就願波羅蜜。云何為五?一者、於一切法從本以來,不生不滅,非有非無,心得安住;二者、觀一切法最妙理趣,離垢清淨,心得安住;三者、過一切想,是本真如,無作無行,不異不動心得安住;四者、為欲利益諸眾生事,於俗諦中,心得安住;五者、於奢摩他、毘鉢舍那,同時運行,心得安住。善男子!是名菩薩摩訶薩成就願波羅蜜。

「善男子!復依五法,菩薩摩訶薩成就力波羅蜜。云何為五?一者、以正智力,能了一切眾生心行善惡;二者、能令一切眾生入於

甚深微妙之法;三者、一切眾生輪迴生死,隨其緣業,如實了知; 四者、於諸眾生,三種根性,以正智力,能分別知;五者、於諸眾 生,如理為說,令種善根,成熟度脫,皆是智力故。善男子!是名 菩薩摩訶薩成就力波羅蜜。

「善男子!復依五法,菩薩摩訶薩成就智波羅蜜。云何為五?一者、能於諸法,分別善惡;二者、於黑白法,遠離攝受;三者、能於生死涅槃,不厭不喜;四者、具福智行,至究竟處;五者、受勝灌頂,能得諸佛不共法等,及一切智智。善男子!是名菩薩摩訶薩成就智波羅蜜。

「善男子!何者是波羅蜜義?所謂修習勝利,是波羅蜜義;滿足無量大甚深智,是波羅蜜義;行非行法,心不執著,是波羅蜜義;生死過失,涅槃功德,正覺正觀,是波羅蜜義;愚人智人皆悉攝受,是波羅蜜義;能現種種珍妙法寶,是波羅蜜義;無礙解脫,智慧滿足,是波羅蜜義;法界、眾生界正分別知,是波羅蜜義;施等及智,能令至不退轉,是波羅蜜義;無生法忍,能令滿足,是波羅蜜義;一切眾生功德善根,能令成熟,是波羅蜜義;能於菩提成佛十力、四無所畏、不共法等,皆悉成就,是波羅蜜義;生死涅槃,了無二相,是波羅蜜義;濟度一切,是波羅蜜義;一切外道來相語難,善能解釋,令其降伏,是波羅蜜義;能轉十二妙行法輪,是波羅蜜義;無所著、無所見、無患累,是波羅蜜多義。

「善男子!初地菩薩是相先現,三千大千世界,無量無邊種種寶藏,無不盈滿,菩薩悉見。善男子!二地菩薩是相先現,三千大千世界地平如掌,無量無邊種種妙色,清淨珍寶莊嚴之具,菩薩悉見。善男子!三地菩薩是相先現,自身勇健,甲仗莊嚴,一切怨賊,皆能摧伏,菩薩悉見。善男子!四地菩薩是相先現,四方風輪種種妙花,悉皆散灑,充布地上,菩薩悉見。善男子!五地菩薩是相先現,有妙寶女,眾寶瓔珞周遍嚴身,首冠名花以為其飾,菩薩

悉見。善男子!六地菩薩是相先現,七寶花池有四階道,金沙遍布,清淨無穢,八功德水皆悉盈滿,嗢鉢羅花、拘物頭花、分陀利花隨處莊嚴,於花池所,遊戲快樂,清涼無比,菩薩悉見。善男子!七地菩薩是相先現,於菩薩前,有諸眾生應墮地獄,以菩薩力,便得不墮,無有損傷,亦無恐怖,菩薩悉見。善男子!八地菩薩是相先現,於身兩邊,有師子王以為衛護,一切眾獸悉皆怖畏,菩薩悉見。善男子!九地菩薩是相先現,轉輪聖王無量億眾圍遶供養,頂上白蓋,無量眾寶之所莊嚴,菩薩悉見。善男子!十地菩薩是相先現,如來之身,金色晃耀,無量淨光,皆悉圓滿,有無量億梵王圍遶,恭敬供養,轉於無上微妙法輪,菩薩悉見。

「善男子!云何初地名為歡喜?謂初證得出世之心,昔所未得而今始得,於大事用,如其所願,悉皆成就,生極喜樂,是故最初名為歡喜。諸微細垢,犯戒過失,皆得清淨,是故二地名為無垢。無量智慧三昧光明,不可傾動,無能摧伏,聞持陀羅尼以為根本,是故三地名為明地。以智慧火燒諸煩惱,增長光明,修行覺品,是故四地名為焰地。修行方便,勝智自在,極難得故,見修煩惱,難伏能伏,是故五地名為難勝。行法相續,了了顯現,無相思惟,皆悉現前,是故六地名為現前。無漏、無間、無相思惟,解脫三昧,遠修行故,是地清淨,無有障礙,是故七地名為遠行。無相思惟,修得自在,諸煩惱行,不能令動,是故八地名為不動。說一切法種種差別,皆得自在,無患無累,增長智慧,自在無礙,是故九地名為善慧。法身如虛空,智慧如大雲,皆能遍滿覆一切故,是故第十名為法雲。

「善男子!執著有相我法無明、佈畏生死惡趣無明,此二無明障於初地。微細學處誤犯無明、發起種種業行無明,此二無明障於二地。未得今得愛著無明、能障殊勝總持無明,此二無明障於三地。 味著等至喜悅無明、微妙淨法愛樂無明,此二無明障於四地。欲背 生死無明、希趣涅槃無明,此二無明障於五地。觀行流轉無明、麁相現前無明,此二無明障於六地。微細諸相現行無明、作意欣樂無相無明,此二無明障於七地。於無相觀功用無明、執相自在無明,此二無明障於八地。於所說義及名句文此二無礙未善巧無明、於詞辯才不隨意無明,此二無明障於九地。於大神通未得自在變現無明、微細祕密未能悟解事業無明,此二無明障於十地。於一切境微細所知障礙無明、極細煩惱麁重無明,此二無明障於佛地。

「善男子!菩薩摩訶薩於初地中行施波羅蜜,於第二地行戒波羅蜜,於第三地行忍波羅蜜,於第四地行勤波羅蜜,於第五地行定波羅蜜,於第六地行慧波羅蜜,於第七地行方便勝智波羅蜜,於第八地行願波羅蜜,於第九地行力波羅蜜,於第十地行智波羅蜜。

「善男子!菩薩摩訶薩最初發心攝受,能生妙寶三摩地;第二發心攝受,能生可愛樂三摩地;第三發心攝受,能生難動三摩地;第四發心攝受,能生不退轉三摩地;第五發心攝受,能生寶花三摩地;第六發心攝受,能生日圓光焰三摩地;第七發心攝受,能生一切願如意成就三摩地;第八發心攝受,能生現前證住三摩地;第九發心攝受,能生智藏三摩地;第十發心攝受,能生勇進三摩地。善男子!是名菩薩摩訶薩十種發心。

「善男子!菩薩摩訶薩於此初地得陀羅尼,名依功德力。」

爾時世尊即說呪曰:

「怛姪他 晡[□*律]儞 曼奴喇剃 獨虎 獨虎 獨虎 耶跋 蘇利瑜 阿婆婆薩底(丁里反,下皆同) 耶跋 旃達囉 調怛底 多 跋達[□*洛]叉漫 憚茶鉢唎訶嚂 矩嚕 莎訶

「善男子!此陀羅尼是過一恒河沙數諸佛所說,為護初地菩薩摩訶薩故。若有誦持此陀羅尼呪者,得脫一切怖畏,所謂虎狼、師子、

惡獸之類,一切惡鬼、人非人等,怨賊災橫及諸苦惱,解脫五障, 不忘念初地。

「善男子!菩薩摩訶薩於第二地得陀羅尼,名善安樂住。

「怛姪他 唱篇(入聲,下同)哩 質哩質哩 唱篇羅篇羅(引) 喃繕 親繕覩唱篇哩 虎嚕虎嚕 莎訶

「善男子!此陀羅尼是過二恒河沙數諸佛所說,為護二地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念二地。

「善男子!菩薩摩訶薩於第三地得陀羅尼,名難勝力。

「怛姪他 憚宅 枳般 宅枳 羯喇 敪高喇敪 雞由哩 憚敪 嗶 莎訶

「善男子!此陀羅尼是過三恒河沙數諸佛所說,為護三地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念三地。

「善男子!菩薩摩訶薩於第四地得陀羅尼,名大利益。

「怛姪他 室唎室唎 陀弭儞陀弭儞 陀哩陀哩儞 室唎室唎儞 毘舍羅波世波始娜 畔陀弭帝 莎訶

「善男子!此陀羅尼是過四恒河沙數諸佛所說,為護四地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念四地。

「善男子!菩薩摩訶薩於第五地得陀羅尼,名種種功德莊嚴。

「怛姪他 訶哩訶哩 儞遮哩遮哩儞 羯喇摩(引) 儞僧羯喇摩(引) 儞 三婆山儞瞻跋儞 悉耽婆儞謨漢儞 碎閻步陛莎訶

「善男子!此陀羅尼是過五恒河沙數諸佛所說,為護五地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念五地。

「善男子!菩薩摩訶薩於第六地得陀羅尼,名圓滿智。

「恒姪他 毘徙哩毘徙哩 摩哩儞迦哩迦哩 毘度漢底 嚕嚕嚕 嚕 主嚕主嚕杜嚕婆杜嚕婆 捨捨設者婆哩灑莎(入) 悉底薩婆薩 埵喃 悉甸覩曼怛囉鉢陀儞莎訶

「善男子!此陀羅尼是過六恒河沙數諸佛所說,為護六地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念六地。

「善男子!菩薩摩訶薩於第七地得陀羅尼,名法勝行。

「恒姪他 勺訶(上) 勺訶(引) 嚕勺訶勺訶勻訶嚕 鞞陸枳鞞陸 枳 阿蜜嘌哆唬漢儞勃哩山儞 鞞嚕勅枳婆嚕伐底 鞞提呬枳 頻 陀鞞哩儞 阿蜜哩底枳 薄虎主愈薄虎主愈莎訶

「善男子!此陀羅尼是過七恒河沙數諸佛所說,為護七地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念七地。

「善男子!菩薩摩訶薩於第八地得陀羅尼,名無盡藏。

「怛姪他 室唎室唎室唎儞 蜜底蜜底 羯哩羯哩醯嚕醯嚕 主嚕 主嚕 畔陀弭莎訶

「善男子!此陀羅尼是過八恒河沙數諸佛所說,為護八地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念八地。

「善男子!菩薩摩訶薩於第九地得陀羅尼,名無量門。

「怛姪他 訶哩旃荼哩枳 俱藍婆喇體(天里反) 都剌死 跋吒跋吒 死室唎室唎迦室哩迦必室唎 莎(蘇活反)悉底 薩婆薩埵喃莎訶

「善男子!此陀羅尼是過九恒河沙數諸佛所說,為護九地菩薩摩訶 薩故。若有誦持此陀羅尼呪者,脫諸怖畏惡獸、惡鬼、人非人等, 怨賊災橫及諸苦惱,解脫五障,不忘念九地。

「善男子!菩薩摩訶薩於第十地得陀羅尼,名破金剛山。

「怛姪他 悉提(去) 蘇悉提(去) 謨折儞木察儞毘木底菴末麗 毘末麗 定末麗 忙揭麗呬囒若揭鞞 曷喇怛娜揭鞞 三曼多跋姪麗 薩婆頞他娑憚儞 摩捺斯莫訶摩捺斯 頞步底頞 窒步底 阿[□*賴]誓毘喇誓頞主底菴蜜嘌底 阿[□*賴]誓毘喇誓 跋嚂謎 跋囉 蚶(火含)麼莎(人) 囇晡喇儞晡喇娜 曼奴喇剃莎訶

「善男子!此陀羅尼灌頂吉祥句,是過十恒河沙數諸佛所說,為護十地菩薩摩訶薩故。若有誦持此陀羅尼呪者,脫諸怖畏惡獸、惡鬼、人非人等,怨賊災橫,一切毒害,皆悉除滅,解脫五障,不忘念十地。」

爾時師子相無礙光焰菩薩,聞佛說此不可思議陀羅尼已,即從座起,偏袒右肩,右膝著地,合掌恭敬頂禮佛足,以頌讚佛:

「敬禮無譬喻, 甚深無相法; 眾生失正知, 唯佛能濟度。 如來明慧眼, 不見一法相;

復以正法眼, 普照不思議。 不生於一法, 亦不滅一法; 得至無上處。 由斯平等見, 不壞於生死, 亦不住涅槃; 不著於二邊, 是故證圓寂。 於淨不淨品, 世尊知一味; 由不分別法, 獲得最清淨。 世尊無邊身, 不說於一字; 令諸弟子眾, 法雨皆充滿。 佛觀眾生相, 一切種皆無; 然於苦惱者, 常興於救護。 苦樂常無常, 有我無我等; 不一亦不異, 不生亦不滅。 如是眾多義, 隨說有差別; 譬如空谷響, 唯佛能了知。 法界無分別, 是故無異乘; 為度眾生故, 分別說有三。」

爾時,大自在梵天王亦從座起,偏袒右肩,右膝著地,合掌恭敬頂禮佛足,而白佛言:「世尊!此《金光明最勝王經》,希有難量,初中後善,文義究竟,皆能成就一切佛法;若受持者,是人則為報諸佛恩。」

佛言:「善男子!如是!如是!如汝所說。善男子!若得聽聞是經典者,皆不退於阿耨多羅三藐三菩提。何以故?善男子!是能成熟不退地菩薩殊勝善根,是第一法印,是眾經王,故應聽聞、受持、讀誦。何以故?善男子!若一切眾生未種善根,未成熟善根,未親近諸佛者,不能聽聞是微妙法。若善男子、善女人能聽受者,一切罪障皆悉除滅,得最清淨,常得見佛,不離諸佛及善知識勝行之人,恒聞妙法,住不退地,獲得如是勝陀羅尼門無盡無減;所謂海印出妙功德陀羅尼無盡無減;通達眾生意行言語陀羅尼無盡無減, 日圓無垢相光陀羅尼無盡無減;破全剛山陀羅尼無盡無減;說不可說 義因緣藏陀羅尼無盡無減;通達實語法則音聲陀羅尼無盡無減;虚 空無垢心行印陀羅尼無盡無減;無邊佛身皆能顯現陀羅尼,無盡無 減。

「善男子!如是等無盡無減諸陀羅尼門得成就故,是菩薩摩訶薩能於十方一切佛土化作佛身,演說無上種種正法,於法真如不動不住、不來不去,善能成熟一切眾生善根,亦不見一眾生可成熟者。 雖說種種諸法,於言辭中不動不住、不去不來,能於生滅證無生滅。以何因緣說諸行法無有去來?由一切法體無異故。」

說是法時,三萬億菩薩摩訶薩得無生法忍,無量諸菩薩不退菩提心,無量無邊苾芻、苾芻尼得法眼淨,無量眾生發菩薩心。

爾時,世尊而說頌曰:

「勝法能逆生死流, 甚深微妙難得見; 有情盲冥貪欲覆, 由不見故受眾苦。」

爾時,大眾俱從座起,頂禮佛足而白佛言:「世尊!若所在處,講宣讀誦此《金光明最勝王經》,我等大眾皆悉往彼為作聽眾,是說法師令得利益,安樂無障,身意泰然。我等皆當盡心供養,亦令聽眾安隱快樂,所住國土,無諸怨賊、恐怖、厄難、飢饉之苦,人民熾盛。此說法處道場之地,一切諸天、人非人等一切眾生,不應履踐及以污穢。何以故?說法之處即是制底,當以香花、繒綵、幡蓋而為供養,我等常為守護,令離衰損。」

佛告大眾:「善男子!汝等應當精勤修習此妙經典,是則正法久住 於世。」

金光明最勝王經卷第四

大唐三藏沙門義淨奉 制譯

蓮華喻讚品第七

爾時,佛告菩提樹神:「善女天!汝今應知,妙幢夜夢見妙金鼓出大音聲,讚佛功德并懺悔法,此之因緣我為汝等廣說其事,應當諦聽,善思念之。過去有王名金龍主,常以蓮華喻讚稱歎十方三世諸佛。」

即為大眾說其讚曰:

「過去未來現在佛, 安住十方世界中; 我今至誠稽首禮, 一心讚歎諸最勝。 無上清淨牟尼尊, 身光照耀如金色; 一切聲中最為上, 如大梵響震雷音。 髮彩喻若黑蜂王, 宛轉旋文紺青色; 平正顯現有光明。 目淨無垢妙端嚴, 猶如廣大青蓮葉; 舌相廣長極柔軟, 譬如紅蓮出水中。 眉間常有白毫光, 右旋宛轉頗梨色; 眉細纖長類初月, 其色晃耀比蜂干。 鼻高脩直如金銋, 淨妙光潤相無虧; 一切世間殊妙香, 聞時悉知其所在。 一毛端相不殊; 世尊最勝身金色, 紺青柔軟右旋文, 微妙光彩難為喻。 初誕身有妙光明, 普照一切十方界; 能滅三有眾生苦, 今彼悉蒙安隱樂。 阿蘇羅天及人趣; 地獄傍牛鬼道中, 今彼除滅於眾苦, 常受自然安隱樂。 譬如鎔金妙無比; 身色光明常普照, 面貌圓明如滿月, 唇色赤好喻頻婆。 行步威儀類師子, 身光朗耀同初日; 狀等垂下娑羅枝。 臂肘纖長 立渦膝, 圓光一尋照無邊, 赫奕猶如百千日;

悉能遍至諸佛剎, 淨光明網無倫比, 普照十方無障礙, 善逝慈光能與樂, 流光悉至百千十, 佛身成就無量福, 超過三界獨稱尊, 所有過去一切佛, 未來現在十方尊, 我以至誠身語意, 讚歎無邊功德海, 設我口中有千舌, 世尊功德不思議, 假令我舌有百千, 於中少分尚難知, 假使大地及諸天, 可以毛端滴知數, 我以至誠身語意, 所有勝福果難思, 彼王讚歎如來已, 願我當於未來世, 夢中常見大金鼓, 讚佛功德喻蓮華, 諸佛出世時一現, 夜夢常聞妙鼓音, 我當圓滿修六度, 然後得成無上覺, 以妙金鼓奉如來, 因斯當見釋迦佛, 金龍 金光是我子, 世世願生於我家, 若有眾生無救護, 我於來世作歸依, 三有眾苦願除滅, 於未來世修菩提, 願此金光懺悔福, 業障煩惱悉皆亡, 福智大海量無邊,

隨緣所在覺群迷。 流耀遍滿百千界; 一切冥闇悉皆除。 妙色映徹等金山; 眾生遇者皆出離。 一切功德共莊嚴; 世間殊勝無與等。 數同大地諸微塵; 亦如大地微塵眾。 稽首歸依三世佛; 種種香花皆供養。 經無量劫讚如來; 最勝甚深難可說。 讚歎一佛一功德; 況諸佛德無邊際。 乃至有頂為海水; 佛一功德甚難量。 禮讚諸佛德無邊; 迴施眾生速成佛。 倍復深心發弘願; 生在無量無數劫。 得聞顯說懺悔音; 願證無牛成下覺。 於百千劫甚難逢; 書則隨應而懺悔。 拔濟眾牛出苦海; 佛十清淨不思議。 并讚諸佛實功德; 記我當紹人中尊。 過去曾為善知識; 共授無上菩提記。 長夜輪迴受眾苦; 今彼常得安隱樂。 悉得隨心安樂處; 皆如過去成佛者。 永竭苦海罪消除; 今我娻招清淨果。 清淨離垢深無底;

願我獲斯功德海, **竦成無上大菩提。** 以此金光懺悔力, 當獲福德淨光明; 既得清淨妙光明, 常以智光照一切。 願我身光等諸佛, 福德智慧亦復然; 一切世界獨稱尊, 威力自在無倫匹。 有漏苦海願招越, 無為樂海願常游; 現在福海願恒盈, 當來智海願圓滿。 願我剎十超三界, 殊勝功德量無邊; 諸有緣者悉同生, 皆得竦成清淨智。 妙幢汝當知, 國王金龍主; 曾發如是願, 彼即是汝身。 往時有二子, 金龍及金光; 即銀相銀光, 當授我所記。」 大眾聞是說, 皆發菩提心; 願現在未來, 常依此懺悔。

金光明最勝王經金勝陀羅尼品第八

爾時,世尊復於眾中告善住菩薩摩訶薩:「善男子!有陀羅尼名曰金勝,若有善男子、善女人,欲求親見過去、未來、現在諸佛,恭敬供養者,應當受持此陀羅尼。何以故?此陀羅尼乃是過、現、未來諸佛之母。是故當知持此陀羅尼者,具大福德,已於過去無量佛所殖諸善本,今得受持,於戒清淨不毀不缺,無有障礙,決定能入甚深法門。」

世尊即為說持呪法,先稱諸佛及菩薩名,至心禮敬,然後誦呪。

「南無十方一切諸佛。南無諸大菩薩摩訶薩。南謨聲聞緣覺一切賢聖。

「南謨釋迦牟尼佛。南謨東方不動佛。南謨南方寶幢佛。南謨西方阿彌陀佛。南謨北方天鼓音王佛。南謨上方廣眾德佛。南謨下方明德佛。南謨寶藏佛。南謨普光佛。南謨普明佛。南謨香積王佛。南謨蓮花勝佛。南謨平等見佛。南謨寶髻佛。南謨寶上佛。南謨寶光

佛。南謨無垢光明佛。南謨辯才莊嚴思惟佛。南謨淨月光稱相王佛。南謨華嚴光佛。南謨光明王佛。南謨善光無垢稱王佛。南謨觀察無畏自在王佛。南謨無畏名稱佛。南謨最勝王佛。南謨觀自在菩薩摩訶薩。南謨地藏菩薩摩訶薩。南謨虚空藏菩薩摩訶薩。南謨妙吉祥菩薩摩訶薩。南謨金剛手菩薩摩訶薩。南謨普賢菩薩摩訶薩。南謨無盡意菩薩摩訶薩。南謨大勢至菩薩摩訶薩。南謨慈氏菩薩摩訶薩。南謨善慧菩薩摩訶薩。

「陀羅尼曰:

「南謨喝[口*賴]怛娜怛喇夜也 怛姪他 君睇 君睇 矩折曬 矩折曬 壹窒哩 蜜窒哩 莎訶」

佛告善住菩薩:「此陀羅尼,是三世佛母,若有善男子、善女人持 此咒者,能生無量無邊福德之聚,即是供養恭敬、尊重讚歎無數諸 佛,如是諸佛皆與此人授阿耨多羅三藐三菩提記。善住!若有人能 持此咒者,隨其所欲,衣食財寶、多聞聰慧、無病長壽,獲福甚 多,隨所願求,無不遂意。善住!持是咒者,乃至未證無上菩提, 常與金城山菩薩、慈氏菩薩、大海菩薩、觀自在菩薩、妙吉祥菩 薩、大水伽羅菩薩等而共居止,為諸菩薩之所攝護。善住當知!持 此咒時,作如是法,先應誦持滿一萬八遍為前方便。次於闇室莊嚴 道場,黑月一日清淨洗浴,著鮮潔衣,燒香散花,種種供養并諸飲 食。入道場中,先當稱禮如前所說諸佛菩薩,至心殷重悔先罪已, 右膝著地,可誦前咒滿一千八遍,端坐思惟,念其所願。日未出 時,於道場中,食淨黑食,日唯一食,至十五日方出道場。能令此 人福德威力不可思議,隨所願求無不圓滿,若不遂意,重入道場, 既稱心已,常持莫忘。」

金光明最勝王經重顯空性品第九

爾時,世尊說此呪已,為欲利益菩薩摩訶薩人天大眾,令得悟解甚深真實第一義故,重明空性而說頌曰:

「我已於餘甚深經, 廣說直空微妙法; 今復於此經王內, 略說空法不思議。 於諸廣大甚深法, 有情無智不能解; 故我於斯重敷演, 今於空法得開悟。 大悲哀愍有情故, 以善方便勝因緣; 我今於此大眾中, 演說今彼明空義。 當知此身如空聚, 六賊依止不相知; 六塵諸賊別依根, 各不相知亦如是。 眼根常觀於色處, 耳根聽聲不斷絕, 鼻根恒嗅於香境, 舌根鎮掌於美味, 身根受於輕軟觸, 意根了法不知厭, 此等六根隨事起, 各於自境生分別。 識如幻仆非真實, 依止根處妄貪求; 如人奔走空聚中, 六識依根亦如是。 託根緣境了諸事; 心遍馳求隨處轉, 於法尋思無暫停。 常愛色聲香味觸, 如鳥飛空無障礙; 藉此諸根作依處, 方能了別於外境。 此身無知無作者, 體不堅固託緣成; 皆從虚妄分別生, 譬如機關由業轉。 地水火風共成身, 隨彼因緣招異果; 同在一處相違害, 如四毒蛇居一簇。 此四大蛇性各異, 雖居一處有昇沈; 斯等終歸於滅法。 或上或下遍於身, 於此四種毒蛇中, 地水二蛇多沈下; 由此乖違眾病生。 風火二蛇性輕舉, 心識依止於此身, 浩作種種善惡業; 當往人天三惡趣, 隨其業力受身形。 遭諸疾病身死後, 大小便利悉盈流; 膿爛蟲蛆不可樂, 棄在屍林如朽木。 汝等當觀法如是, 云何執有我眾生? 一切諸法盡無常, 悉從無明緣力起。 本非實有體無生; 彼諸大種咸虚妄, 故說大種性皆空, 知此浮虚非實有。 無明自性本是無, 藉眾緣力和合有;

於一切時失正慧, 故我說彼為無明。 行識為緣有名色, 六處及觸受隨生; 憂悲苦惱怕隨涿。 愛取有緣生老死, 生死輪迴無息時; 眾苦惡業常纏泊, 本來非有體是空, 由不如理生分別。 我斷一切諸煩惱, 常以正智現前行; 了万蘊宅悉皆空, 求證菩提直實處。 我開甘露大城門, 示現甘露微妙器; 既得甘露真實味, 常以甘露施群生。 我吹最勝大法螺, 我擊最勝大法鼓, 我降最勝大法雨。 我然最勝大明燈, 降伏煩惱諸怨結, 建立無上大法幢; 於牛死海濟群洲, 我當關閉三惡趣。 煩惱熾火燒眾生, 無有救護無依止; 清涼甘露充足彼, 身心熱惱並皆除。 由是我於無量劫, 恭敬供養諸如來; 堅持禁戒趣菩提, 求證法身安樂處。 施他眼耳及手足, 妻子僮僕心無恪, 財寶七珍莊嚴具, 隨來求者咸供給。 忍等諸度皆褊修, 十地圓滿成下覺; 無有眾生度量者。 故我得稱一切智, 假使三千大千界, 盡此十地生長物; 所有叢林諸樹木, 稻麻竹葦及枝條。 此等諸物皆伐取, 並悉細末作微塵; 隨處積集量難知, 乃至充滿虛空界。 一切十方諸剎土, 所有三千大千界; 地十皆悉末為塵, 此微塵量不可數。 假使一切眾生智, 以此智慧與一人; 如是智者量無邊, 容可知彼微塵數。 牟尼世尊一念智, 令彼智人共度量; 於多俱胝劫數中, 不能算知其少分。」

時諸大眾聞佛說此甚深空性,有無量眾生,悉能了達四大、五蘊體 性俱空,六根、六境妄生繫縛,願捨輪迴,正修出離,深心慶喜, 如說奉持。

金光明最勝王經依空滿願品第十

爾時,如意寶光耀天女於大眾中,聞說深法,歡喜踊躍,從座而起,偏袒右肩,右膝著地,合掌恭敬而白佛言:「世尊!惟願為說於甚深理修行之法。」而說頌言:

「我問照世界, 兩足最勝尊, 菩薩正行法, 惟願慈聽許。」 佛言:「善女天! 若有疑惑者, 隨汝意所問, 吾當分別說。」

是時天女請世尊曰:

「云何諸菩薩, 行菩提正行, 離生死涅槃, 饒益自他故?」

佛告善女天:「依於法界,行菩提法,修平等行。云何依於法界, 行菩提法,修平等行?謂於五蘊能現法界,法界即是五蘊,五蘊不 可說,非五蘊亦不可說。何以故?若法界是五蘊,即是斷見;若離 五蘊,即是常見;離於二相,不著二邊,不可見,過所見,無名無 相,是則名為說於法界。善女天!云何五蘊能現法界?如是五蘊不 從因緣生。何以故?若從因緣生者,為已生故生?為未生故生?若 已生生者,何用因緣?若未生生者,不可得生。何以故?未生諸法 即是非有,無名無相,非校量譬喻之所能及,非是因緣之所生故。 善女天!譬如鼓聲,依木、依皮及桴手等故得出聲,如是鼓聲過去 亦空,未來亦空,現在亦空。何以故?是鼓音聲不從木生,不從皮 生及桴手生,不於三世生,是則不生。若不可生,則不可滅;若不 可滅,無所從來;若無所從來,亦無所去;若無所去,則非常非 斷;若非常非斷,則不一不異。何以故?此若是一,則不異法界。 若如是者,凡夫之人應見真諦,得於無上安樂涅槃;既不如是,故 知不一。若言異者,一切諸佛菩薩行相即是執著,未得解脫煩惱繫 縛,即不證於阿耨多羅三藐三菩提。何以故?一切聖人於行非行, 同真實性,是故不異。故知五蘊非有非無,不從因緣生,非無因緣

生,是聖所知,非餘境故,亦非言說之所能及,無名無相,無因無緣,亦無譬喻,始終寂靜,本來自空。是故五蘊能現法界。善女天!若善男子、善女人欲求阿耨多羅三藐三菩提,異真異俗,難可思量,於凡聖境,體非一異,不捨於俗,不離於真,依於法界,行菩提行。」

爾時,世尊作是語已,時善女天踊躍歡喜,即從座起,偏袒右肩,右膝著地,合掌恭敬,一心頂禮,而白佛言:「世尊!如上所說菩提正行,我今當學。」

是時索訶世界主大梵天王於大眾中,問如意寶光耀善女天曰:「此菩提行難可修行,汝今云何於菩提行而得自在?」

爾時,善女天答梵王曰:「大梵王!如佛所說,實是甚深。一切異生不解其義,是聖境界微妙難知。若使我今依於此法得安樂住,是實語者,願令一切五濁惡世無量無數無邊眾生,皆得金色三十二相,非男非女,坐寶蓮花,受無量樂,兩天妙花,諸天音樂不鼓自鳴,一切供養皆悉具足。」時善女天說是語已,一切五濁惡世所有眾生皆悉金色,具大人相,非男非女,坐寶蓮花,受無量樂,猶如他化自在天宮,無諸惡道,寶樹行列,七寶蓮花遍滿世界,又雨七寶上妙天花,作天伎樂。如意寶光耀善女天即轉女身,作梵天身。

時大梵王問如意寶光耀菩薩言:「仁者!如何行菩提行?」

答言:「梵王!若水中月行菩提行,我亦行菩提行;若夢中行菩提行,我亦行菩提行;若陽焰行菩提行,我亦行菩提行;若谷響行菩提行,我亦行菩提行。」

時大梵王聞此說已,白菩薩言:「仁依何義而說此語?」

答言:「梵王!無有一法是實相者,但由因緣而得成故。」

梵王言:「若如是者,諸凡夫人皆悉應得阿耨多羅三藐三菩提。」

答言:「仁以何意而作是說?愚癡人異,智慧人異?菩提異,非菩提異?解脫異,非解脫異?梵王!如是諸法,平等無異。於此法界真如,不一不異,無有中間而可執著,無增無減。梵王!譬如幻師及幻弟子善解幻術,於四衢道,取諸沙土草木葉等,聚在一處作諸幻術,使人覩見象眾、馬眾、車兵等眾,七寶之聚種種倉庫。若有眾生愚癡無智,不能思惟,不知幻本,若見若聞,作是思惟:『我所見聞象、馬等眾,此是實有,餘皆虛妄。』於後更不審察思惟。有智之人則不如是,了於幻本,若見若聞,作如是念:『如我所見象、馬等眾,非是真實,唯有幻事,惑人眼目,妄謂象等及諸倉庫,有名無實,如我見聞,不執為實。』後時思惟,知其虛妄。是故智者了一切法皆無實體,但隨世俗,如見如聞,表宣其事,思惟諦理,則不如是,復由假說,顯實義故。

「梵王!愚癡異生,未得出世聖慧之眼,未知一切諸法真如不可說故。是諸凡愚,若見若聞行非行法,如是思惟,便生執著,謂以為實,於第一義不能了知諸法真如是不可說。是諸聖人,若見若聞行非行法,隨其力能不生執著以為實有,了知一切無實行法、無實非行法,但妄思量行非行相,唯有名字,無有實體。是諸聖人,隨世俗說,為欲令他知真實義。如是梵王!是諸聖人,以聖智見,了法真如不可說故,行非行法亦復如是,令他證知,故說種種世俗名言。」

時大梵王問如意寶光耀菩薩言:「有幾眾生能解如是甚深正法?」

答言:「梵王!有眾幻人心心數法,能解如是甚深正法。」

梵王曰:「此幻化人,體是非有,此之心數從何而生?」

答曰:「若知法界不有不無,如是眾生能解深義。」

爾時,梵王白佛言:「世尊!是如意寶光耀菩薩不可思議,<mark>通</mark>達如 是甚深之義。」

佛言:「如是!如是!梵王!如汝所言,此如意寶光耀,已教汝等 發心修學無生忍法。」

是時大梵天王與諸梵眾,從座而起,偏袒右肩,合掌恭敬,頂禮如 意寶光耀菩薩足,作如是言:「希有!希有!我等今日幸遇大士, 得聞正法。」

爾時,世尊告梵王言:「是如意寶光耀,於未來世當得作佛,號寶 焰吉祥藏如來、應、正遍知、明行圓滿、善逝、世間解、無上士、調御丈夫、天人師、佛、世尊。」

說是品時,有三千億菩薩於阿耨多羅三藐三菩提得不退轉,八千億 天子、無量無數國王臣民遠塵離垢,得法眼淨。

爾時,會中有五十億苾芻,行菩薩行,欲退菩提心,聞如意寶光耀菩薩說是法時,皆得堅固不可思議滿足上願,更復發起菩提之心,各自脫衣供養菩薩,重發無上勝進之心,作如是願:「願令我等功德善根悉皆不退,迴向阿耨多羅三藐三菩提。」

「梵王!是諸苾芻,依此功德如說修行,過九十大劫,當得解悟, 出離生死。」爾時,世尊即為授記:「汝諸苾芻過三十阿僧祇劫, 當得作佛,劫名難勝光王,國名無垢光,同時皆得阿耨多羅三藐三 菩提,皆同一號,名願莊嚴間飾王,十號具足。

「梵王!是《金光明》微妙經典,若正聞持,有大威力。假使有人 於百千大劫,行六波羅蜜無有方便;若有善男子、善女人書寫如是 《金光明經》,半月半月專心讀誦,是功德聚於前功德百分不及 一,乃至算數譬喻所不能及。梵王!是故我今令汝修學,憶念受 持,為他廣說。何以故?我於往昔行菩薩道時,猶如勇士入於戰陣,不惜身命,流通如是微妙經王,受持讀誦,為他解說。梵王!譬如轉輪聖王,若王在世,七寶不滅,王若命終,所有七寶自然滅盡。梵王!是《金光明》微妙經王若現在世,無上法寶悉皆不滅,若無是經,隨處隱沒。是故應當於此經王,專心聽聞,受持讀誦,為他解說,勸令書寫,行精進波羅蜜,不惜身命,不憚疲勞,功德中勝,我諸弟子應當如是精勤修學。」

爾時,大梵天王與無量梵眾,帝釋、四王及諸藥叉,俱從座起,偏袒右肩,右膝著地,合掌恭敬而白佛言:「世尊!我等皆願守護流通是《金光明》微妙經典,及說法師若有諸難,我當除遣,令具眾善,色力充足,辯才無礙,身意泰然,時會聽者皆受安樂。所在國土,若有飢饉、怨賊、非人為惱害者,我等天眾皆為擁護,使其人民安隱豐樂,無諸枉橫,皆是我等天眾之力。若有供養是經典者,我等亦當恭敬供養,如佛不異。」

爾時,佛告大梵天王及諸梵眾乃至四王諸藥叉等:「善哉!善哉! 汝等得聞甚深妙法,復能於此微妙經王發心擁護及持經者,當獲無 邊殊勝之福,速成無上正等菩提。」時梵王等聞佛語已,歡喜頂 受。

金光明最勝王經四天王觀察人天品第十一

爾時,多聞天王、持國天王、增長天王、廣目天王,俱從座起,偏袒右肩,右膝著地,合掌向佛,禮佛足已,白言:「世尊!是《金光明最勝王經》,一切諸佛常念觀察,一切菩薩之所恭敬,一切天龍常所供養,及諸天眾常生歡喜,一切護世稱揚讚歎,聲聞、獨覺皆共受持,悉能明照諸天宮殿,能與一切眾生殊勝安樂,止息地獄、餓鬼、傍生諸趣苦惱,一切怖畏悉能除殄,所有怨敵尋即退散,飢饉惡時能令豐稔,疾疫病苦皆令蠲愈,一切災變百千苦惱咸

悉消滅。世尊!是《金光明最勝王經》能為如是安隱利樂饒益我 等,惟願世尊於大眾中廣為官說。我等四王并諸眷屬,聞此甘露無 上法味,氣力充實,增益威光,精進勇猛,神通倍勝。世尊!我等 四王修行正法,常說正法,以法化世,我等令彼天、龍、藥叉、健 闥婆、阿蘇羅、揭路茶、俱槃茶、緊那羅、莫呼羅伽及諸人王,常 以正法而化於世,遮去諸惡,所有鬼神吸人精氣無慈悲者,悉令遠 去。世尊!我等四王與二十八部藥叉大將,并與無量百千藥叉,以 淨天眼過於世人,觀察擁護此贍部洲。世尊!以此因緣,我等諸 王,名護世者。又復於此洲中,若有國王被他怨賊常來侵擾,及多 飢饉,疾疫流行,無量百千災厄之事。世尊!我等四王於此《金光 明最勝王經》恭敬供養,若有苾芻法師受持讀誦,我等四王共往覺 悟,勸請其人。時彼法師由我神通覺悟力故,往彼國界廣宣流布是 《金光明》微妙經典,由經力故,令彼無量百千衰惱災厄之事悉皆 除遣。世尊!若諸人王於其國內,有持是經苾芻法師至彼國時,當 知此經亦至其國。世尊!時彼國王應往法師處,聽其所說,聞已歡 喜,於彼法師恭敬供養,深心擁護,今無憂惱,演說此經利益一 切。世尊!以是經故,我等四王皆共一心護是人王及國人民,今離 災患,常得安隱。世尊!若有苾芻、苾芻尼、鄔波索迦、鄔波斯迦 持是經者,時彼人王隨其所須,供給供養,令無乏少,我等四王令 彼國主及以國人,悉皆安隱,遠離災患。世尊!若有受持讀誦是經 典者,人王於此供養恭敬,尊重讚歎,我等當令彼王於諸王中,恭 敬尊重,最為第一,諸餘國王共所稱歎。」大眾聞已,歡喜受持。

金光明最勝王經卷第五

大唐三藏沙門義淨奉 制譯

四天王護國品第十二

爾時,世尊聞四天王恭敬供養《金光明經》,及能擁護諸持經者,讚言:「善哉!善哉!汝等四王已於過去無量百千萬億佛所,恭敬供養,尊重讚歎,植諸善根,修行正法,常說正法,以法化世。汝等長夜於諸眾生常思利益,起大慈心,願與安樂,以是因緣,能令汝等現受勝報。若有人王恭敬供養此《金光明》最勝經典,汝等應當勤加守護,令得安隱。汝諸四王及餘眷屬無量無數百千藥叉護是經者,即是護持去、來、現在諸佛正法。汝等四王及餘天眾并諸藥叉,與阿蘇羅共鬪戰時,常得勝利;汝等若能護持是經,由經力故,能除眾苦、怨賊、飢饉及諸疾疫。是故汝等若見四眾受持讀誦此經王者,亦應勤心共加守護,為除衰惱,施與安樂。」

爾時,四天王即從座起,偏袒右肩,右膝著地,合掌恭敬白佛言:「世尊!此金光明最勝經王,於未來世,若有國土城邑聚落、山林曠野,隨所至處流布之時,若彼國王於此經典至心聽受,稱歎供養,并復供給受持是經四部之眾,深心擁護,令離衰惱,以是因緣,我護彼王及諸人眾,皆令安隱,遠離憂苦,增益壽命,威德具足。世尊!若彼國王見於四眾受持經者,恭敬守護猶如父母,一切所須悉皆供給,我等四王常為守護,令諸有情無不尊敬。是故我等并與無量藥叉諸神,隨此經王所流布處,潛身擁護,令無留難,亦當護念聽是經人諸國王等,除其衰患,悉令安隱,他方怨賊皆使退散。若有人王聽是經時,隣國怨敵興如是念:『當具四兵壞彼國土。』世尊!以是經王威神力故,是時隣敵更有異怨,而來侵擾於其境界,多諸災變疫病流行。時王見已即嚴四兵,發向彼國欲為討

罰。我等爾時當與眷屬無量無邊藥叉諸神,各自隱形為作護助,令 彼怨敵自然降伏,尚不敢來至其國界,豈復得有兵戈相罰。」

爾時,佛告四天王:「善哉!善哉!汝等四王,乃能擁護如是經 典。我於過去百千俱胝那庾多劫,修諸苦行,得阿耨多羅三藐三菩 提,證一切智,今說是法。若有人王受持是經,恭敬供養者,為消 衰患,令其安隱,亦復擁護城邑聚落,乃至怨賊悉令退散,亦令一 切贍部洲內所有諸王,永無衰惱鬪諍之事。四王當知!此贍部洲八 萬四千城邑聚落、八萬四千諸人王等,各於其國受諸快樂,皆得自 在,所有財寶豐足受用,不相侵奪,隨彼宿因而受其報,不起惡念 貪求他國,咸生少欲利樂之心,無有鬪戰繫縛等苦。其土人民自生 愛樂,上下和穆,猶如水乳,情相愛重,歡喜遊戲,慈悲謙讓,增 長善根。以是因緣,此贍部洲安隱豐樂,人民熾盛,大地沃壤,寒 暑調和,時不乖序,日月星宿常度無虧,風雨隨時,離諸災橫,資 產財寶皆悉豐盈,心無慳鄙,常行慧施,具十善業,若人命終,多 生天上,增益天眾。大王!若未來世有諸人王聽受是經,恭敬供養 并受持是經,四部之眾尊重稱讚。復欲安樂饒益汝等及諸眷屬無量 百千諸藥叉眾,是故彼王常當聽受是妙經王,由得聞此正法之水甘 露上味,增益汝等身心勢力,精進勇猛,福德威光悉令充滿。是諸 人王若能至心聽受是經,則為廣大希有供養,供養於我釋迦牟尼 應、正等覺。若供養我,則是供養過去、未來、現在百千俱胝那庾 多佛。若能供養三世諸佛,則得無量不可思議功德之聚。以是因 緣,汝等應當擁護彼王后妃眷屬,令無衰惱,及宮宅神常受安樂, 功德難思,是諸國土所有人民,亦受種種五欲之樂,一切惡事皆令 消殄。」

爾時,四天王白佛言:「世尊!於未來世,若有人王,樂聽如是《金光明經》,為欲擁護自身、后妃、王子,乃至內宮諸婇女等,城邑宮殿,皆得第一不可思議最上歡喜寂靜安樂,於現世中,王位

尊高,自在昌盛,常得增長,復欲攝受無量無邊難思福聚,於自國土令無怨敵及諸憂惱災厄事者。世尊!如是人王不應放逸令心散亂,當生恭敬至誠殷重,聽受如是最勝經王。欲聽之時,先當莊嚴最上宮室,王所愛重顯敞之處,香水灑地,散眾名花,安置師子殊勝法座,以諸珍寶而為挍飾,張施種種寶蓋幢幡,燒無價香,奏諸音樂。其王爾時當淨澡浴,以香塗身,著新淨衣及諸瓔珞,坐小卑座,不生高舉,捨自在位,離諸憍慢,端心正念,聽是經王;於法師所,起大師想。復於宮內后妃王子婇女眷屬生慈愍心,喜悅相視,和顏軟語,於自身心大喜充遍。作如是念:『我今獲得難思殊勝廣大利益,於此經王,盛興供養。』既敷設已,見法師至,當起虔敬渴仰之心。」

爾時,佛告四天王:「不應如是不抑法師。時彼人王應著純淨鮮潔 之衣,種種瓔珞以為嚴飾,自持白蓋及以香花,備整軍儀,盛陳音 樂, 步出城關抑彼法師, 運想虔恭為吉祥事。四王! 以何因緣今彼 人王親作如是恭敬供養?由彼人王舉足下足,步步即是恭敬供養、 承事尊重百千萬億那庾多諸佛世尊,復得超越如是劫數生死之苦, 復於來世如是劫數,當受輪王殊勝尊位。隨其步步,亦於現世福德 增長自在為王,咸應難思,眾所欽重;當於無量百千億劫人天受用 七寶宮殿,所在生處常得為王,增益壽命,言詞辯了,人天信受, 無所畏懼,有大名稱,咸共瞻仰,天上人中受勝妙樂,獲大力勢, 有大威德,身相奇妙,端嚴無比,值天人師,遇善知識,成就具足 無量福聚。四王當知!彼諸人王見如是等種種無量功德利益,故應 自往奉迎法師。若一踰繕那,乃至百千踰繕那,於說法師應生佛 想,還至城已,作如是念:『今日釋迦牟尼如來、應、正等覺入我 宮中,受我供養,為我說法。我聞法已,即於阿耨多羅三藐三菩提 不復退轉,即是值遇百千萬億那庾多諸佛世尊。我於今日即是種種 廣大殊勝上妙樂具,供養過去、未來、現在諸佛。我於今日即是永 拔琰摩王界、地獄、餓鬼、傍生之苦。便為已種無量百千萬億轉輪

聖王、釋梵天主善根種子。當令無量百千萬億眾生,出生死苦,得涅槃樂,積集無量無邊不可思議福德之聚,後宮眷屬及諸人民皆蒙安隱,國土清泰,無諸災厄、毒害、惡人,他方怨敵不來侵擾,遠離憂患。』四王當知!時彼人王應作如是尊重正法,亦於受持是妙經典苾芻、苾芻尼、鄔波索迦、鄔波斯迦,供養恭敬尊重讚歎,所獲善根,先以勝福施與汝等及諸眷屬。彼之人王,有大福德善業因緣,於現世中得大自在增益威光,吉祥妙相皆悉莊嚴,一切怨敵能以正法而摧伏之。」

爾時,四天王白佛言:「世尊!若有人王能作如是恭敬正法,聽此經王,并於四眾持經之人,恭敬供養,尊重讚歎。時彼人王欲為我等生歡喜故,當在一邊,近於法座,香水灑地,散眾名花,安置處所,設四王座,我與彼王共聽正法。其王所有自利善根,亦以福分施及我等。世尊!時彼人王請說法者,昇座之時,便為我等燒眾名香,供養是經。世尊!時彼香煙於一念頃,上昇虛空,即至我等諸天宮殿,於虛空中變成香蓋。我等天眾聞彼妙香,香有金光照曜我等所居宮殿,乃至梵宮及以帝釋、大辯才天、大吉祥天、堅牢地神、正了知大將、二十八部諸藥叉神、大自在天、金剛密主、寶賢大將、訶利底母五百眷屬、無熱惱池龍王、大海龍王所居之處。世尊!如是等眾於自宮殿見彼香煙,一剎那頃變成香蓋,聞香芬馥,覩色光明,遍至一切諸天神宮。」

佛告四天王:「是香光明非但至此宮殿,變成香蓋,放大光明;由彼人王手擎香鑪,燒眾名香供養經時,其香煙氣於一念頃遍至三千大千世界,百億日月、百億妙高山王、百億四洲,於此三千大千世界一切天、龍、藥叉、健闥婆、阿蘇羅、揭路茶、緊那羅、莫呼洛伽宮殿之所,於虛空中充滿而住。種種香煙變成雲蓋,其蓋金色普照天宮。如是三千大千世界所有種種香雲香蓋,皆是《金光明最勝王經》威神之力。是諸人王手持香鑪供養經時,種種香氣非但遍此

三千大千世界,於一念頃亦遍十方無量無邊恒河沙等百千萬億諸佛國土,於諸佛上虛空之中變成香蓋,金色普照亦復如是。時彼諸佛聞此妙香,覩斯雲蓋及以金色,於十方界恒河沙等諸佛世尊現神變已,彼諸世尊悉共觀察,異口同音讚法師曰:『善哉!善哉!汝大丈夫!能廣流布如是甚深微妙經典,則為成就無量無邊不可思議福德之聚。若有聽聞如是經者,所獲功德其量甚多,何況書寫、受持、讀誦、為他敷演、如說修行。何以故?善男子!若有眾生聞此《金光明最勝王經》者,即於阿耨多羅三藐三菩提不復退轉。』」

爾時,十方有百千俱胝那庾多無量無數恒河沙等諸佛剎土,彼諸剎土一切如來異口同音,於法座上讚彼法師言:「善哉!善哉!善男子!汝於來世,以精勤力,當修無量百千苦行,具足資糧,超諸聖眾,出過三界,為最勝尊,當坐菩提樹王之下,殊勝莊嚴,能救三千大千世界有緣眾生,善能摧伏可畏形儀諸魔軍眾,覺了諸法最勝清淨甚深無上正等菩提。善男子!汝當坐於金剛之座,轉於無上諸佛所讚十二妙行甚深法輪,能擊無上最大法鼓,能吹無上極妙法螺,能建無上殊勝法幢,能然無上極明法炬,能降無上甘露法雨,能斷無量煩惱怨結,能令無量百千萬億那庾多有情,渡於無涯可畏大海,解脫生死無際輪迴,值遇無量百千萬億那庾多佛。」

爾時,四天王復白佛言:「世尊!是《金光明最勝王經》,能於未來現在成就如是無量功德,是故人王若得聞是微妙經典,即是已於百千萬億無量佛所種諸善根,於彼人王我當護念。復見無量福德利故,我等四王及餘眷屬無量百千萬億諸神,於自宮殿見是種種香煙雲蓋神變之時,我當隱蔽不現其身,為聽法故,當至是王清淨嚴飾所止宮殿講法之處。如是乃至梵宮、帝釋、大辯才天、大吉祥天、堅牢地神、正了知神大將、二十八部諸藥叉神、大自在天、金剛密主、寶賢大將、訶利底母五百眷屬、無熱惱池龍王、大海龍王、無量百千萬億那庾多諸天藥叉,如是等眾為聽法故,皆不現身,至彼

人王殊勝宮殿莊嚴高座說法之所。世尊!我等四王及餘眷屬藥叉諸神,皆當一心共彼人王為善知識,因是無上大法施主,以甘露味充足於我,是故我等擁護是王,除其衰患,令得安隱,及其宮殿城邑國土諸惡災變悉令消滅。」

爾時,四天王俱共合掌白佛言:「世尊!若有人王於其國土,雖有 此經,未常流布,心生捨離,不樂聽聞,亦不供養尊重讚歎,見四 部眾持經之人,亦復不能尊重供養,遂令我等及餘眷屬無量諸天, 不得聞此甚深妙法,背甘露味,失正法流,無有威光及以勢力,增 長惡趣,損減人天,墜生死河,乖涅槃路。世尊!我等四王并諸眷 屬及藥叉等,見如斯事,捨其國土,無擁護心。非但我等捨棄是 王,亦有無量守護國土諸大善神悉皆捨去。既捨離已,其國當有種 種災禍,喪失國位,一切人眾皆無善心,惟有繫縛,殺害瞋諍,互 相讒諂, 狂及無辜, 疾疫流行, 彗星數出, 兩日並現, 博蝕無恒, 黑白二虹表不祥相,星流地動,井內發聲,暴雨惡風不依時節,常 遭飢饉,苗實不成,多有他方怨賊侵掠,國內人民受諸苦惱,土地 無有可樂之處。世尊!我等四王及與無量百千天神,并護國土諸舊 善神遠離去時,生如是等無量百千災怪惡事。世尊!若有人王欲護 國土,常受快樂,欲令眾生咸蒙安隱,欲得摧伏一切外敵,於自國 境永得昌盛,欲令正教流布世間,苦惱惡法皆除滅者。世尊!是諸 國主必當聽受是妙經王,亦應恭敬供養讀誦受持經者。我等及餘無 量天眾以是聽法善根威力,得服無上甘露法味,增益我等所有眷 屬,并餘天神皆得勝利。何以故?以是人王至心聽受是經典故。世 尊!如大梵天於諸有情常為宣說世出世論,帝釋復說種種諸論,五 通神仙亦說諸論。世尊!梵天、帝釋、五通仙人雖有百千俱胝那庾 多無量諸論,然佛世尊慈悲哀愍,為人天眾說《金光明》微妙經 典,比前所說,勝彼百千俱胝那庾多倍不可為喻。何以故?由此能 今諸瞻部洲所有王等正法化世,能與眾生安樂之事,為護自身及諸 眷屬,令無苦惱,又無他方怨賊侵害,所有諸惡悉皆遠去,亦令國

土災厄屏除,化以正法無有諍訟。是故人王各於國土,當然法炬,明照無邊,增益天眾并諸眷屬。世尊!我等四王無量天神藥叉之眾,贍部洲內所有天神,以是因緣得服無上甘露法味,獲大威德勢力光明無不具足,一切眾生皆得安隱,復於來世無量百千不可思議那庾多劫常受快樂,復得值遇無量諸佛,種諸善根,然後證得阿耨多羅三藐三菩提。如是無量無邊勝利,皆是如來、應、正等覺,以大慈悲過諸梵眾,以大智慧逾於帝釋,修諸苦行勝五通仙,百千萬億那庾多倍不可稱計,為諸眾生演說如是微妙經典,令贍部洲一切國主及諸人眾,明了世間所有法式,治國化人勸導之事,由此經王流通力故,普得安樂。此等福利,皆是釋迦大師於此經典廣為流通慈悲力故。世尊!以是因緣,諸人王等皆應受持,供養恭敬,尊重讚歎此妙經王。何以故?以如是等不可思議殊勝功德利益一切,是故名曰最勝經王。」

爾時,世尊復告四天王:「汝等四王及餘眷屬,無量百千俱胝那庾多諸天大眾,見彼人王,若能至心聽是經典,供養恭敬、尊重讚歎者,應當擁護,除其衰患,能令汝等亦受安樂;若四部眾能廣流布是經王者,於人天中廣作佛事,普能利益無量眾生,如是之人,汝等四王常當擁護。如是四眾,勿使他緣共相侵擾,令彼身心寂靜安樂,於此經王廣宣流布,令不斷絕,利益有情,盡未來際。」

爾時,多聞天王從座而起,白佛言:「世尊!我有如意寶珠陀羅尼法,若有眾生樂受持者,功德無量。我常擁護令彼眾生離苦得樂,能成福智二種資糧。欲受持者先當誦此護身之呪。」即說呪曰:

「南謨薜室囉末拏也莫訶曷囉闍也 怛姪他 囉囉囉囉 矩怒矩 怒 區怒區怒 寠怒寠怒 颯嚩颯嚩羯囉 羯囉莫訶毘羯喇麼 莫訶毘羯喇麼 莫訶曷囉社 曷[□*洛]叉曷[□*洛]叉 覩漫(自稱己 名) 薩婆薩埵難者 莎訶

「世尊!誦此呪者,當以白線呪之七遍,一遍一結,繫之肘後,其事必成;應取諸香,所謂安息、栴檀、龍腦、蘇合、多揭羅、熏陸,皆須等分,和合一處,手執香爐,燒香供養,清淨澡浴,著鮮潔衣,於一靜室,可誦神呪請我薜室囉末拏天王。」即說呪曰:

「南謨薜室囉末拏(引)也

「南謨檀那默也 檀泥說囉(引)也 阿揭撦 阿鉢[□*賴]弭哆 檀泥說囉 鉢囉麼 迦留尼迦 薩婆薩埵 呬哆振哆 麼麼(己名)檀那末奴鉢喇拽撦 碎閻摩揭撦 莎訶

「此呪誦滿一七遍已,次誦本呪。欲誦呪時,先當稱名敬禮三寶, 及薜室羅末拏天王。能施財物,令諸眾生所求願滿,悉能成就,與 其安樂。如是禮已,次誦薜室羅末拏天王如意末尼寶心神呪,能施 眾生隨意安樂。」爾時,多聞天王即於佛前,說如意末尼寶心呪 曰:

「南謨曷喇怛娜 怛喇夜野(引)南謨薜室囉末拏(引)也

「莫訶囉闍(引)也 恒姪他 四弭四弭 蘇母蘇母 梅茶梅茶 折 囉折囉 薩囉薩囉羯囉羯囉 枳哩枳哩 矩嚕矩嚕 母嚕母嚕 主 嚕主嚕 娑大也頞貪 我名某甲 昵店頞他 達達覩莎訶 南謨薛 室囉末拏也莎訶檀那默也莎訶 曼奴喇他鉢唎脯喇迦(引)也莎訶

「受持呪時,先誦千遍,然後於淨室中瞿摩塗地作小壇場,隨時飲食,一心供養,常然妙香,令烟不絕。誦前心呪晝夜繫心,惟自耳聞,勿令他解。時有薜室囉末拏王子名禪膩師,現童子形,來至其所。問言:『何故須喚我父?』即可報言:『我為供養三寶,事須財物,願當施與。』時禪膩師聞是語已,即還父所,白其父言:『今有善人發至誠心,供養三寶,少乏財物,為斯請召。』其父報

曰: 『汝可速去,日日與彼一百迦利沙波拏(此是根本梵音,惟目貝齒而隨方不定,或是貝齒,或是金銀銅鐵等錢,然摩揭陀現今通用一迦利沙波拏有一千六百貝齒,總數可以准知,若准物直隨處不定。若人持呪得成就者,獲物之時自知其數。有本云:每日與一百陳那羅,即金錢也。乃至盡形日日常得,西方求者多有神驗,除不至心也)。』

「其持咒者見是相已,知事得成。當須獨處淨室,燒香而臥。可於 床邊置一香篋,每至天曉,觀其篋中獲所求物。每得物時,當日即 須供養三寶,香花飲食兼施貧乏,皆令罄盡,不得停留。於諸有情 起慈悲念,勿生瞋誑諂害之心。若起瞋者,即失神驗,常可護心, 勿令瞋恚。又持此咒者,於每日中憶我多聞天王,及男女眷屬稱揚 讚歎,恒以十善共相資助,令彼天等福力增明,眾善普臻證菩提 處。彼諸天眾見是事已,皆大歡喜,共來擁衛持咒之人。又持咒者 壽命長遠,經無量歲,永離三塗,常無災厄,亦令獲得如意寶珠及 以伏藏,神通自在,所願皆成。若求官榮,無不稱意,亦解一切禽 獸之語。

「世尊!若持呪時,欲得見我自身現者,可於月八日或十五日,於白疊上畫佛形像,當用木膠雜彩莊飾,其畫像人為受八戒。於佛左邊作吉祥天女像,於佛右邊作我多聞天像,并畫男女眷屬之類。安置座處咸令如法,布列花彩,燒眾名香,然燈續明,晝夜無歇,上妙飲食種種珍奇,發殷重心隨時供養,受持神呪,不得輕心。請召我時應誦此呪:

「南謨室利健那也 勃陀(引)也 南謨薜室囉末拏也 藥叉囉闍(引)也 莫訶囉闍阿地囉闍也 南麼室唎耶裔 莫訶提弊(引)裔 怛姪他 怛囉怛囉 咄嚕咄嚕 末囉末囉 宰卛吐宰卛吐 漢娜漢娜末尼羯諾迦 跋折囉薜琉璃也 目底迦楞訖嘌哆 設唎囉裔 蒲(引)薩婆薩埵呬哆迦摩薜室囉末拏 室唎夜提鼻 跋[□*臘]婆也

醫呬醫呬磨毘藍婆 瞿嘌拏瞿嘌拏[袖-由+未](麻八反)喇娑[袖-由+未]喇娑 達默呬麼麼 阿目迦那末寫(自稱己名)達哩設那迦末寫達 哩設南 麼麼末那 鉢喇曷囉大也 莎訶

「世尊!我若見此誦呪之人,復見如是盛興供養,即生慈愛歡喜之心。我即變身作小兒形,或作老人、苾芻之像,手持如意末尼寶珠,并持金囊入道場內,身現恭敬,口稱佛名,語持呪者曰:『隨汝所求,皆令如願。』或隱林藪,或造寶珠,或欲眾人愛寵,或求金銀等物,欲持諸呪,皆令有驗。或欲神通壽命長遠,及勝妙樂,無不稱心。我今且說如是之事,若更求餘,皆隨所願,悉得成就,寶藏無盡,功德無窮。假使日月墜墮于地,或可大地有時移轉,我此實語終不虛然,常得安隱,隨心快樂。世尊!若有人能受持讀誦是經王者,誦此呪時,不假疲勞,法速成就。世尊!我今為彼貧窮困厄苦惱眾生,說此神呪,令獲大利,皆得富樂,自在無患,乃至盡形,我當擁護,隨逐是人,為除災厄。亦復令此持《金光明最勝王經》流通之者,及持呪人,於百步內光明照燭,我之所有千藥叉神亦常停衛,隨欲驅使,無不遂心。我說實語,無有虛誑,惟佛證知。」

時多聞天王說此呪已,佛言:「善哉!天王!汝能破裂一切眾生貧 窮苦網,令得富樂,說是神呪,復令此經廣行於世。」

時四天王俱從座起,偏袒一肩,頂禮雙足,右膝著地,合掌恭敬, 以妙伽他讚佛功德:

「佛面猶如淨滿月, 亦如千日放光明; 目淨脩廣若青蓮, 齒白齊密猶珂雪。 佛德無邊如大海, 無限妙寶積其中; 智慧德水鎮恒盈, 百千勝定咸充滿。 足下輪相皆嚴飾, 轂輞千輻悉齊平; 手足鞔網遍莊嚴, 猶如鵝王相具足。 佛身光曜等金山, 清淨殊特無倫匹; 亦如妙高功德滿, 故我稽首佛山王。 逾於千月放光明; 相好如空不可測, 皆如焰幻不思議, 故我稽首心無著。」

爾時,四天王讚歎佛已,世尊亦以伽他而答之曰:

無上十力之所說; 「此《金光明》最勝經,

汝等四王常擁護, 應生勇猛不狠心。 此妙經寶極甚深, 能與一切有情樂; 由彼有情安樂故, 常得流通贍部洲。 於此大千世界中, 所有一切有情類; 餓鬼傍牛及地獄, 如是苦趣悉皆除。 及餘一切有情類; 住此南洲諸國王, 由經威力常歡喜, 皆蒙擁護得安寧。 亦使此中諸有情, 除眾病苦無賊盜; 安隱豐樂無違惱。 賴此國十弘經故, 若人聽受此經王, 欲求尊貴及財利; 國十豐樂無違諍, **隋**心所願悉皆從。 於自國界常安隱; 能今他方賊狠散, 由此最勝經王力, 離諸苦惱無憂怖。 如寶樹王在宅內, 能生一切諸樂具; 最勝經干亦復然, 能與人王勝功德。 能除飢渴諸熱惱; 譬如澄潔清冷水, 令樂福者心滿足。 最勝經干亦復然, 如人室有妙寶筬, 隨所受用悉從心; 最勝經王亦復然, 福德隨心無所乏。 汝等天主及天眾, 應當供養此經王; 智慧威神皆具足。 若能依教奉持經, 咸共護念此經王; 現在十方一切佛, 見有讀誦及受持, 稱歎善哉甚希有。

若有人能聽此經,

常有百千藥叉眾,

於此世界諸天眾,

悉共聽受此經王,

若人聽受此經王,

增益一切人天眾,

威德勇猛常自在; 今離衰惱益光明。 1

身心踊躍牛歡喜;

隨所住處護斯人。

其數無量不思議;

歡喜護持無狠轉。

爾時四天王聞是頌已,歡喜踊躍,白佛言:「世尊!我從昔來未曾得聞如是甚深微妙之法。」心生悲喜,涕淚交流,舉身戰動,證不思議希有之事,以天曼陀羅花、摩訶曼陀羅花而散佛上。作是殊勝供養佛已,白佛言:「世尊!我等四王各有五百藥叉眷屬,常當處處擁護是經及說法師,以智光明而為助衛。若於此經所有句義忘失之處,我皆令彼憶念不忘,并與陀羅尼殊勝法門令得具足。復欲令此最勝經王所在之處,為諸眾生廣宣流布,不速隱沒。」

爾時,世尊於大眾中說是法時,無量眾生皆得大智聰叡辯才,攝受無量福德之聚,離諸憂惱,發喜樂心,善明眾論,登出離道,不復退轉,速證菩提。

金光明最勝王經卷第六

大唐三藏沙門義淨奉 制譯

無染著陀羅尼品第十三

爾時,世尊告具壽舍利子:「今有法門,名無染著陀羅尼,是諸菩薩所修行法,過去菩薩之所受持,是菩薩母。」

說是語已,具壽舍利子白佛言:「世尊!陀羅尼者,是何句義?世尊!陀羅尼者,非方處、非非方處。」

作是語已,佛告舍利子:「善哉!善哉!舍利子!汝於大乘已能發起,信解大乘,尊重大乘。如汝所說,陀羅尼者,非方處、非非方處,非法、非非法,非過去、非未來、非現在,非事、非非事,非緣、非非緣,非行、非非行,無有法生,亦無法滅。然為利益諸菩薩故,作如是說。於此陀羅尼功用正道理趣勢力安立,即是諸佛功德,諸佛禁戒,諸佛所學,諸佛祕意,諸佛生處,故名無染著陀羅尼最妙法門。」

作是語已,舍利子白佛言:「世尊!惟願善逝為我說此陀羅尼法。 若諸菩薩能安住者,於無上菩提不復退轉,成就正願,得無所依, 自性辯才,獲希有事,安住聖道,皆由得此陀羅尼故。」

佛告舍利子:「善哉!善哉!如是!如是!如汝所說。若有菩薩得此陀羅尼者,應知是人與佛無異。若有供養尊重、承事供給此菩薩者,應知即是供養於佛。舍利子!若有餘人聞此陀羅尼,受持讀誦生信解者,亦應如是恭敬供養,與佛無異,以是因緣獲無上果。」

爾時世尊即為演說陀羅尼曰:

「恒姪他 刪陀喇儞 嗢多喇儞 蘇三鉢囉底瑟恥哆 蘇那麼 蘇 鉢喇底瑟恥哆鼻逝也 跋羅 薩底也 鉢喇底慎若 蘇阿 嚧訶 慎若那末底 嗢波彈儞 阿伐那末底 阿毘師彈儞 阿鞞毘耶訶 囉 輸婆 伐底 蘇尼室唎多(引)薄虎郡社(引)阿毘婆默(引)莎訶」

佛告舍利子:「此無染著陀羅尼句,若有菩薩能善安住、能正受持者,當知是人若於一劫、若百劫、若千劫、若百千劫,所發正願無有窮盡,身亦不被刀杖、毒藥、水火、猛獸之所損害。何以故?舍利子!此無染著陀羅尼,是過去諸佛母,未來諸佛母,現在諸佛母。舍利子!若復有人以十阿僧企耶三千大千世界滿中七寶,奉施諸佛,及以上妙衣服、飲食種種供養,經無數劫;若復有人於此陀羅尼,乃至一句能受持者,所生之福,倍多於彼。何以故?舍利子!此無染著陀羅尼甚深法門,是諸佛母故。」

時具壽舍利子及諸大眾聞是法已,皆大歡喜,咸願受持。

金光明最勝王經如意寶珠品第十四

爾時,世尊於大眾中,告阿難陀曰:「汝等當知,有陀羅尼名如意寶珠,遠離一切災厄,亦能遮止諸惡雷電,過去如來、應、正等覺所共宣說。我於今時於此經中,亦為汝等大眾宣說,能於人天為大利益,哀愍世間,擁護一切,令得安樂。」時諸大眾及阿難陀聞佛語已,各各至誠瞻仰世尊,聽受神呪。

佛言:「汝等諦聽,於此東方有光明電王,名阿揭多;南方有光明電王,名設羝嚕;西方有光明電王,名主多光;北方有光明電王,名蘇多末尼。若有善男子、善女人得聞如是電王名字,及知方處者,此人即便遠離一切怖畏之事,及諸災橫悉皆消殄。若於住處書此四方電王名者,於所住處無雷電怖,亦無災厄及諸障惱,非時狂死,悉皆遠離。」

爾時世尊即說呪曰:

「怛姪他 儞弭 儞弭 儞弭 尼民達哩 窒哩盧迦 盧羯儞 窒 哩輸攞波儞 曷[□*洛]叉 曷[□*洛]叉

「我某甲及此住處,一切恐怖所有苦惱雷電霹靂,乃至抂死,悉皆 遠離,莎訶。」

爾時觀自在菩薩摩訶薩在大眾中,即從座起,偏袒右肩,合掌恭敬,白佛言:「世尊!我今亦於佛前,略說如意寶珠神呪,於諸人天為大利益,哀愍世間,擁護一切,令得安樂,有大威力,所求如意。」即說呪曰:

「怛姪他 喝帝 毘喝帝 儞喝帝 鉢喇窒體雞 鉢喇底(丁履反)蜜室曬 戍提 目羝毘末麗 鉢喇婆莎(蘇活反)囇 安茶(入聲)曬般茶曬稅(平聲)帝 般茶囉婆死儞 喝囇羯茶(引)囇 劫畢麗 氷揭羅惡綺 達地目企 曷[□*洛]叉 曷[□*洛]叉

「我某甲及此住處,一切恐怖所有苦惱,乃至抂死,悉皆遠離,願 我莫見罪惡之事,常蒙聖觀自在菩薩大悲威光之所護念,莎訶。」

爾時,執金剛祕密主菩薩,即從座起,合掌恭敬,白佛言:「世尊!我今亦說陀羅尼呪,名曰無勝,於諸人天為大利益,哀愍世間,擁護一切,有大威力,所求如願。」即說呪曰:

「怛姪他 母儞母儞 母尼囇 末底末底 蘇末底 莫訶末底 呵呵呵 磨婆 以那悉底帝(引) 波跛 跋折攞波儞 惡甜(火含反)姪 嘌茶(上)莎訶

「世尊!我此神呪名曰無勝擁護,若有男女一心受持,書寫讀誦, 憶念不忘,我於書夜,常護是人,於一切恐怖乃至抂死,悉皆遠 離。」

爾時,索訶世界主梵天王,即從座起,合掌恭敬,白佛言:「世尊!我亦有陀羅尼微妙法門,於諸人天為大利益,哀愍世間,擁護一切,有大威力,所求如願。」即說呪曰:

「怛姪他 醯哩 弭哩 地哩 莎訶 跋囉甜魔布囇 跋囉甜麼末泥 跋囉甜麼揭鞞 補澁跛僧悉怛囇 莎訶

「世尊!我此神呪名曰梵治,悉能擁護持是呪者,令離憂惱及諸罪業,乃至抂死,悉皆遠離。」

爾時,帝釋天主即從座起,合掌恭敬,白佛言:「世尊!我亦有陀羅尼,名跋折羅扇儞,是大明呪,能除一切恐怖厄難,乃至抂死,悉皆遠離,拔苦與樂,利益人天。」即說呪曰:

「恒姪他 毘儞 婆喇儞 畔陀麼彈滯磨膩儞撴 爾瞿哩 健陀 哩 旃茶哩 摩登耆(上)卜 羯死 薩囉跋曞鞞(去) 呬娜末低 答麼 嗢多喇儞 莫呼喇儞 達喇儞 計斫羯囉婆抧 捨伐哩 奢伐 哩 莎訶」

爾時,多聞天王、持國天王、增長天王、廣目天王俱從座起,合掌恭敬,白佛言:「世尊!我今亦有神呪,名施一切眾生無畏,於諸苦惱常為擁護,令得安樂,增益壽命,無諸患苦,乃至抂死,悉皆遠離。」即說呪曰:

「但姪他補澁閉 蘇補澁閉 度麼鉢咧呵囇 阿囄耶鉢喇設悉帝扇帝涅 目帝忙揭例窣覩帝 悉哆鼻帝 莎訶」

爾時,復有諸大龍王,所謂末那斯龍王、電光龍王、無熱池龍王、電舌龍王、妙光龍王,俱從座起,合掌恭敬,白佛言:「世尊!我亦有如意寶珠陀羅尼,能遮惡電,除諸恐怖,能於人天為大利益,

哀愍世間,擁護一切,有大威力,所求如願,乃至抂死,悉皆遠離,一切毒藥皆令止息,一切造作蠱道呪術不吉祥事悉令除滅。我今以此神呪奉獻世尊,惟願哀愍慈悲納受,當令我等離此龍趣永捨慳貪。何以故?由此慳貪於生死中受諸苦惱,我等願斷慳貪種子。」即說呪曰:

「怛姪他 阿折囇 阿末囇 阿蜜嘌諦 惡叉裔 阿弊裔 奔尼鉢 唎耶栗諦 薩婆波跛 鉢喇苫摩尼裔 莎訶 阿離裔般豆 蘇波尼 裔莎訶

「世尊!若有善男子、善女人,口中說此陀羅尼明呪,或書經卷, 受持讀誦、恭敬供養者,終無雷電霹靂,及諸恐怖苦惱憂患,乃至 狂死,悉皆遠離;所有毒藥蠱魅厭禱,害人虎狼師子毒蛇之類,乃 至蚊虻悉不為害。」

爾時,世尊普告大眾:「善哉!善哉!此等神咒皆有大力,能隨眾生心所求事,悉令圓滿,為大利益,除不至心;汝等勿疑。」時諸大眾聞佛語已,歡喜信受。

金光明最勝王經大辯才天女品第十五之一

爾時大辯才天女於大眾中,即從座起,頂禮佛足,白佛言:「世尊!若有法師,說是《金光明最勝王經》者,我當益其智慧,具足莊嚴言說之辯;若彼法師於此經中文字句義所有忘失,皆令憶持,能善開悟,復與陀羅尼總持無礙。又此《金光明最勝王經》,為彼有情已於百千佛所種諸善根常受持者,於贍部洲廣行流布,不速隱沒。復令無量有情聞是經典,皆得不可思議捷利辯才無盡大慧,善解眾論及諸伎術,能出生死,速趣無上正等菩提,於現世中增益壽命,資身之具悉令圓滿。世尊!我當為彼持經法師及餘有情,於此經典樂聽聞者,說其呪藥洗浴之法。彼人所有惡星災變與初生時星

屬相違,疫病之苦、鬪諍戰陣、惡夢鬼神、蠱毒厭魅、呪術起屍,如是諸惡為障難者,悉令除滅。諸有智者應作如是洗浴之法,當取香藥三十二味,所謂:

「菖蒲(跋者)、牛黃(瞿盧折娜)、苜蓿香(塞畢力迦)、麝香(莫訶婆伽)、雄黃(末榜眵羅)、合昬樹(尸利灑)、白及(因達囉喝悉哆)、芎藭(闍莫迦)、 猫杞根(苫弭)、松脂(室利薜瑟得迦)、桂皮(咄者)、香附子(目窣哆)、沈香(惡揭嚕)、栴檀(栴檀娜)、零凌香(多揭羅)、丁子(索瞿者)、欝金(茶矩麼)、婆律膏(揭羅娑)、葦香(捺刺柁)、竹黃(鶻路戰娜)、細豆蔻(蘇泣迷羅)、甘松(苦弭哆)、藿香(鉢怛羅)、茅根香(嗢尸羅)、叱脂(薩洛計)、艾納(世黎也)、安息香(窶具攞)、芥子(薩利殺跛)、馬芹(葉婆儞)、龍花鬚(那伽雞薩羅)、白膠(薩折羅婆)、青木(矩瑟侘)。皆等分以布灑星日,一處擣篩,取其香末,當以此呪呪一百八遍。呪曰:

「怛姪他 蘇訖栗帝 訖栗帝訖栗帝劫摩怛里 繕怒羯囉滯 郝羯喇滯 因達囉闍利膩 鑠羯唰滯 鉢設姪囇 阿伐底羯細 計娜矩 覩矩覩 脚迦鼻囇 劫鼻囇劫鼻囇劫毘囉末底(丁里反) 尸羅末底那底度囉末底哩 波伐雉畔稚囇 室曬室囇薩底悉體羝莎訶

「若樂如法洗浴時, 應作增場方八肘; 可於寂靜安隱處, 念所求事不離心。 應途牛糞作其壇, 當以淨潔金銀器, 盛滿美味并乳蜜。 人守護法如常; 於彼壇場四門所, 今四童子好嚴身, 各於一角持瓶水。 於此常燒安息香, 五音之樂聲不絕; 幡蓋莊嚴懸繒綵, 安在增場之四邊。 復於場內置明鏡, 利刀兼箭各四枚; 於壇中心埋大盆, 應以漏版安其上。 亦復安在於增內; 用前香末以和湯, 然後誦呪結其壇。 既作如斯布置已,

「結界呪曰:

「怛姪他 頞喇計 娜也泥(去) 呬囇弭囇祇囇 企企曬莎訶

「如是結界已, 方入於壇內; 呪水三七遍, 散灑於四方。 次可呪香湯, 滿一百八遍; 四邊安幔障, 然後洗浴身。

「呪水呪湯呪曰:

「怛姪他(一) 索揭智(貞勵反,下同)(二) 毘揭智(三) 毘揭荼伐底 (四) 莎訶(五)

「若洗浴訖,其洗浴湯及壇場中供養飲食棄河池內,餘皆收攝。如 是浴已,方著淨衣,既出壇場,入淨室內。呪師教其發弘誓願,永 斷眾惡,常修諸善,於諸有情興大悲心,以是因緣當獲無量隨心福 報。」

復說頌曰:

「若有病苦諸眾生, 種種方藥治不差; 若依如是洗浴法, 并復讀誦斯經典。 常於日夜念不散, 專想慇懃生信心; 所有患苦盡消除, 解脫貧窮足財寶。 四方星辰及日月, 威神擁護得延年; 吉祥安隱福德增, 災變厄難皆除遣。

「次誦護身呪三七編。呪曰:

「恒姪他 三謎 毘三謎 莎訶 索揭滯毘揭滯 莎訶 毘揭茶(亭 耶反) 伐底 莎訶娑揭囉 三步多也莎訶 塞建陀 摩多也莎訶 尼 攞建佗也 莎訶 阿鉢囉市哆 毘[□*梨]耶也 莎訶 呬摩槃 哆 三步多也 莎訶 阿儞蜜攞 薄怛囉也 莎訶 南謨薄伽伐

都 跋囉甜摩寫莎訶 南謨薩囉酸(蘇活)底 莫訶提鼻裔莎訶 悉甸覩漫(此云成就我某甲)曼怛囉鉢拖莎訶 怛喇覩仳姪哆 跋囉甜摩奴末覩 莎訶」

爾時,大辯才天女說洗浴法壇場呪已,前禮佛足,白佛言:「世尊!若有苾芻、苾芻尼、鄔波索迦、鄔波斯迦,受持讀誦、書寫流布是妙經王,如說行者,若在城邑聚落、曠野山林、僧尼住處,我為是人將諸眷屬作天伎樂,來詣其所而為擁護,除諸病苦、流星變怪、疫疾鬪諍、王法所拘、惡夢惡神為障礙者,蠱道厭術悉皆除殄,饒益是等持經之人。苾芻等眾及諸聽者,皆令速渡生死大海,不退菩提。」

爾時,世尊聞是說已,讚辯才天女言:「善哉!善哉!天女!汝能安樂利益無量無邊有情,說此神咒及以香水壇場法式,果報難思。汝當擁護最勝經王,勿令隱沒,常得流通。」爾時,大辯才天女禮佛足已,還復本座。

爾時,法師授記憍陳如婆羅門,承佛威力,於大眾前讚請辯才天女曰:

「聰明勇進辯才天, 人天供養悉應受; 名聞世間遍充滿, 能與一切眾生願。 依高山頂勝住處, 葺茅為室在中居; 恒結軟草以為衣, 在處常翹於一足。 諸天大眾皆來集, 咸同一心申讚請; 惟願智慧辯才天, 以妙言詞施一切。」

爾時,辯才天女即便受請,為說呪曰:

啊只 八囉拏畢唎裔 盧迦浙瑟跚(丑世反) 盧迦失囉瑟耻 盧迦畢 **唎裔 悉馱跋唎帝 毘麼目企(輕利反)輸只折唎 阿鉢唎底喝帝 阿** 鉢喇底喝哆勃地 南母只 南母只 莫訶提鼻鉢喇底近(人)咧唇(火 恨)拏(上)南摩塞迦囉 我某甲勃地 達哩奢呬 勃地 阿鉢喇底喝 婆(上) 跋覩 市婆謎毘輸姪覩 舍悉怛囉輸路迦 曼怛囉畢得 哆 迦婢耶地數 怛姪他 莫訶鉢喇婆鼻 呬里蜜里呬里蜜里 毘 鉫 折喇覩謎勃地 我某甲勃地輸提 薄伽伐點 提毘烙 薩羅酸(蘇 活)點(丁焰反)羯囉(魯家)滯雞由囉雞由囉末底 呬里蜜里呬里蜜里 阿婆訶耶弭 莫訶提鼻勃陀薩帝娜 達摩薩帝娜 僧伽薩帝娜因達 囉薩帝娜 跋嘍拏薩帝娜 裔盧雞薩底婆地娜 羝釤(引)薩帝娜 薩底伐者泥娜阿婆訶耶弭 莫訶提鼻 呬哩蜜哩呬哩蜜哩 毘折喇 想 我某甲勃地 南謨薄伽伐底(丁利反)莫訶提鼻 薩囉酸底 悉甸 覩 曼怛囉鉢陀彌 莎訶」

爾時,辯才天女說是呪已,告婆羅門言:「善哉!大士!能為眾生 求妙辯才及諸珍寶神通智慧,廣利一切,速證菩提,如是應知受持 法式。」即說頌曰:

「先可誦此陀羅尼, 令使純熟無謬失, 歸敬三寶諸天眾, 請求加護願隨小。 敬禮諸佛及法寶, 菩薩獨覺聲聞眾, 次禮梵王并帝釋, 及護世者四天王, 一切常修梵行人, 悉可至誠殷重敬。 可於寂靜蘭若處, 大聲誦前呪讚法; 應在佛像天龍前, 隨其所有修供養。 於彼一切眾生類, 發起慈悲哀愍心; 世尊妙相紫金身, 擊想下念心無亂。 世尊護念說教法, 隨彼根機令習定; 於其句義善思惟, 復依空性而修習。 應在世尊形像前, 一心正念而安坐; 即得妙智三摩地, 并獲最勝陀羅尼。 如來金口演說法, 妙響調伏諸人天; 廣長能覆三千界。 舌相隨緣現希有,

如是諸佛妙音聲, 至誠憶念心無畏; 諸佛皆由發弘願, 得此舌相不思議。 譬如虚空無所著; 官說諸法皆非有, 諸佛音聲及舌相, 整念思量願圓滿。 若見供養辯才天, 或見弟子隨師教; 授此秘法令修學, 尊重隨心皆得成。 應當一心持此法; 若人欲得最上智, 增長福智諸功德, 必定成就勿生疑。 若求財者得多財, 求名稱者獲名稱, 求出離者得解脫, 必定成就勿生疑。 無量無邊諸功德, 隨其內心之所願; 若能如是依行者, 必得成就勿生疑。 應作增場隨大小; 當於淨處著淨衣, 以四淨瓶盛美味, 香花供養可隨時。 懸諸繒綵并幡蓋, 塗香末香遍嚴飾; 供養佛及辯才天, 求見天身皆遂願。 應三七日誦前呪, 可對大辯天神前; 若其不見此天神, 應更用心經九日。 於後夜中猶不見, 更求清淨勝妙處; 供養誦持心無捨。 如法應書辯才天, 晝夜不生於懈怠, 自利利他無窮盡; 於所求願皆成就。 所獲果報施群生, 若不遂意經三月, 六月九月或一年; 殷懃求請心不移, 天眼他心皆悉得。」

爾時,憍陳如婆羅門聞是說已,歡喜踊躍,歎未曾有,告諸大眾,作如是言:「汝等人天一切大眾,如是當知,皆一心聽,我今更欲依世諦法讚彼勝妙辯才天女。」即說頌曰:

「敬禮天女那羅延, 於世界中得自在; 我今讚歎彼尊者, 皆如往昔仙人說。 吉祥成就心安隱, 聰明慙愧有名聞; 為母能生於世間, 勇猛常行大精進。 於軍陣處戰恒勝, 長養調伏心慈忍; 現為閻羅之長姊, 常著青色野蠶衣。 眼目能令見者怖; 好醜容儀皆具有, 歸信之人咸攝受。 無量勝行招世間,

或在山巖深險處, 或居坎窟及河邊; 或在大樹諸叢林, 天女多依此中住。 亦常供養於天女; 假使山林野人輩, 以孔雀羽作幡旗, 於一切時常護世。 師子虎狼恒圍繞, 牛羊雞等亦相依; 振大鈴鐸出音聲, 頻陀山眾皆聞響。 左右恒持日月旗; 或執三戟頭圓髻, 黑月九日十一日, 於此時中當供養。 或現婆蘇大天女, 見有鬪戰心常熟; 觀察一切有情中, 天女最勝無禍者。 與天戰時常得勝; 權現牧牛歡喜女, 能久安住於世間, 亦為和忍及暴惡。 大婆羅門四明法, 幻仆咒等悉皆通; 於天仙中得自在, 能為種子及大地。 諸天女等集會時, 如大海潮必來應; 於諸龍神藥叉眾, 咸為上首能調伏。 於諸女中最梵行, 出言猶如世間主; 若在河津喻橋栰。 於王住處如蓮華, 面貌猶如盛滿月, 具足多聞作依處; 辯才勝出若高峯, 念者皆與為洲渚。 阿蘇羅等諸天眾, 咸共稱讚其功德; 乃至千眼帝釋主, 以殷重心而觀察。 眾生若有悕求事, 悉能今彼速得成; 亦令聰辯具聞持, 於大地中為第一。 於此十方世界中, 如大燈明常普照; 乃至神鬼諸禽獸, 咸皆遂彼所求心。 於諸女中若山峯, 同昔仙人久住世; 如少女天常離欲, **雷語** 插如大世主。 普見世間差別類, 乃至欲界諸天宮; 不見有情能勝者。 唯有天女獨稱尊, 若於戰陣恐怖處, 或見墮在火坑中; 河津險難賊盜時, 悉能今彼除怖畏。 或為怨讎行殺害; 或被王法所枷縛, 若能專注心不移, 決定解脫諸憂苦。 慈悲愍念常現前; 於善惡人皆擁護, 稽首歸依大天女。」 是故我以至誠心,

爾時,婆羅門復以呪讚天女曰:

「敬禮敬禮世間尊, 於諸母中最為勝; 三種世間咸供養, 而貌容儀人樂觀。 種種妙德以嚴身, 目如脩廣青蓮葉; 福智光明名稱滿, 譬如無價末尼珠。 我今讚歎最勝者, 悉能成辦所求心; 直實功德妙吉祥, 譬如蓮花極清淨。 身色端嚴皆樂見, 眾相希有不思議; 於諸念中為最勝。 能放無垢智光明, 猶如師子獸中上, 常以八臂自莊嚴; 各特弓箭刀稍斧, 長杵鐵輪并羂索。 言詞無滯出和音; 端正樂見如滿月, 若有眾牛心願求, 善事隨念今圓滿。 帝釋諸天咸供養, 皆共稱讚可歸依; 眾德能生不思議, 一切時中起恭敬。

「莎訶(此上咒頌是咒亦是讚,若持咒時必先誦之)

「若欲祈請辯才天, 依此呪讚言詞句; 晨朝清淨至誠誦, 於所求事悉隨心。」

爾時,佛告婆羅門:「善哉!善哉!汝能如是利益眾生,施與安樂,讚彼天女,請求加護,獲福無邊。」(此品咒法有略有廣,或開或合前後不同,梵本既多,但依一譯,後勘者知之)

金光明最勝王經卷第七

大唐三藏沙門義淨奉 制譯

大辯才天女品第十五之二

爾時,憍陳如婆羅門說上讚歎及呪讚法,讚辯才天女已,告諸大眾:「仁等!若欲請辯才天女哀愍加護,於現世中得無礙辯,聰明大智,巧妙言詞,博綜奇才,論議文飾,隨意成就無疑滯者,應當如是至誠殷重而請召言:

「南謨佛陀也!南謨達摩也!南謨僧伽也!南謨諸菩薩眾、獨覺、 聲聞一切賢聖!過去現在十方諸佛,悉皆已習真實之語,能隨順說 當機實語,無虛誑語,已於無量俱胝大劫常說實語,有實語者悉皆 隨喜;以不妄語故,出廣長舌能覆於面,覆贍部洲及四天下,能覆 一千、二千、三千世界,普覆十方世界,圓滿周遍,不可思議,能 除一切煩惱炎熱。敬禮敬禮一切諸佛如是舌相,願我某甲皆得成就 微妙辯才,至心歸命。

「敬禮諸佛妙辯才,」諸大菩薩妙辯才, 獨覺聖者妙辯才, 四向四果妙辯才, 四聖諦語妙辯才, 下行正見妙辯才, 梵眾諸仙妙辯才, 大天鳥摩妙辯才, 寒建陀天妙辯才, 摩那斯王妙辩才, 聰明夜天妙辯才, 四大天王妙辯才, 善住天子妙辯才, 金剛密主妙辯才, 吠率怒天妙辯才, 毘摩天女妙辯才, 侍數天神妙辯才, 室唎天女妙辯才, 諸母大母妙辯才, 訶哩底母妙辯才, 諸藥叉神妙辯才, 十方諸王妙辯才, 令得無窮妙辯才。 所有勝業資助我, 敬禮無欺誑, 敬禮解脫者, 敬禮離欲人, 敬禮捨纏蓋,

敬禮心清淨, 敬禮光明者, 敬禮真實語, 敬禮無塵習, 敬禮住勝義, 敬禮大眾主, 敬禮辯才天, 令我詞無礙。 願我所求事, 皆悉速成就; 無病常安隱, 壽命得延長。 善解諸明呪, 勤修菩提道; 求心願早遂。 廣饒 益群生, 我說無誑語; 我說真實語, 天女妙辯才, 令我得成就。 惟願天女來, 令我語無滯; **竦入身口內**, 聰明足辯才。 當得如來辯; 願令我舌根, 由彼語威力, 調伏諸眾生。 我所出語時, 隨事皆成就; 閏者生恭敬, 所作不唐捐。 事不成就者; 若我求辯才, 天女之實語, 皆悉成虚妄。 有作無間罪, 佛語令調伏; 及以阿羅漢, 所有報恩語。 舍利子目連, 世尊眾第一; 斯等真實語, 願我皆成就。 我今皆召請, 佛之聲聞眾, 皆願速來至, 成就我求心, 所求真實語, 皆願無虚許。 上從色究竟, 及以淨居天, 一切梵王眾, 大梵及梵輔, 索訶世界主, 乃至遍三千, 并及諸眷屬, 我今皆請召; 惟願降慈悲, 哀憐同攝受。 及以樂變化; 他化自在天, 想史多天眾, 慈氏當成佛。 夜摩諸天眾, 及三十三天; 四大王眾天, 一切諸天眾。 依妙高山住; 地水火風神, 所有諸眷屬。 七海山神眾, 滿財及五頂, 日月諸星辰; 今世間安隱。 如是諸天眾,

斯等諸天神, 不樂作罪業; 敬禮鬼子母, 及最小愛兒。 天龍藥叉眾, 彭闥 阿蘇羅, 莫呼洛伽等。 及以緊那羅, 我以世尊力, 悉皆申請召; 願降慈悲心, 與我無礙辩。 能了他心者; 一切人天眾, 與我妙辯才。 皆願加神力, 乃至盡虚空, 周遍於法界; 所有含牛類, 與我妙辯才。」

爾時,辯才天女聞是請已,告婆羅門言:「善哉!大士!若有男子女人能依如是呪及呪讚,如前所說受持法式,歸敬三寶,虔心正念,於所求事,皆不唐捐,兼復受持讀誦此《金光明》微妙經典,所願求者,無不果遂,速得成就,除不至心。」時婆羅門,深心歡喜,合掌頂受。

爾時,佛告辯才天女:「善哉!善哉!善女天!汝能流布是妙經王,擁護所有受持經者,及能利益一切眾生,令得安樂,說如是法,施與辯才不可思議,得福無量,諸發心者速趣菩提。」

金光明最勝王經大吉祥天女品第十六

爾時,大吉祥天女即從座起,前禮佛足,合掌恭敬,白佛言:「世尊!我若見有苾芻、苾芻尼、鄔波索迦、鄔波斯迦,受持讀誦,為人解說是《金光明最勝王經》者,我當專心恭敬供養此等法師,所謂飲食、衣服、臥具、醫藥,及餘一切所須資具,皆令圓滿無有乏少。若畫若夜於此經王所有句義,觀察思量,安樂而住,令此經典於贍部洲廣行流布,為彼有情已於無量百千佛所種善根者,常使得聞,不速隱沒。復於無量百千億劫,當受人天種種勝樂,常得豐稔,永除飢饉,一切有情恒受安樂,亦得值遇諸佛世尊,於未來世速證無上大菩提果,永絕三塗輪迴苦難。世尊!我念過去有琉璃金

山寶花光照吉祥功德海如來、應、正等覺,十號具足,我於彼所種 諸善根,由彼如來慈悲愍念威神力故,令我今日隨所念處、隨所視 方、隨所至國,能令無量百千萬億眾生受諸快樂,乃至所須衣服飲 食資生之具,金銀、琉璃、車璩、瑪瑙、珊瑚、虎珀、真珠等寶悉 令充足;若復有人至心讀誦是《金光明最勝王經》,亦當日日燒眾 名香及諸妙花,為我供養彼琉璃金山寶花光照吉祥功德海如來、 應、正等覺,復當每日於三時中稱念我名,別以香花及諸美食供養 於我,亦常聽受此妙經王,得如是福。」而說頌曰:

「由能如是持經故, 自身眷屬離諸衰; 所須衣食無乏時, 威光壽命難窮盡。 能令地味常增長, 諸天降雨隨時節; 令諸天眾咸歡悅, 及以園林穀果神。 叢林果樹並滋榮, 所有苗稼咸成就; 欲求珍財皆滿願, 隨所念者遂其心。」

佛告大吉祥天女:「善哉!善哉!汝能如是憶念昔因,報恩供養, 利益安樂無邊眾生,流布是經,功德無盡。」

金光明最勝王經大吉祥天女增長財物品第十七

爾時,大吉祥天女復白佛言:「世尊!北方薜室羅末拏天王城名有財,去城不遠,有園名曰妙華福光,中有勝殿,七寶所成。世尊!我常住彼。若復有人欲求五穀日日增多、倉庫盈溢者,應當發起敬信之心,淨治一室,瞿摩塗地,應畫我像,種種瓔珞周匝莊嚴;當洗浴身,著淨衣服,塗以名香,入淨室內,發心為我每日三時稱彼佛名及此經名號而申禮敬:『南謨琉璃金山寶花光照吉祥功德海如來!』持諸香花及以種種甘美飲食,至心奉獻,亦以香花及諸飲食供養我像;復持飲食,散擲餘方,施諸神等,實言邀請大吉祥天,發所求願:『若如所言是不虛者,於我所請,勿令空爾。』于時吉

祥天女,知是事已,便生愍念,令其宅中財穀增長。即當誦呪請召 於我,先稱佛名及菩薩名字,一心敬禮:

「南謨一切十方三世諸佛 南謨寶髻佛 南謨無垢光明寶幢佛 南 謨金幢光佛 南謨百金光藏佛 南謨金蓋寶積佛 南謨金花光幢 佛 南謨大燈光佛 南謨大寶幢佛 南謨東方不動佛 南謨南方寶幢佛 南謨西方無量壽佛 南謨北方天鼓音王佛 南謨妙幢菩薩 南謨金光菩薩 南謨金藏菩薩 南謨常啼菩薩 南謨法上菩薩 南 謨善安菩薩

「敬禮如是佛菩薩已,次當誦呪請召我大吉祥天女。由此呪力,所求之事皆得成就。」即說呪曰:

「南謨室唎莫訶天女 怛姪他 鉢唎脯[口*律]拏折囇 三曼頻 達喇設泥(去聲,下皆同爾)莫訶毘訶囉揭諦 三曼哆毘曇末泥 莫訶 迦哩也 鉢喇底瑟侘鉢泥 薩婆頞 他娑彈泥 蘇鉢喇底晡囇 屙 耶娜達摩多莫訶毘俱比諦 莫訶迷咄嚕 鄔波僧呬羝 莫訶頡唎 使 蘇僧近(入聲)哩呬羝 三曼多頞他 阿奴波喇泥 莎訶

「世尊!若人誦持如是神呪請召我時,我聞請已,即至其所,令願得遂。世尊!是灌頂法句,定成就句,真實之句,無虛誑句,是平等行,於諸眾生是正善根。若有受持讀誦呪者,應七日七夜受八支戒,於晨朝時先嚼齒木淨澡漱已,及於晡後香花供養一切諸佛,自陳其罪。當為己身及諸含識迴向發願,令所悕求速得成就。淨治一室,或在空閑阿蘭若處,瞿摩為壇,燒栴檀香,而為供養。置一勝座,幡蓋莊嚴,以諸名花布列壇內,應當至心誦持前呪,悕望我至。我於爾時即便護念觀察是人,來入其室,就座而坐,受其供養。從是以後,當令彼人於睡夢中得見於我,隨所求事以實告知。若聚落空澤及僧住處,隨所求者,皆令圓滿,金銀財寶、牛羊穀麥、飲食衣服,皆得隨心受諸快樂。既得如是勝妙果報,當以上分

供養三寶,及施於我,廣修法會,設諸飲食,布列香花。既供養已,所有供養貨之取直,復為供養。我當終身常住於此,擁護是人,令無闕乏,隨所悕求,悉皆稱意。亦當時時給濟貧乏,不應慳惜,獨為己身。常讀是經,供養不絕,當以此福普施一切,迴向菩提,願出生死,速得解脫。」

爾時,世尊讚言:「善哉!吉祥天女!汝能如是流布此經,不可思議,自他俱益。」

金光明最勝王經堅牢地神品第十八

爾時,堅牢地神即於眾中,從座而起,合掌恭敬而白佛言:「世 尊!是《金光明最勝王經》,若現在世,若未來世,若在城邑聚 落、王宮樓觀,及阿蘭若、山澤空林,有此經王流布之處,世尊! 我當往詣其所,供養恭敬擁護流通。若有方處為說法師敷置高座演 說經者,我以神力不現本身,在於座所,頂戴其足;我得聞法,深 心歡喜,得飡法味,增益威光,慶悅無量。自身既得如是利益,亦 今大地深十六萬八千踰繕那,至金剛輪際,今其地味悉皆增益,乃 至四海所有土地,亦使肥濃田疇沃壤倍勝常日。亦復今此贍部洲中 江河池沼,所有諸樹藥草叢林,種種花果根莖枝葉及諸苗稼,形相 可愛,眾所樂觀,色香具足,皆堪受用。若諸有情受用如是勝飲食 已,長命色力,諸根安隱,增益光輝,無諸痛惱,心慧勇健,無不 堪能。又此大地凡有所須,百千事業悉皆周備。世尊!以是因緣, 諸贍部洲安隱豐樂,人民熾盛,無諸衰惱,所有眾生皆受安樂。既 受如是身心快樂,於此經王深加愛敬,所在之處皆願受持供養,恭 敬尊重讚歎。又復於彼說法大師法座之處,悉皆往彼,為諸眾生勸 請說是最勝經王。何以故?世尊!由說此經,我之自身并諸眷屬咸 蒙利益,光輝氣力,勇猛威勢,顏容端正,倍勝於常。世尊!我堅 牢地神蒙法味已,今瞻部洲縱廣七千踰繕那地,皆悉沃壤乃至如 前,所有眾生皆受安樂。是故,世尊!時彼眾生為報我恩,應作是 念:『我當必定聽受是經,恭敬供養,尊重讚歎。』作是念已,即從住處城邑聚落、舍宅空地,詣法會所,頂禮法師,聽受是經。既聽受已,各還本處,心生慶喜,共作是言:『我等今者得聞甚深無上妙法,即是攝受不可思議功德之聚,由經力故,我等當值無量無邊百千俱胝那庾多佛,承事供養,永離三塗極苦之處,復於來世百千生中,常生天上,及在人間受諸勝樂。』時彼諸人各還本處,為諸人眾說是經王,若一喻、一品、一昔因緣、一如來名、一菩薩名、一四句頌、或復一句,為諸眾生說是經典,乃至首題名字。世尊!隨諸眾生所住之處,其地悉皆沃壤肥濃,過於餘處。凡是土地所生之物,悉得增長滋茂廣大,令諸眾生受於快樂,多饒珍財,好行惠施,心常堅固,深信三寶。」

作是語已,爾時,世尊告堅牢地神曰:「若有眾生,聞是金光明最勝經王乃至一句,命終之後,當得往生三十三天及餘天處。若有眾生為欲供養是經王故,莊嚴宅宇,乃至張一傘蓋、懸一繒幡,由是因緣,六天之上,如念受生,七寶妙宮,隨意受用,各各自然有七千天女,共相娛樂,日夜常受不可思議殊勝之樂。」

作是語已,爾時,堅牢地神白佛言:「世尊!以是因緣,若有四眾,昇於法座,說是法時,我當畫夜擁護是人,自隱其身在於座所,頂戴其足。世尊!如是經典為彼眾生已於百千佛所種善根者,於贍部洲流布不滅。是諸眾生聽斯經者,於未來世無量百千俱胝那庾多劫,天上人中常受勝樂,得遇諸佛,速成阿耨多羅三藐三菩提,不歷三塗生死之苦。」

爾時,堅牢地神白佛言:「世尊!我有心呪,能利人天,安樂一切,若有男子女人及諸四眾,欲得親見我真身者,應當至心持此陀羅尼,隨其所願,皆悉遂心,所謂資財珍寶伏藏,及求神通,長年妙藥并療眾病,降伏怨敵,制諸異論。當於淨室安置道場,洗浴身已,著鮮潔衣,踞草座上,於有舍利尊像之前,或有舍利制底之

所,燒香散花,飲食供養。於白月八日布灑星合,即可誦此請召之 呪:

「怛姪他只哩只哩 主嚕主嚕 句嚕句嚕 拘柱拘柱 覩柱覩柱 縛訶(上) 縛訶 伐捨伐捨 莎訶

「世尊!此之神呪,若有四眾,誦一百八遍請召於我,我為是人即來赴請。又復,世尊!若有眾生欲得見我現身共語者,亦應如前安置法式,誦此神呪:

「怛姪他 頞折泥(去) 頡力剎泥室尼達哩訶訶呬呬區嚕 伐囇 莎訶

「世尊!若人持此呪時,應誦一百八遍,并誦前呪,我必現身,隨 其所願,悉得成就,終不處然。若欲誦此呪時,先誦護身呪曰:

「怛姪他儞室里末捨羯敪 捺掇矩敪 勃地(上) 勃地囇 婢敪婢 敪 矩句敪 佉婆(上)只里 莎訶

「世尊!誦此呪時,取五色線,誦呪二十一遍,作二十一結,繫在 左臂肘後,即便護身,無有所懼。若有至心誦此呪者,所求必遂, 我不妄語,我以佛法僧寶而為要契證知是實。」

爾時,世尊告地神曰:「善哉!善哉!汝能以是實語神呪,護此經王及說法者,以是因緣令汝獲得無量福報。」

金光明最勝王經僧慎爾耶藥叉大將品第十九

爾時,僧慎爾耶藥叉大將,并與二十八部藥叉諸神,於大眾中皆從 座起,偏袒右局,右膝著地,合掌向佛白言:「世尊!此金光明最 勝經王,若現在世及未來世,所在宣揚流布之處,若於城邑聚落、 山澤空林,或王宮殿或僧住處,世尊!我僧慎爾耶藥叉大將,并與

二十八部藥叉諸神俱詣其所,各自隱形,隨處擁護彼說法師,令離 衰惱,常受安樂。及聽法者,若男若女,童男童女,於此經中乃至 受持一四句頌,或持一句,或此經王首題名號,及此經中一如來 名,一菩薩名,發心稱念,恭敬供養者,我當救護攝受,令無災 横,離苦得樂。世尊!何故我名正了知?此之因緣,是佛親證,我 知諸法,我曉一切法,隨所有一切法,如所有一切法,諸法種類體 性差別,世尊!如是諸法,我能了知。我有難思智光,我有難思智 炬,我有難思智行,我有難思智聚,我於難思智境而能通達。世 尊!如我於一切法,正知正曉正覺,能正觀察。世尊!以是因緣, 我藥叉大將名正了知。以是義故,我能令彼說法之師,言詞辯了, 具足莊嚴,亦令精氣從毛孔入,身力充足,威神勇健,難思智光皆 得成就,得正憶念,無有退屈,增益彼身,令無衰減,諸根安樂, 常生歡喜。以是因緣,為彼有情,已於百千佛所植諸善根修福業 者,於贍部洲廣宣流布,不速隱沒。彼諸有情聞是經已,得不可思 議大智光明,及以無量福智之聚,於未來世,當受無量俱胝那庾多 劫不可思量人天勝樂,常與諸佛共相值遇,速證無上正等菩提,閻 羅之界三塗極苦,不復經過。」

爾時,正了知藥叉大將白佛言:「世尊!我有陀羅尼,今對佛前親自陳說,為欲饒益憐愍諸有情故。」即說呪曰:

「南謨佛陀(引)也 南謨達摩(引)也 南謨僧伽(引)也 南謨跋囉蚶(火含反)摩也 南謨因達囉也 南謨折咄喃 莫喝囉闍喃 怛姪他呬哩呬哩 弭哩弭哩 瞿哩 莫訶瞿哩 健陀哩 莫訶健陀哩 達羅珥雉 莫訶達羅珥雉 單茶曲勸(點問反)第(去)訶訶訶訶 呬呬呬呬呵 呼呼呼呼呼 漢魯曇謎瞿曇謎 者者者者 只只只只主主主主持茶攝(之涉反) 鉢攞 尸揭囉(上)尸揭囉 嗢底瑟咤呬 薄伽梵 僧慎爾耶 莎訶

「若復有人於此明呪能受持者,我當給與資生樂具、飲食衣服、花果珍異,或求男女、童男童女、金銀珍寶諸瓔珞具,我皆供給,隨所願求,令無闕乏。此之明呪有大威力,若誦呪時,我當速至其所,令無障礙,隨意成就。若持此呪時,應知其法,先畫一鋪僧慎爾耶藥叉形像,高四五尺,手執鉾鑹,於此像前作四方壇,安四滿瓶蜜水,或沙糖水,塗香粽香燒香及諸花鬘。又於壇前作地火爐,中安炭火,以蘇摩芥子燒於爐中,口誦前呪一百八遍,一遍一燒。乃至我藥叉大將自來現身,問呪人曰:『爾何所須?意所求者?』即以事答,我即隨言於所求事皆令滿足。或須金銀及諸伏藏,或欲神仙乘空而去,或求天眼通,或知他心事,於一切有情隨意自在,令斷煩惱,速得解脫,皆得成就。」

爾時,世尊告正了知藥叉大將曰:「善哉!善哉!汝能如是利益一切眾生,說此神呪,擁護正法,福利無邊。」

金光明最勝王經王法正論品第二十

爾時,此大地神女,名曰堅牢,於大眾中,從座而起,頂禮佛足, 合掌恭敬白佛言:「世尊!於諸國中為人王者,若無正法,不能治 國安養眾生,及以自身長居勝位;惟願世尊慈悲哀愍,當為我說王 法正論治國之要,令諸人王得聞法已,如說修行,正化於世,能令 勝位永保安寧,國內人民咸蒙利益。」

爾時,世尊於大眾中,告堅牢地神曰:「汝當諦聽!過去有王,名力尊幢,其王有子,名曰妙幢,受灌頂位未久之頃,爾時父王告妙幢言:『有王法正論,名天主教法,我於昔時受灌頂位而為國主,我之父王,名智力尊幢,為我說是王法正論。我依此論,於二萬歲善治國土,我不曾憶起一念心行於非法,汝於今日亦應如是,勿以非法而治於國。云何名為王法正論?汝今善聽,當為汝說。』爾時力尊幢王,即為其子以妙伽他說正論曰:

```
「『我說王法論,
          利安諸有情;
為斷世間疑,
        滅除眾過失。
一切諸天主,
        及以人中王;
當生歡喜心,
        合掌聽我說。
往昔諸天眾,
        集在金剛山;
        請問於大梵:
四王從座起,
「梵主最勝尊,
         天中大自在;
願哀愍我等,
        為斷諸疑惑。
云何處人世,
        而得名為天?
        號名曰天子?
復以何因緣,
云何生人間,
        獨得為人主?
        復得作天王?
云何在天上,
如是護世間,
        問彼梵王已。
爾時梵天主,
        即便為彼說:
「護世汝當知,
         為利有情故;
問我治國法,
        我說應善聽。
        牛天得作王;
由先善業力,
若在於人中,
        統領為人主。
諸天共加護,
        然後入母胎;
既至母胎中,
        諸天復守護。
雖生在人世,
        尊勝故名天;
由諸天護持,
        亦得名天子。
三十三天主,
        分力助人王;
及一切諸天,
        亦資自在力。
除滅諸非法,
        惡業今不生;
        使得牛天上。
教有情修善,
        并排闥婆等;
人及蘇羅眾,
羅剎梅茶羅,
        悉皆資半力。
        令捨惡修善;
父母資半力,
諸天共護持,
        示其諸善報。
若造諸惡業,
        令於現世中;
諸天不護持,
        示其諸惡報。
        王捨不禁制;
國人 造惡業,
斯非順正理,
        治擯當如法。
若見惡不遮,
        非法便滋長;
遂令王國內,
        姦詐日增多。
        造惡不遮止;
王見國中人,
三十三天眾,
        咸牛忿怒心。
```

因此損國政, 諂偽行世間; 被他怨敵侵, 破壞其國十。 積財皆散失; 居家及資具, 種種諂誑生, 更互相侵奪。 由正法得王, 而不行其法; 國人皆破散, 如象踏蓮池。 惡風起無恒, 暴雨非時下; 日月蝕無光。 妖星多變怪, 万穀眾花果, 果實皆不成; 國十漕飢饉, 由王捨正法。 若王捨正法, 以惡法化人; 諸天處本宮, 見已生憂惱。 彼諸天王眾, 共作如是言: 『此王作非法, 惡黨相親附。 王位不久安, 諸天皆忿恨。』 由彼懷忿故, 其國當敗亡。 以非法教人, 流行於國內; 疾疫生眾苦。 鬪諍多姦偽, 天主不護念, 餘天咸捨棄; 國十當滅亡, 王身受苦厄。 兄弟并姊妹; 父母及妻子, 乃至身亡殁。 俱遭愛別離, 變怪流星墮, 二日俱時出; 他方怨賊來, 國人遭喪亂。 國所重大臣, 枉横而身死; 所愛象馬等, 亦復皆散失。 人多非法死; 處處有兵戈, 惡鬼來入國, 疾疫遍流行。 國中最大臣, 及以諸輔相; 其心懷諂侫, 並悉行非法。 見行非法者, 而生於愛敬; 於行善法人, 苦楚而治罰。 由愛敬惡人, 治罰善人故; 星宿及風雨, 皆不以時行。 正法當隱沒; 有三種過生, 眾生無光色, 地肥皆下沈。 由敬惡輕善, 復有三種過; 飢疫苦流行。 非時降霜雹,

穀稼諸果實, 滋味 皆損減; 於其國土中, 眾生多疾病。 國中諸樹木, 先生甘美果; 由斯皆損減, 苦澁無滋味。 可愛遊戲處; 先有妙園林, 忽然皆枯悴, 見者生憂惱。 美味漸消亡; 稻麥諸果實, 何能長諸大。 食時心不喜, 眾生光色减, 勢力盡衰微; 食噉雖復多, 不能令飽足。 於其國界中, 所有眾生類; 少力無勇勢, 所作不堪能。 眾苦逼其身; 國人多疾患, 隨處生羅剎。 鬼魅漏流行, 若王作非法, 親近於惡人; 令三種世間, 因斯受衰損。 出在於國中; 如是無邊禍, 皆由見惡人, 棄捨不治擯。 由諸天加護, 得作於國王; 而不以正法, 守護於國界。 當得生天上; 若人修善行, 若造惡業者, 死必墮三淦。 若王見國人, 縱其浩渦失; 三十三天眾, 皆生熱惱心。 不順諸天教, 及以父母言; 非王非孝子。 此是非法人, 若於自國中, 見行非法者; 如法當治罰, 不應生捨棄。 是故諸天眾, 皆護持此王; 以滅諸惡法, 能修善根故。 王於此世中, 必招於現報; 由於善惡業, 行捨勸眾生。 為示善惡報, 故得作人王; 諸天共護持, 一切咸隨喜。 治國以正法; 由自利利他, 見有諮侫者, 應當如法治。 及以害命緣; 假使失王位, 見惡而捨棄。 終不行惡法,

```
害中極重者,
        無過失國位;
        為此當治罰。
皆因諂侫人,
若有諂誑人,
        當失於國位;
由斯損王政,
        如象入花園。
        阿蘇羅亦然;
天主皆瞋恨,
以彼為人王,
        不以法治國。
        治罰於惡人;
是故應如法,
以善化眾生,
        不順於非法。
寧捨於身命,
        不隨非法友;
        平等觀一切。
於親及非親,
若為正法王,
        國內無偏黨;
法王有名稱,
        普聞三界中。
三十三天眾,
        歡喜作是言:
         彼即是我子。
以善化眾生,
        正法治於國;
        當令生我宮。』
勸行於正法,
        及以蘇羅眾;
天及諸天子,
因王正法化,
        常得心歡喜。
天眾皆歡喜,
        共護於人王;
眾星依位行,
        日月無乖度。
和風常應節,
        甘雨順時行;
苗實皆善成,
        人無飢饉者。
一切諸天眾,
        充滿於自宮;
是故汝人王,
        亡身弘正法。
        由斯眾安樂;
應尊重法寶,
常當親正法,
        功德自莊嚴。
眷屬常歡喜,
        能遠離諸惡;
以法化眾生,
        恒令得安隱。
令彼一切人,
        修行於十善;
率土常豐樂,
        國土得安寧。
王以法化人,
        善調於惡行;
        安樂諸眾生。」』」
常得好名稱,
```

爾時,大地一切人王及諸大眾,聞佛說此古昔人王治國要法,得未曾有,皆大歡喜,信受奉行。

金光明最勝王經卷第八

大唐三藏沙門義淨奉 制譯

善生王品第二十一

爾時,世尊為諸大眾說王法正論已,復告大眾:「汝等應聽!我今 為汝說其往昔奉法因緣。」即於是時,說伽他曰:

「我昔曾為轉輪王, 捨此大地并大海; 四洲珍寶皆充滿, 持以供養諸如來。 我於往昔無量劫, 為求清淨直法身; 所愛之物皆悉捨, 乃至身命心無悋。 又於過去難思劫, 有正遍知名寶髻; 於彼如來涅槃後, 有干出世名善生。 為轉輪王化四洲, 盡大海際咸歸伏; 時彼輪王於此住。 有城名曰妙音聲, 夜夢聞說佛福智, 見有法師名寶積; 處座端嚴如日輪, 演說金光微妙典。 爾時彼王從夢覺, 生大歡喜充編身; 至天曉已出王宮, 往詣苾芻僧伽處。 恭敬供養聖眾已, 即便問彼諸大眾; 頗有法師名寶積, 功德成就化眾生。 爾時寶積大法師, 在一室中而住止; 正念誦斯微妙典, 端然不動身心樂。 時有芯器引導王, 至彼寶積所居處; 見在室中端身坐, 光明妙相遍其身。 白王此即是寶積, 能持甚深佛行處; 所謂微妙《金光明》 諸經中王最第一。 時王即便禮寶積, 恭敬合掌而致請; 唯願滿月而端嚴, 為說金光微妙法。 寶積法師受王請, 許為說此《金光明》; 周遍三千世界中, 諸天大眾咸歡喜。 奇妙珍寶而嚴飾; 王於廣博清淨處, 上妙香水灑遊塵, 種種雜花皆散布。 即於勝處敷高座, 懸繒幡蓋以莊嚴;

種種糕香及塗香, 香氣芬馥皆周遍。 天龍修羅緊那羅, 莫呼洛伽及藥叉; 諸天悉雨曼陀花, 咸來供養彼高座。 復有千萬億諸天, 樂聞正法俱來集; 法師初從本座起, 咸悉供養以天花。 是時寶積大法師, 淨洗浴已著鮮服; 合掌虔心而禮敬。 詣彼大眾法座所, 悉皆共散曼陀花; 天主天眾及天女, 百千天樂難思議, 住在空中出妙響。 爾時寶積大法師, 即昇高座加趺坐; 念彼十方諸剎土, 百千萬億大慈尊。 遍及一切苦眾生, 皆起平等慈悲念; 為彼請主善生故, 演說微妙《金光明》 王既得聞如是法, 合掌一心唱隨喜; 聞法希有淚交流, 身心大喜皆充遍。 于時國主善生王, 為欲供養此經故; 手持如意末尼寶, 發願咸為諸眾生。 今可於斯贍部洲, 普丽七寶瓔珞具; 所有匱乏資財者, 皆得隨心受安樂。 即便遍雨於七寶, 悉皆充足四洲中; 瓔珞嚴身隨所須, 衣服飲食皆無乏。 見此四洲雨珍寶; 爾時國主善生王, 所有遺教苾芻僧。 咸持供養寶髻佛, 應知過去善生王, 即我釋迦牟尼是; 為於昔時捨大地, 及諸珍寶滿四洲。 昔時寶積大法師, 為彼善生說妙法; 因彼開演經王故, 東方現成不動佛。 合掌一言稱隨喜; 以我曾聽此經王, 及施七寶諸功德, 獲此最勝金剛身。 所有見者皆歡喜; 金光百福相莊嚴, 俱胝天眾亦同然。 一切有情無不愛, 俱胝億劫作輪王; 過去曾經九十九, 亦於小國為人王, 復經無量百千劫。 於無量劫為帝釋, 亦復曾為大梵王; 供養十力大慈尊, 彼之數量難窮盡。 我昔聞經隨喜善, 所有福聚量難知; 獲得法身直妙智。」 中斯福故證菩提,

爾時大眾聞是說已,歎未曾有,皆願奉持《金光明經》流通不絕。

金光明最勝王經諸天藥叉護持品第二十二

爾時,世尊告大吉祥天女曰:「若有淨信善男子、善女人,欲於過去、未來、現在諸佛,以不可思議廣大微妙供養之具而為奉獻,及欲解了三世諸佛甚深行處,是人應當決定至心,隨是經王所在之處,城邑聚落或山澤中,廣為眾生敷演流布;其聽法者應除亂想,攝耳用心。」於時世尊,即為彼天及諸大眾說伽他曰:

「若欲於諸佛, 不思議供養; 復了諸如來, 甚深境界者。 若見演說此, 最勝《金光明》; 應親詣彼方, 至其所住處。 此經難思議, 能生諸功德; 無邊大苦海, 解脫諸有情。 我觀此經干, 初中後皆善; 甚深不可測, 譬喻無能比。 大地塵海水; 假使恒河沙, 虚空諸山石, 無能喻少分。 應先聽是經; 欲入深法界, 法性之制底, 甚深善安住。 於斯制底內, 見我牟尼尊; 悅意妙音聲, 演說斯經典。 由此俱胝劫, 數量難思議; 牛 在 人 天 中 , 常受勝妙樂。 若聽是經者, 應作如是心; 我得不思議, 無邊功德蘊。 假使大火聚, 滿百踰繕那; 為聽此經王, 直禍無辭苦。 得聞如是經; 既至彼住處, 能滅於罪業, 及除諸惡夢。 惡星諸變怪, 蠱道邪魅等; 得聞是經時, 應嚴勝高座, 淨妙若蓮花; 法師處其上, **插如大龍坐。**

```
於斯安坐已,
        說此甚深經;
書寫及誦持,
        并為解其義。
        往詣餘方所;
法師捨此座,
於此高座中,
        神通非一相。
或見法師像,
        猶在高座上;
或時見世尊,
        及以諸菩薩。
或作普賢像,
        或如妙吉祥;
        身處於高座。
或見慈氏尊,
        及以諸天像;
或見希奇相,
        忽然還不現。
暫得覩容儀,
成就諸吉祥,
        所作皆隨意;
功德悉圓滿,
        世尊如是說。
最勝有名稱,
        能滅諸煩惱;
他國賊皆除,
        戰時常得勝。
惡夢悉皆無,
        及消諸毒害;
所作三業罪,
        經力能除滅。
於此贍部洲,
        名稱咸充滿;
        悉皆相捨離。
所有諸怨結,
設有怨敵至,
        閏名便退散;
不假動兵戈,
        兩陣牛歡喜。
        護世四天王;
梵王帝釋主,
及金剛藥叉,
        正了知大將;
        及以娑揭羅;
無熱池龍王,
緊那羅樂神,
        蘇羅金翅主
        并大吉祥天;
大辯才天女,
斯等上首天,
        各領諸天眾,
        法寶不思議,
常供養諸佛,
恒生歡喜心,
        於經起恭敬。
        皆悉共思惟;
斯等諸天眾,
遍觀修福者,
        共作如是說:
『應觀此有情,
         咸是大福德;
        當來生我天。
善根精進力,
        敬心來至此;
為聽甚深經,
供養法制底,
        尊重正法故。
        而作大饒益;
憐愍於眾生,
於此深經典,
        能為法寶器。
入此法門者,
        能入於法性;
於此《金光明》
           至心應聽受。
```

```
是人曾供養,
        無量百千佛;
由彼諸善根,
        得聞此經典。』
如是諸天主,
        天女大辯才;
并彼吉祥天,
        及以四王眾;
        勇猛有神通;
無數藥叉眾,
各於其四方,
        常來相擁護。
日月天帝釋,
        風水火諸神;
        閻羅辯才等;
吠率怒大启,
一切諸護世,
        勇猛具威神;
擁護持經者,
        書夜常不離。
大力藥叉王,
        那羅延自在;
正了知為首,
        二十八藥叉;
餘藥叉百千,
        神通有大力;
恒於恐怖處,
        常來護此人。
金剛藥叉王,
        并五百眷屬;
諸大菩薩眾,
        常來護此人。
        及以滿賢王;
簪王藥叉王,
        賓度羅黃色;
曠野金毘羅,
此等藥叉王,
        各五百眷屬;
見聽此經者,
        皆來共擁護。
彩軍排闥婆,
        葦王常戰勝;
珠頸及青頸,
        并勃里沙王;
        蘇跋拏鷄舍;
大最勝大黑,
半之迦羊足,
        及以大婆伽;
小渠并護法,
        及以獼猴王;
        寶髮皆來護。
針毛及日友,
        栴檀欲中勝;
大渠諾拘羅,
舍羅及雪山,
        及以娑多山;
皆有大神通,
        雄猛具大力;
見持此經者,
        皆來相擁護。
        及以娑揭羅;
阿那婆答多,
月直[醫-西+言]羅葉,
             難陀小難陀;
於百千龍中,
        神通具威德;
        書夜常不離。
共護持經人,
婆稚羅睺羅,
        毘摩質多羅;
母旨苫跋羅,
        大肩及歡喜;
及餘蘇羅王,
        并無數天眾;
大力有勇健,
        皆來護是人。
```

訶利底母神, 五百藥叉眾; 於彼人睡覺, 常來相擁護。 旃荼旃荼利, 藥叉旃稚女; 昆帝拘吒齒, 吸眾生精氣; 如是諸神眾, 大力有神通; 常護持經者, 書夜恒不離。 上首辯才天, 并餘諸眷屬; 吉祥天為首, 此大地神女, 果實園林神; 樹神江河神, 制底諸神等; 如是諸天神, 心生大歡喜; 讀誦此經人。 彼皆來擁護, 見有持經者, 增壽命色力; 威光及福德, 妙相以莊嚴。 星宿現災變, 困厄當此人; 夢見惡徵祥, 皆悉令除滅。 此大地神女, 堅固有威勢; 法味常充足。 由此經力故, 地肥若流下, 過百踰繕那; 地神今味上, 滋潤於大地。 此地厚六十, 八億踰繕那; 乃至金剛際, 地味皆令上。 由聽此經王, 獲大功德蘊; 能使諸天眾, 悉蒙其利益。 復令諸天眾, 威力有光明; 歡喜常安樂, 捨離於衰相。 於此南洲內, 林果苗稼神; 由此經威力, 心常得歡喜。 苗實皆成就, 處處有妙花; 充滿於大地。 果實並滋繁, 所有諸果樹, 及以眾園林; 悉皆生妙花, 香氣常芬馥。 眾草諸樹木, 咸出微妙花; 及生甘美果, 隨處皆充遍。 於此贍部洲, 無量諸龍女; 心生大歡喜, 皆共入池中。 種植鉢頭摩, 及以分陀利; 青白二蓮花, 池中皆遍滿。

由此經威力, 虚空淨無翳; 雲霧皆除遣, 暝闇悉光明。 日出放千光, 無垢焰清淨; 由此經王力, 流暉遶四天。 此經威德力, 資助於天子; 皆用贍部金, 而作於宮殿。 日天子初出, 見此洲歡喜; 常以大光明, 周遍皆照曜。 於斯大地內, 所有蓮花池; 日光照及時, 無不盡開發。 於此贍部洲, 田疇諸果藥; 悉皆今善孰, 充滿於大地。 由此經威力, 日月所照處; 星辰不失度, 風雨皆順時。 國十咸豐樂; 遍此贍部洲, 隨有此經處, 殊勝倍餘方。 若此金光明, 經典流布處; 悉得如上福。」 有能講誦者,

爾時,大吉祥天女及諸天等,聞佛所說,皆大歡喜,於此經王及受 持者,一心擁護,今無憂惱常得安樂。

金光明最勝王經授記品第二十三

爾時,如來於大眾中廣說法已,欲為妙幢菩薩及其二子銀幢銀光,授阿耨多羅三藐三菩提記。時有十千天子,最勝光明而為上首,俱從三十三天來至佛所,頂禮佛足,却坐一面,聽佛說法。爾時,佛告妙幢菩薩言:「汝於來世過無量無數百千萬億那庾多劫已,於金光明世界,當成阿耨多羅三藐三菩提,號金寶山王如來、應、正遍知、明行足、善逝、世間解、無上士、調御丈夫、天人師、佛、世尊,出現於世;時此如來般涅槃後,所有教法亦皆滅盡。時彼長子名曰銀幢,即於此界次補佛處,世界爾時轉名淨幢,當得作佛,名曰金幢光如來、應、正遍知、明行足、善逝、世間解、無上士、調御丈夫、天人師、佛、世尊。時此如來般涅槃後,所有教法亦皆滅御丈夫、天人師、佛、世尊。時此如來般涅槃後,所有教法亦皆滅

盡。次子銀光即補佛處,還於此界當得作佛,號曰金光明如來、 應、正遍知、明行足、善逝、世間解、無上士、調御丈夫、天人 師、佛、世尊。」

是時十千天子聞三大士得授記已,復聞如是最勝王經,心生歡喜,清淨無垢,猶如虛空。爾時,如來知是十千天子善根成熟,即便與授大菩提記:「汝等天子於當來世,過無量無數百千萬億那庾多劫,於最勝因陀羅高幢世界,得成阿耨多羅三藐三菩提,同一種姓,又同一名,號曰面目清淨優鉢羅香山,十號具足,如是次第十千諸佛出現於世。」

爾時,菩提樹神白佛言:「世尊!是十千天子從三十三天,為聽法故,來詣佛所,云何如來便與授記當得成佛?世尊!我未曾聞是諸天子具足修習六波羅蜜多、難行苦行、捨於手足、頭目髓腦、眷屬妻子、象馬車乘、奴婢僕使、宮殿園林、金銀、琉璃、車璩、瑪瑙、珊瑚、虎珀、璧玉、珂貝、飲食衣服、臥具醫藥,如餘無量百千菩薩,以諸供具供養過去無數百千萬億那庾多佛,如是菩薩各經無量無邊劫數,然後方得受菩提記。世尊!是諸天子,以何因緣,修何勝行,種何善根,從彼天來暫時聞法,便得授記?惟願世尊,為我解說斷除疑網。」

佛告樹神:「善女天!如汝所說,皆從勝妙善根因緣,勤苦修已, 方得授記。此諸天子,於妙天宮捨五欲樂,故來聽是《金光明 經》,既聞法已,於是經中心生殷重,如淨琉璃無諸瑕穢,復得聞 此三大菩薩授記之事,亦由過去久修正行誓願因緣,是故我今皆與 授記,於未來世當成阿耨多羅三藐三菩提。」時彼樹神聞佛說已, 歡喜信受。

金光明最勝王經除病品第二十四

佛告菩提樹神善女天:「諦聽!諦聽!善思念之。是十千天子本願 因緣,今為汝說。善女天!過去無量不可思議阿僧企耶劫,爾時有 佛出現於世,名曰寶髻如來、應、正遍知、明行足、善逝、世間 解、無上十、調御丈夫、天人師、佛、世尊。善女天!時彼世尊般 涅槃後,正法滅已,於像法中,有王名曰天自在光,常以正法化於 人民,猶如父母。是王國中,有一長者名曰持水,善解醫明,妙通 八術,眾生病苦,四大不調,咸能救療。善女天!爾時持水長者, 唯有一子,名曰流水,顏容端正,人所樂觀,受性聰敏,妙閑諸 論,書畫算印,無不通達。時王國內有無量百千諸眾生類,皆遇疫 疾,眾苦所逼,乃至無有歡樂之心。善女天!爾時長者子流水,見 是無量百千眾生受諸病苦,起大悲心,作如是念:『無量眾生為諸 極苦之所逼迫,我父長者,雖善醫方,妙通八術,能療眾病,四大 增損,然已衰邁,老耄虛羸,要假扶策,方能進步,不復能往城邑 聚落救諸病苦。今有無量百千眾生,皆遇重病,無能救者,我今當 至大醫父所,諮問治病醫方祕法,若得解已,當往城邑聚落之所, 救諸眾生種種疾病,令於長夜得受安樂。』時長者子作是念已,即 詣父所,稽首禮足,合掌恭敬,却住一面,即以伽他,請其父曰:

「『慈父當哀愍, 我欲救眾生;

今請諸醫方, 幸願為我說。

云何身衰壞, 諸大有增損?

復在何時中, 能生諸疾病?

云何噉飲食, 得受於安樂,

能使內身中, 火熱不衰損?

眾牛有四病, 風黃熱痰癊;

及以總集病, 云何而療治?

何時風病起? 何時熱病發?

何時動痰癊? 何時總集生?』

「時彼長者聞子請已,復以伽他而答之曰:

「『我今依古仙, 所有療病法;

次第為汝說, 善聽救眾生。 三月是春時, 三月名為夏, 三月名秋分, 三月謂冬時。 此據一年中, 三三而別說; 二二為一節, 便成歲六時。 初二是花時, 三四名熱際; 五六名雨際, 七八謂秋時; 九十是寒時, 後二名氷雪; 既知如是别, 授藥勿令差。 當隨此時中, 調息於飲食; 入腹令消散, 眾病則不生。 節氣若變改, 四大有推移; 必生於病苦。 此時無藥資, 醫人解四時, 復知其六節; 明閑身七界, 食藥使無差。 謂味界血肉, 膏骨及髓腦; 病入此中時, 知其可療不? 謂風熱痰癊; 病有四種別, 及以總集病, 應知發動時。 春中痰癊動, 夏内風病牛; 秋時黃熱增, 冬節三俱起。 春食澁熱辛, 夏膩熱醎醋; 冬酸澁膩甜。 秋時冷甜膩, 於此四時中, 服藥及飲食; 若依如是味, 眾病無由生。 食後病由癊, 食消時由熱; 消後起由風, 准時須識病。 隨病而設藥; 既識病源已, 假令患狀殊, 先須療其本。 患熱利為良; 風病服油膩, 癊病應變叶, 總集須三藥。 風熱癊俱有, 是名為總集; 雖知病起時, 應觀其本性。 如是觀知已, 順時而授藥; 飲食藥無差, 斯名善醫者。 復應知八術, 總攝諸醫方; 於此若明閑, 可療眾生病。 謂針刺傷破, 身疾并鬼神;

延年增氣力。 惡毒及孩童, 先觀彼形色, 語言及性行; 然後問其夢, 知風熱癊殊。 其心無定住; 乾瘦少頭髮, 多語夢飛行, 斯人是風性。 少年生白髮, 多汗及多瞋; 聰明夢見火, 斯人是熱性。 心定身平整, 盧審頭津膩; 夢見水白物, 是癊性應知。 或二或具三; 總集性俱有, 隨有一偏增, 應知是其性。 既知本性已, 准病而授藥; 驗其無死相, 方名可救人。 諸根倒取境, 尊醫人起慢; 親友牛瞋恚, 是死相應知。 左眼白色變, 舌黑鼻梁攲; 耳輪與舊殊, 下唇垂向下。 訶梨勒一種, 具足有六味; 能除一切病, 無忌藥中王。 又三果三辛, 諸藥中易得; 沙糖蜜蘇乳, 此能療眾病。 自餘諸藥物, 隨病可增加; 先起慈愍心, 莫規於財利。 我已為汝說, 療疾中要事; 當獲無邊果。』 以此救眾生,

「善女天!爾時,長者子流水親問其父八術之要,四大增損,時節不同,餌藥方法,既善了知,自忖堪能救療眾病,即便遍至城邑聚落所在之處,隨有百千萬億病苦眾生,皆至其所,善言慰喻,作如是語:『我是醫人!我是醫人!善知方藥,今為汝等療治眾病,悉令除愈。』善女天!爾時眾人聞長者子善言慰喻,許為治病,時有無量百千眾生遇極重病,聞是語已,身心踊躍,得未曾有。以此因緣,所有病苦悉得蠲除,氣力充實,平復如本。善女天!爾時復有無量百千眾生,病苦深重難療治者,即共往詣長者子所,重請醫

療。時長者子,即以妙藥令服皆蒙除差。善女天!是長者子於此國內,治百千萬億眾生病苦,悉得除差。」

金光明最勝王經長者子流水品第二十五

爾時,佛告菩提樹神:「善女天!爾時長者子流水,於往昔時,在天自在光王國內,療諸眾生所有病苦,令得平復,受安隱樂。時諸眾生以病除故,多修福業,廣行惠施,以自歡娛。即共往詣長者子所,咸生尊敬,作如是言:『善哉!善哉!大長者子!善能滋長福德之事,增益我等安隱壽命,仁今實是大力醫王慈悲菩薩,妙閑醫藥,善療眾生無量病苦。』如是稱歎周遍城邑。

「善女天!時長者子妻名水扇藏,有其二子,一名水滿;二名水藏。是時流水將其二子,漸次遊行城邑聚落,過空澤中深險之處,見諸禽獸豺狼狐玃鵰鷲之屬食血肉者,皆悉奔飛一向而去。時長者子作如是念:『此諸禽獸何因緣故,一向飛走?我當隨後暫往觀之。』即便隨去,見有大池,名曰野生,其水將盡,於此池中多有眾魚。流水見已,生大悲心。時有樹神示現半身,作如是語:『善哉!善哉!善男子!汝有實義名流水者,可愍此魚,應與其水。有二因緣,名為流水:一能流水,二能與水。汝今應當隨名而作。』是時流水問樹神言:『此魚頭數為有幾何?』樹神答曰:『數滿十千。』

「善女天!時長者子聞是數已,倍益悲心。時此大池為日所曝,餘水無幾,是十千魚將入死門,旋身婉轉,見是長者心有所悕,隨逐瞻視,目未曾捨。時長者子,見是事已,馳趣四方,欲覓於水,竟不能得。復望一邊見有大樹,即便昇上折取枝葉為作蔭涼。復更推求,是池中水從何處來?尋覓不已,見一大河,名曰水生,時此河邊有諸漁人為取魚故,於河上流懸險之處,決棄其水,不令下過,於所決處,卒難修補。便作是念:『此崖深峻,設百千人,時經三

月亦未能斷,況我一身而堪濟辦?』時長者子速還本城,至大王 所,頭面禮足,却住一面,合掌恭敬作如是言:『我為大王國土人 民,治種種病,悉令安隱,漸次遊行至其空澤,見有一池,名曰野 生,其水欲涸,有十千魚為日所曝,將死不久,惟願大王慈悲愍 念,與二十大象暫往負水,濟彼魚命,如我與諸病人壽命。』爾時 大王即勅大臣,速疾與此醫王大象。時彼大臣,奉王勅已,白長者 子:『善哉大士!仁今自可至象廐中,隨意選取二十大象,利益眾 生,令得安樂。』是時流水及其二子,將二十大象,又從酒家多借 皮囊,往決水處,以囊盛水,象負至池,瀉置池中,水即彌滿,還 復如故。

「善女天!時長者子,於池四邊周旋而視,時彼眾魚亦復隨逐循岸 而行。時長者子復作是念:『眾魚何故隨我而行?必為飢火之所惱 逼,復欲從我求索於食,我今當與。』爾時長者子流水告其子言: 『汝取一象最大力者,速至家中啟父長者,家中所有可食之物,乃 至父母食噉之分,及以妻子奴婢之分,悉皆收取,即可持來。』爾 時二子受父教已,乘最大象速往家中,至祖父所,說如上事。收取 家中可食之物,置於象上,疾還父所,至彼池邊。是時流水見其子 來,身心喜躍,遂取餅食遍散池中,魚得食已,悉皆飽足。便作是 念:『我今施食令魚得命,願於來世當施法食充濟無邊。』復更思 惟:『我先曾於空閑林處,見一苾芻讀大乘經,說十二緣生甚深法 要。又經中說:「若有眾生臨命終時,得聞寶髻如來名者,即生天 上。」我今當為是十千魚演說甚深十二緣起,亦當稱說寶髻佛名。 然贍部洲有二種人,一者、深信大乘,二者、不信毀告,亦當為彼 增長信心。』時長者子作如是念:『我入池中,可為眾魚說深妙 法。』作是念已,即便入水唱言:『南謨過去寶髻如來、應、正遍 知、明行足、善逝、世間解、無上士、調御丈夫、天人師、佛、世 尊。此佛往昔修菩薩行時,作是誓願:「於十方界所有眾生,臨命 終時聞我名者,命終之後,得生三十三天。」』爾時流水復為池魚

演說如是甚深妙法:『此有故彼有,此生故彼生,所謂無明緣行,行緣識,識緣名色,名色緣六處,六處緣觸,觸緣受,受緣愛,愛緣取,取緣有,有緣生,生緣老死憂悲苦惱。此滅故彼滅,所謂無明滅則行滅,行滅則識滅,識滅則名色滅,名色滅則六處滅,六處滅則觸滅,觸滅則受滅,受滅則愛滅,愛滅則取滅,取滅則有滅,有滅則生滅,生滅則老死滅,老死滅則憂悲苦惱滅,如是純極苦蘊悉皆除滅。』說是法已,復為宣說十二緣起相應陀羅尼曰:

「『怛姪他 毘折儞 毘折儞 毘折儞 僧塞枳儞 僧塞枳儞 僧塞枳儞 毘爾儞 毘爾儞 毘爾儞莎訶 怛姪他 那弭儞那弭儞 那弭儞 殺雉儞 殺雉儞颯鉢哩設儞 颯鉢哩設儞 颯鉢哩設儞 萨達儞 薩達儞 薩達儞 窒里瑟儞儞 窒里瑟儞儞 窒里瑟儞儞 鄔波地儞 鄔波地儞 莎訶 怛 姪他 婆毘儞婆毘儞 婆毘儞 闍底儞 闍底儞 闍底儞 闍摩儞儞 闍摩儞儞 蓍摩儞儞莎訶』」

爾時,世尊為諸大眾說長者子昔緣之時,諸人天眾歎未曾有。時四大天王各於其處,異口同音作如是說:

「善哉釋迦尊, 說妙法明咒; 生福除眾惡, 十二支相應。 我等亦說呪, 擁護如是法; 若有生違逆, 不善隨順者。 頭破作七分, 猶如蘭香梢;

我等於佛前, 共說其呪曰:

「怛姪他 呬里謎 揭睇健 陀哩 旃荼哩地囇 騷伐囇 石呬伐 曬 補囉布曬矩矩末底 崎囉末底 達地目契 窶嚕婆 母嚕婆 具荼母嚕健提 杜嚕杜嚕 毘囇 醫泥悉悉泥沓(徒冷,下同)焜達沓 棍 鄔悉怛哩 烏率吒囉伐底 頞剌娑伐底鉢杜摩伐底 俱蘇摩伐底 莎訶」

佛告善女天:「爾時長者子流水及其二子,為彼池魚施水施食,并說法已,俱共還家。是長者子流水,復於後時因有聚會,設眾伎樂,醉酒而臥。時十千魚同時命過,生三十三天,起如是念:『我等以何善業因緣生此天中?』便相謂曰:『我等先於贍部洲內,墮傍生中,共受魚身,長者子流水施我等水及以餅食,復為我等說甚深法十二緣起及陀羅尼,復稱寶髻如來名號,以是因緣,能令我等得生此天。是故我今咸應詣彼長者子所,報恩供養。』爾時十千天子即於天沒,至贍部洲大醫王所。時長者子在高樓上安隱而睡,時十千天子共以十千萬珠瓔珞置其面邊,復以十千置其足處,復以十千置於右脇,復以十千置左脇邊,兩曼陀羅花、摩訶曼陀羅花,積至于膝,光明普照,種種天樂出妙音聲,令贍部洲有睡眠者皆悉覺悟,長者子流水亦從睡寤。是時十千天子為供養已,即於空中飛騰而去,於天自在光王國內,處處皆兩天妙蓮花,是諸天子復至本處,空澤池中兩眾天花,便於此沒,還天宮殿,隨意自在,受五欲樂。

「天自在光王至天曉已,問諸大臣:『昨夜何緣忽現如是希有瑞相,放大光明?』大臣答言:『大王當知!有諸天眾於長者子流水家中,兩四十千真珠瓔珞及天曼陀羅花,積至于膝。』王告臣曰:『詣長者家,喚取其子。』大臣受勅,即至其家,奉宣王命,喚長者子。時長者子即至王所。王曰:『何緣昨夜示現如是希有瑞相?』長者子言:『如我思惟,定應是彼池內眾魚,如經所說,命終之後得生三十三天,彼來報恩,故現如是希奇之相。』王曰:『何以得知?』流水答言:『王可遣使,并我二子,往彼池所驗其虛實,彼十千魚為死為活?』王聞是語,即便遣使及子向彼池邊,見其池中多有曼陀羅花,積成大聚,諸魚並死,見已馳還為王廣說。王聞是已,心生歡喜,歎未曾有。」

爾時,佛告菩提樹神:「善女天!汝今當知昔時長者子流水者,即我身是;持水長者即妙幢是;彼之二子,長子水滿即銀幢是,次子水藏即銀光是;彼天自在光王者,即汝菩提樹神是;十千魚者即十千天子是。因我往昔以水濟魚,與食令飽,為說甚深十二緣起,并此相應陀羅尼呪,又為稱彼寶髻佛名,因此善根得生天上,今來我所,歡喜聽法。我皆當為授於阿耨多羅三藐三菩提記,說其名號。善女天!如我往昔於生死中,輪迴諸有,廣為利益,今無量眾生悉令次第成無上覺,與其授記,汝等皆應勤求出離,勿為放逸。」

爾時大眾聞說是已,悉皆悟解,由大慈悲救護一切,勤修苦行,方能證獲無上菩提,咸發深心,信受歡喜。

金光明最勝王經卷第九

大唐三藏沙門義淨奉 制譯

捨身品第二十六

爾時,世尊已為大眾說此十千天子往昔因緣,復告菩提樹神及諸大眾:「我於過去行菩薩道,非但施水及食,濟彼魚命,乃至亦捨所愛之身,如是因緣,可共觀察。」爾時,如來、應、正等覺,天上天下最勝最尊,百千光明照十方界,具一切智功德圓滿,將諸苾芻及於大眾,至般遮羅聚落,詣一林中。其地平正,無諸荊棘,名花軟草遍布其處。佛告具壽阿難陀:「汝可於此樹下為我敷座。」時阿難陀受教敷已,白言:「世尊!其座敷訖,唯聖知時。」

爾時世尊,即於座上加趺而坐,端身正念,告諸苾芻:「汝等樂欲見彼往昔苦行菩薩本舍利不?」諸苾芻言:「我等樂見。」世尊即以百福莊嚴相好之手而按其地,于時大地六種震動,即便開裂,七寶制底忽然踊出,眾寶羅網莊嚴其上。大眾見已,生希有心。爾時世尊即從座起,作禮右遶,還就本座,告阿難陀:「汝可開此制底之戶。」時阿難陀即開其戶,見七寶函,奇珍間飾,白言:「世尊!有七寶函,眾寶莊挍。」佛言:「汝可開函。」時阿難陀奉教開已,見有舍利,白如珂雪拘物頭花,即白佛言:「函有舍利,色妙異常。」佛言:「阿難陀!汝可持此大士骨來。」時阿難陀即取其骨,奉授世尊。

世尊受已,告諸苾芻:「汝等應觀苦行菩薩遺身舍利。」而說頌曰:

「菩薩勝德相應慧, 勇猛精勤六度圓; 常修不息為菩提, 不捨堅固心無倦。 「汝等苾芻咸應禮敬菩薩本身,此之舍利乃是無量戒、定、慧香之 所熏馥,最上福田,極難逢遇。」時諸苾芻及諸大眾,咸皆至心合 掌,恭敬頂禮舍利,歎未曾有。

時阿難陀前禮佛足,白言:「世尊!如來大師出過一切,為諸有情之所恭敬,何因緣故,禮此身骨?」

佛告阿難陀:「我因此骨速得無上正等菩提,為報往恩,我今致 禮。」復告阿難陀:「吾今為汝及諸大眾斷除疑惑,說是舍利往昔 因緣,汝等善思,當一心聽。」

阿難陀曰:「我等樂聞,願為開闡。」

「阿難陀!過去世時有一國王,名曰大車,巨富多財,庫藏盈滿,軍兵武勇,眾所欽伏,常以正法施化黔黎,人民熾盛,無有怨敵。國大夫人誕生三子,顏容端正,人所樂觀,太子名曰摩訶波羅,次子名曰摩訶提婆,幼子名曰摩訶薩埵。是時大王為欲遊觀縱賞山林,其三王子亦皆隨從,為求花果,捨父周旋至大竹林,於中憩息。第一王子作如是言:『我於今日,心甚驚惶,於此林中將無猛獸損害於我?』第二王子復作是言:『我於自身初無悋惜,恐於所愛有別離苦。』第三王子白二兄曰:

「『此是神仙所居處, 我無恐怖別離憂; 身心充遍生歡喜, 當獲殊勝諸功德。』

「時諸王子各說本心所念之事,次復前行,見有一虎產生七子,纔經七日,諸子圍遶,飢渴所逼,身形羸瘦,將死不久。第一王子作如是言:『哀哉!此虎產來七日,七子圍遶,無暇求食,飢渴所逼,必還噉子。』薩埵王子問言:『此虎每常所食何物?』第一王子答曰:

「『虎豹豺師子, 唯噉熱血肉;

更無餘飲食, 可濟此虛羸。』

「第二王子聞此語已,作如是言:『此虎羸瘦,飢渴所逼,餘命無幾,我等何能為求如是難得飲食?誰復為斯自捨身命,濟其飢苦?』第一王子言:『一切難捨無過己身。』薩埵王子言:『我等今者於自己身各生愛戀,復無智慧,不能於他而興利益,然有上士懷大悲心,常為利他亡身濟物。』復作是念:『我今此身於百千生,虛棄爛壞,曾無所益,云何今日而不能捨以濟飢苦,如捐洟唾?』時諸王子作是議已,各起慈心,悽傷愍念,共觀羸虎,目不暫移,徘徊久之,俱捨而去。爾時薩埵王子便作是念:『我捨身命,今正是時。何以故?

「『我從久來持此身, 臭穢膿流不可愛; 供給敷具并衣食, 象馬車乘及珍財。 變壞之法體無常, 恒求難滿難保守; 雖常供養懷怨害, 終歸棄我不知恩。

「『復次,此身不堅,於我無益,可畏如賊,不淨如冀,我於今日,當使此身修廣大業,於生死海作大舟航,棄捨輪迴,令得出離。』復作是念:『若捨此身,則捨無量癰疽惡疾,百千怖畏。是身唯有大小便利,不堅如泡,諸蟲所集,血脈筋骨共相連持,甚可厭患。是故我今應當棄捨,以求無上究竟涅槃,永離憂患無常苦惱,生死休息,斷諸塵累,以定慧力圓滿熏修,百福莊嚴成一切智,諸佛所讚微妙法身,既證得已,施諸眾生無量法樂。』是時王子興大勇猛,發弘誓願,以大悲念增益其心,慮彼二兄情懷怖懼,共為留難,不果所祈,即便白言:『二兄前去,我且於後。』爾時王子摩訶薩埵還入林中,至其虎所,脫去衣服,置於竹上,作是誓言:

「『我為法界諸眾生, 志求無上菩提處; 起大悲心不傾動, 當捨凡夫所愛身。 菩提無患無熱惱, 諸有智者之所樂; 三界苦海諸眾生, 我今拔濟令安樂。』

「是時王子作是言已,於餓虎前委身而臥。由此菩薩慈悲威勢,虎無能為。菩薩見已,即上高山,投身于地,時諸神仙捧接王子,曾無傷損。復作是念:『虎今羸瘦,不能食我。』即起求刀,竟不能得,即以乾竹刺頸出血,漸近虎邊。是時大地六種震動,如風激水,涌沒不安,日無精明,如羅睺障,諸方闇蔽,無復光輝,天雨名華及妙香末,繽紛亂墜遍滿林中。爾時虛空有諸天眾,見是事已,生隨喜心,歎未曾有,咸共讚言:『善哉大士!』即說頌曰:

「『大士救護運悲心, 等視眾生如一子; 勇猛歡喜情無悋, 捨身濟苦福難思。 定至真常勝妙處, 永離生死諸纏縛; 不久當獲菩提果, 寂靜安樂證無生。』

「是時餓虎既見菩薩頸下血流,即便舐血噉肉皆盡,唯留餘骨。爾 時第一王子見地動已,告其弟曰:

「『大地山河皆震動, 諸方闇蔽日無光; 天花亂墜遍空中, 定是我弟捨身相。』

「第二王子聞兄語已,說伽他曰:

「『我聞薩埵慈悲語, 見彼餓虎身羸瘦; 飢苦所纏恐食子, 我今疑弟捨其身。』

「時二王子生大愁苦,啼泣悲歎,即共相隨還至虎所。見弟衣服在 竹枝上,骸骨及髮在處縱橫,血流成泥霑污其地。見已,悶絕不能 自持,投身骨上,久乃得蘇,即起舉手哀號大哭。俱時歎曰:

「『我弟貌端嚴, 父母偏愛念; 云何俱共出, 捨身而不歸? 父母若問時, 我等如何答?

寧可同捐命, 豈復自存身。』

「時二王子悲泣懊惱,漸捨而去,時小王子所將侍從,互相謂曰: 『王子何在?宜共推求。』

「爾時,國大夫人寢高樓上,便於夢中見不祥相,被割兩乳,牙齒 墮落,得三鴿鶵,一為鷹奪,二被驚怖。地動之時,夫人遂覺,心 大愁惱,作如是言:

「『何故今時大地動, 江河林樹皆搖震; 日無精光如覆蔽, 目[目*需]乳動異常時。 如箭射心憂苦逼, 遍身戰掉不安隱; 我之所夢不祥徵, 必有非常災變事。』

「夫人兩乳忽然流出,念此必有變怪之事。時有侍女聞外人言: 『求覓王子,今猶未得。』心大驚怖,即入宮中白夫人曰:『大家 知不?外聞諸人散覓王子,遍求不得。』時彼夫人聞是語已,生大 憂惱,悲淚盈目,至大王所,白言:『大王!我聞外人作如是語: 「失我最小所愛之子。」』王聞語已,驚惶失所,悲哽而言:『苦 哉!今日失我愛子。』即便抆淚慰喻夫人,告言:『賢首!汝勿憂 越,吾今共出求覓愛子。』王與大臣及諸人眾即共出城,各各分散 隨處求覓。未久之頃,有一大臣前白王曰:『聞王子在,願勿憂 愁,其最小者,今猶未見。』王聞是語,悲歎而言:『苦哉!苦 哉!失我愛子。

「『初有子時歡喜少, 後失子時憂苦多; 若使我兒重壽命, 縱我身亡不為苦。』

「夫人聞已,憂惱纏懷,如被箭中,而嗟歎曰:

「『我之三子并侍從, 俱往林中共遊賞; 最小愛子獨不還, 定有乖離災厄事。』 「次第二臣來至王所。王問臣曰:『愛子何在?』第二大臣懊惱啼 泣,喉舌乾燥,口不能言,竟無辭答。夫人問曰:

「『速報小子今何在? 我身熱惱遍燒然; 悶亂荒迷失本心, 勿使我胸今破裂!』

「時第二臣,即以王子捨身之事,具白王知。王及夫人聞其事已,不勝悲噎,望捨身處,驟駕前行,詣竹林所。至彼菩薩捨身之地, 見其骸骨隨處交橫,俱時投地,悶絕將死,猶如猛風吹倒大樹,心 迷失緒,都無所知。時大臣等,以水遍灑王及夫人,良久乃蘇,舉 手而哭,諮嗟歎曰:

「『禍哉愛子端嚴相, 因何死苦先來逼? 若我得在汝前亡, 豈見如斯大苦事。』

「爾時夫人迷悶稍止,頭髮蓬亂,兩手椎胸,宛轉于地,如魚處 陸,若牛失子,悲泣而言:

「『我子誰屠割, 餘骨散于地?

失我所愛子, 憂悲不自勝。

苦哉誰殺子, 致斯憂惱事;

我心非金剛, 云何而不破?

我夢中所見, 兩乳皆被割;

牙齒悉墮落, 今遭大苦痛。

又夢三鴿鶵, 一被鷹擒去;

今失所愛子, 惡相表非虛。』

「爾時,大王及於夫人并二王子,盡哀號哭,瓔珞不御,與諸人眾 共收菩薩遺身舍利,為於供養,置窣堵波中。阿難陀!汝等應知! 此即是彼菩薩舍利。」復告阿難陀:「我於昔時,雖具煩惱貪瞋癡 等,能於地獄、餓鬼、傍生五趣之中,隨緣救濟,令得出離。何況 今時煩惱都盡,無復餘習,號天人師,具一切智,而不能為一一眾 生,經於多劫在地獄中及於餘處,代受眾苦,令出生死煩惱輪迴!」

爾時世尊,欲重宣此義而說頌曰:

「我念過去世, 無量無數劫; 或時作國王, 或復為王子。 常行於大施, 及捨所愛身; 願出離牛死, 至妙菩提處。 國主名大車; 昔時有大國, 王子名勇猛, 常施心無悋。 王子有二兄, 號大渠大天; 三人同出遊, 漸至山林所。 見虎飢所逼, 便生如是心: 『此虎飢火燒, 更無餘可食。』 大士親如斯, 恐其將食子; 捨身無所顧, 救子不令傷。 一時皆震動; 大地及諸山, 驚波水逆流。 江海皆騰躍, 天地失光明, 昬冥無所見; 林野諸禽獸, 飛奔喪所依。 二兄怪不還, 憂風生悲苦; 即與諸侍從, 林藪遍尋求。 兄弟共籌議, 復往深山處; 四顧無所有, 見虎處空林。 其母并七子, 口皆有血污; 殘骨并餘髮, 縱橫在地上。 復見有流血, 散在樹林所; 二兄既見已, 心生大恐怖。 悶絕俱躄地, 荒迷不覺知; 六情皆失念。 塵十坌其身, 王子諸侍從, 啼泣心憂惱; 以水灑令蘇, 舉手號咻哭。 菩薩捨身時, 慈母在宫内; 五百諸婇女, 共受於妙樂。 忽然自流出; 夫人之兩乳, 遍體如針刺, 苦痛不能安。 数生失子想, 憂箭苦傷心;

即白大王知, 陳斯苦惱事。 哀聲向王說: 悲泣不堪忍, 『大王今當知, 我生大苦惱。 兩乳忽流出, 禁止不隨心; 如針遍刺身, 煩宛胸欲破。 我先夢惡徵, 必當失愛子; 知兒存與亡。 願王濟我命, 小者是爱子; 夢見三鴿鶵, 忽被鷹奪去, 悲愁難具陳。 我今沒憂海, 趣死將不久; 恐子命不全, 願為速求覓。 又閏外人語, 小子求不得; 我今意不安, 願王哀愍我。』 夫人白王已, 舉身而躄地; 悲痛心悶絕, 荒迷不覺知。 婇女見夫人, 悶絕在於地; 舉聲皆大哭, 憂惶失所依。 王閏如是語, 懷憂不自勝; 因命諸群臣, 尋求所愛子。 皆共出城外, 各隨處追買; 『王子今何在? 涕泣問諸人: 今者為存亡, 誰知所去處? 云何令我見, 解我憂悲心?』 諸人悉共傳, 咸言王子死; 聞者皆傷悼, 悲歎苦難裁。 爾時大車王, 悲號從座起; 即就夫人處, 以水灑其身。 夫人蒙水灑, 久乃得醒悟; 悲啼以問王: 『我兒今在不?』 王告夫人曰: 『我已使諸人, 四向求王子, 尚未有消息。』 王又告夫人: 『汝莫生煩惱, 且當自安慰, 可共出追尋。』 王即與夫人, 嚴駕而前進; 憂心若火然。 號動聲悽感, 士庶百千萬, 亦隨王出城; 各欲求王子, 悲號聲不絕。 目視於四方; 王求愛子故,

```
見有一人來,
        被髮身塗血,
        悲哭逆前來。
遍體蒙塵十,
王見是惡相,
        倍復生憂惱,
王便舉兩手,
        哀號不自裁。
初有一大臣,
        念忙至王所,
進白大王曰:
        『幸願勿悲哀;
王之所愛子,
        今雖求未獲。
        以釋大王憂。』
不久當來至,
        見次大臣至,
王復更前行,
其臣詣王所,
        流淚白王言:
『二子今現在,
         被憂火所逼;
        已被無常吞。
其第三王子,
        將欲食其子;
見餓虎初生,
        見此起悲心,
彼薩埵王子,
願求無上道,
        當度一切眾。
繋想妙菩提,
        廣大深如海;
即上高山頂,
        投身餓虎前。
虎羸不能食,
        以竹自傷頸;
遂噉王子身,
        唯有餘骸骨。』
時王及夫人,
        聞已俱悶絕;
心沒於憂海,
        煩惱火燒然。
臣以栴檀水,
        灑王及夫人;
俱起大悲號,
        舉手椎胸臆。
第三大臣來,
        白王如是語:
『我見二王子,
         悶絕在林中。
臣以冷水灑,
        爾乃暫蘇息;
顧視於四方,
        如猛火周遍。
        悲號不自勝;
暫起而還伏,
舉手以哀言,
        稱歎弟希有。』
王閏如是說,
        倍增憂火煎;
夫人大號咷,
        高聲作是語:
『我之小子偏重愛, 已為無常羅剎吞;
餘有二子今現在,
          復被憂火所燒逼,
我今速可之山下,
          安慰令其保餘命。』
          一心詣彼捨身崖。
即便馳駕望前路,
路逢二子行啼泣,
          椎胸懊惱失容儀;
父母見已抱憂悲,
          俱往山林捨身處。
          共聚悲號生大苦;
既至菩薩捨身地,
```

脫去瓔珞盡哀心, 收取菩薩身餘骨。 與諸人眾同供養, 共造七寶窣堵波; 以彼舍利置函中, 整駕懷憂趣城邑。」 復告阿難陀: 「往時薩埵者; 即我牟尼是, 勿生於異念。 王是父淨飯, 后是母摩耶; 太子謂慈氏, 次曼殊室利。 五兒五苾恕; 虎是大世主, 一是大月蓮, 一是舍利弗。 我為汝等說, 往昔利他緣; 如是菩薩行, 成佛因當學。 菩薩捨身時, 發如是弘誓; 來世益眾生。 願我身餘骨, 七寶窣堵波; 此是捨身處, 以經無量時, 遂沈於厚地。 由昔本願力, **隨緣興濟渡**; 為利於人天, 從地而涌出。」

爾時世尊說是往昔因緣之時,無量阿僧企耶人天大眾,皆大悲喜, 歎未曾有,悉發阿耨多羅三藐三菩提心。復告樹神:「我為報恩, 故致禮敬。」佛攝神力,其窣堵波還沒于地。

金光明最勝王經十方菩薩讚歎品第二十七

爾時,釋迦牟尼如來說是經時,於十方世界有無量百千萬億諸菩薩眾,各從本土詣鷲峯山,至世尊所,五輪著地,禮世尊已,一心合掌,異口同音而讚歎曰:

「佛身微妙真金色, 其光普照等金山; 清淨柔軟若蓮華, 無量妙彩而嚴飾。 三十二相遍莊嚴, 八十種好皆圓備; 光明昞著無與等, 離垢猶如淨滿月。 其聲清徹甚微妙, 如師子吼震雷音; 八種微妙應群機, 招勝迦陵頻伽等。 百福妙相以嚴容, 光明具足淨無垢; 智慧澄明如大海, 功德廣大若虛空。

圓光遍滿十方界, 隨緣普濟諸有情; 煩惱愛染習皆除, 法炬恒然不休息。 哀愍利益諸眾生, 現在未來能與樂; 令證涅槃真寂靜。 常為宣說第一義, 佛說甘露殊勝法, 能與甘露微妙義; 引入甘露涅槃城, 今受甘露無為樂。 常於生死大海中, 解脫一切眾生苦; 今彼能住安隱路, 恒與難思如意樂。 如來德海甚深廣, 非諸譬喻所能知; 於眾常起大悲心, 方便精勤恒不息。 如來智海無邊際, 一切人天共測量; 假使千萬億劫中, 不能得知其少分。 我今略讚佛功德, 於德海中唯一渧; 迴斯福聚施群生, 皆願速證菩提果。 [

爾時,世尊告諸菩薩言:「善哉!善哉!汝等善能如是讚佛功德, 利益有情,廣興佛事,能滅諸罪,生無量福。」

金光明最勝王經妙幢菩薩讚歎品第二十八

爾時,妙幢菩薩即從座起,偏袒右肩,右膝著地,合掌向佛,而說 讚曰:

「牟尼百福相圓滿, 無量功德以嚴身。 廣大清淨人樂觀, 猶如千日光明照; 焰彩無邊光熾盛, 如妙寶聚相端嚴。 如日初出映虚空, 紅白分明間金色; 亦如金山光普照, 悉能周遍百千土。 能滅眾生無量苦, 皆與無邊勝妙樂; 諸相具足悉嚴淨, 眾牛樂覩無厭足。 頭髮柔軟紺青色, 猶如黑蜂集妙華; 大喜大捨淨莊嚴, 大慈大悲皆具足。 眾妙相好為嚴飾, 菩提分法之所成; 令彼常獲大安樂。 如來能施眾福利, 光明普照千萬十; 種種妙德共莊嚴, 如來光相極圓滿, 猶如赫日遍空中。 示現能周於十方; 佛如須彌功德具,

如來金口妙端嚴, 齒白齊密如珂雪。 如來面貌無倫匹, 眉間毫相常右旋; 光潤鮮白等頗梨, 猶如滿月居空界。」

佛告妙幢菩薩:「汝能如是讚佛,功德不可思議,利益一切,令未 知者隨順修學。」

金光明最勝王經菩提樹神讚歎品第二十九

爾時,菩提樹神亦以伽他讚世尊曰:

「敬禮如來清淨慧! 敬禮常求正法慧! 敬禮能離非法慧! 敬禮恒無分別慧! 希有世尊無邊行, 希有難見比優曇; 希有如海鎮山王, 希有善逝光無量。 希有調御弘慈願, 希有釋種明諭日; 能說如是經中寶, 哀愍利益諸群牛。 牟尼寂靜諸根定, 能入寂靜涅槃城; 能住寂靜等持門, 能知寂靜深境界。 兩足中尊住空寂, 聲聞弟子身亦空; 一切法體性皆無, 一切眾生悉空寂。 我常憶念於諸佛, 我常樂見諸世尊; 我常發起殷重心, 常得值遇如來日。 我常頂禮於世尊, 願常渴仰心不捨; 常得奉事不知厭。 悲泣流淚情無間, 惟願世尊起悲心, 和顏常得令我見; 佛及聲聞眾清淨, 願常普濟於人天。 佛身本淨若虚空, 亦如幻焰及水月; 願說涅槃甘露法, 能生一切功德聚。 世尊所有淨境界, 慈悲正行不思議; 聲聞獨覺非所量, 大仙菩薩不能測。 惟願如來哀愍我, 常令覩見大悲身; 三業無倦奉慈尊, 速出生死歸直際。」

爾時世尊聞是讚已,以梵音聲告樹神曰:「善哉!善哉!善女天! 汝能於我真實無妄清淨法身,自利利他宣揚妙相,以此功德令汝竦 證最上菩提,一切有情同所修習,若得聞者,皆入甘露無生法門。」

金光明最勝王經大辯才天女讚歎品第三十

爾時,大辯才天女即從座起,合掌恭敬,以直言詞讚世尊曰:

「南無釋迦牟尼如來應正等覺!身真金色,咽如螺貝,面如滿月, 目類青蓮,脣口赤好如頗梨色,鼻高修直如截金鋌,齒白齊密如拘 物頭華,身光普照,如百千日,光彩映徹,如贍部金。其所言說無 有錯謬,示三解脫門,開三菩提路,心常清淨,意樂亦然,佛所住 處及所行境亦常清淨,離非威儀,進止無謬。六年苦行,三轉法 輪,度苦眾生,令歸彼岸。身相圓滿如拘陀樹,六度熏修,三業無 失,具一切智,自他利滿,所有宣說常為眾生,言不虛設,於釋種 中為大師子,堅固勇猛,具八解脫。我今隨力稱讚如來少分功德, 猶如蚊子飲大海水,願以此福廣及有情,永離生死,成無上道。」

爾時,世尊告大辯才天曰:「善哉!善哉!汝久修習,具大辯才,今復於我廣陳讚歎,令汝速證無上法門,相好圓明,普利一切。」

金光明最勝王經付囑品第三十一

爾時,世尊普告無量菩薩,及諸人天一切大眾:「汝等當知!我於無量無數大劫,勤修苦行,獲甚深法,菩提正因,已為汝說。汝等誰能發勇猛心,恭敬守護,我涅槃後,於此法門廣宣流布,能令正法久住世間?」

爾時,眾中有六十俱胝諸大菩薩,六十俱胝諸天大眾,異口同音作如是語:「世尊!我等咸有欣樂之心,於佛世尊無量大劫勤修苦行,所獲甚深微妙之法菩提正因,恭敬護持,不惜身命。佛涅槃後,於此法門廣宣流布,當令正法久住世間。」

「爾時諸大菩薩,即於佛前說伽他曰:

「世尊直實語, 安住於實法; 由彼真實故, 護持於此經。 大悲為甲胄, 安住於大慈; 由彼慈悲力, 護持於此經。 福資糧圓滿, 牛起智資糧; 由資糧滿故, 護持於此經。 降伏一切魔, 破滅諸邪論; 斷除惡見故, 護持於此經。 護世并釋梵, 乃至阿蘇羅; 龍神藥叉等, 護持於此經。 地上及虚空, 久住於斯者; 奉持佛教故, 護持於此經。 四梵住相應, 四聖諦嚴飾; 降伏四魔故, 護持於此經。 虚空成質礙, 質礙成虚空; 無能傾動者。」 諸佛所護持,

爾時,四大天王聞佛說此護持妙法,各生隨喜護正法心,一時同聲說伽他曰:

「我今於此經, 及男女眷屬; 皆一心擁護, 令得廣流通。 若有持經者, 能作菩提因; 我常於四方, 擁護而承事。」

爾時,天帝釋合掌恭敬,說伽他曰:

「諸佛證此法, 為欲報恩故; 饒益菩薩眾, 出世演斯經。 我於彼諸佛, 報恩常供養; 護持如是經, 及以持經者。」

爾時, 覩史多天子合掌恭敬, 說伽他曰:

「佛說如是經, 若有能持者;

當住菩提位, 來生覩史天。 世尊我慶悅, 捨天殊勝報; 住於贍部洲, 宣揚是經典。」

爾時,索訶世界主梵天王合掌恭敬,說伽他曰:

「諸靜慮無量, 諸乘及解脫; 皆從此經出, 是故演斯經。 若說是經處, 我捨梵天樂; 為聽如是經, 亦常為擁護。」

爾時,魔王子名曰商主合掌恭敬,說伽他曰:

「若有受持此, 正義相應經; 不隨魔所行, 淨除魔惡業。 我等於此經, 亦當勤守護; 發大精進意, 隨處廣流通。」

爾時,魔王合掌恭敬,說伽他曰:

「若有持此經, 能伏諸煩惱; 如是眾生類, 擁護令安樂。 若有說是經, 諸魔不得便; 由佛威神故, 我當擁護彼。」

爾時,妙吉祥天子亦於佛前說伽他曰:

「諸佛妙菩提, 於此經中說;若持此經者, 是供養如來。 我當持此經, 為俱胝天說; 恭敬聽聞者, 勸至菩提處。」

爾時,慈氏菩薩合掌恭敬,說伽他曰:

「若見住菩提, 與為不請友; 乃至捨身命, 為護此經王。 我聞如是法, 當往覩史天; 由世尊加護, 廣為人天說。」

爾時,上座大迦葉波合掌恭敬,說伽他曰:

「佛於聲聞乘, 說我鮮智慧; 我今隨自力, 護持如是經。 若有持此經, 我當攝受彼; 授其詞辯力, 常隨讚善哉。」

爾時,具壽阿難陀合掌向佛,說伽他曰:

「我親從佛聞, 無量眾經典; 未曾聞如是, 深妙法中王。 我今聞是經, 親於佛前受; 諸樂菩提者, 當為廣宣通。」

爾時,世尊見諸菩薩人天大眾各各發心,於此經典流通擁護,勸進菩薩廣利眾生,讚言:「善哉!善哉!汝等能於如是微妙經王虔誠流布,乃至於我般涅槃後,不令散滅,即是無上菩提正因,所獲功德於恒沙劫說不能盡。若有苾芻、苾芻尼、鄔波索迦、鄔波斯迦,及餘善男子、善女人等,供養恭敬,書寫流通,為人解說,所獲功德亦復如是,是故汝等應勤修習。」

爾時,無量無邊恒沙大眾,聞佛說已,皆大歡喜,信受奉行。

金光明最勝王經卷第十

此經梵策,英國王立亞細亞協會所藏,比諸當譯頗有所缺,若陀羅尼不存者甚多矣。即依宗教大學圖書館西藏譯本,對比出之。蓋蕃藏《金光明經》有兩部,其一實原義淨漢本,脗合固其所已耳;而間有少異,讀者就知焉。

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名:財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司,CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".